

XTIIDZ DIOS MINE PQUIAA

MATEW

- 1** Jesús meṇ ne pxeel Dios ga, lo xtii Abraham, lo xtii David, ga brieequia me. Lëë grë xmenḡoldoo me nu:
- ² Abraham goc pxoz Isaac,
Isaac goc pxoz Jacob,
Jacob goc pxoz Judá (bio zla xpëed Jacob),
- ³ Judá goc pxoz Far ni Zar (Tamar brieelë tsiel Judá),
Far goc pxoz Srom,
Srom goc pxoz Aram.
- ⁴ Aram goc pxoz Minadab,
Minadab goc pxoz Naasón,
Naasón goc pxoz Salmón.
- ⁵ Salmón goc pxoz Booz (Rahab brieelë tsiel Salmón),
Booz goc pxoz Obed (Rut brieelë tsiel Booz),
Obed goc pxoz Isaí.
- ⁶ Isaí goc pxoz rey David,
David goc pxoz Salomón (lëë Salomón ga gop tsiel Urí wnaa ne bionie David).
- ⁷ Salomón goc pxoz Roboam,
Roboam goc pxoz Abí,
Abí goc pxoz Asá,
- ⁸ Asá goc pxoz Josafat,
Josafat goc pxoz Joram,
Joram goc pxoz Uzí.
- ⁹ Uzí goc pxoz Jotam,
Jotam goc pxoz Acáz,
Acáz goc pxoz Ezequí.
- ¹⁰ Ezequí goc pxoz Manasés,
Manasés goc pxoz Amón,
Amón goc pxoz Josí,
- ¹¹ Josí goc pxoz Jeconí (bio zla xpëed Josí).

Leṅ dze ne nac Jeconí mēēd, leṅ dze co güeybee zhoo zha Babiloin grē zha Israel, beynie zho zho Babiloin.

¹² Babiloin, ga gol tib xpēēd Jeconí brieelē Salatiel,
Salatiel goc pxoz Zorobabel.

¹³ Zorobabel goc pxoz Abiud,
Abiud goc pxoz Liaquim,
Liaquim goc pxoz Azor.

¹⁴ Azor goc pxoz Sadoc,
Sadoc goc pxoz Aquim,
Aquim goc pxoz Liud.

¹⁵ Liud goc pxoz Leazar,
Leazar goc pxoz Matán,
Matán goc pxoz Jacob.

¹⁶ Jacob co nagon goc pxoz José, meṅ ne ptsieelnia Marí.
Marí goc xnīa Jesús, Meṅ ne nacle diidz ga cxeel Dios guīaad lo
guidzliu.

¹⁷ Zig choopchop bdziṅ lo dii co, dzigoraā brieequia Jesús. Tsiida zho wban desde Abraham haxta David; stsiida zho wban desde Salomón haxta leṅ dze ne bey zho Babiloin; stsiida zho wban desde leṅ dze co haxta bdziṅ dze ne goc me mēēd.

Gol Jesús

(Lc. 2:1-7)

¹⁸ Znu bzhaac Marí grop José leṅ dze ne ziaadyob gal Jesús. Gard ctsieelnia Marí loxaque xtiidz me no ne laa me ycaa José, zeēne bnabey Espíritu Sant pquialo tib mēēd zdoo me. ¹⁹ Zeēne bien Joséw, miṅne been me gocladz me mazd nsaan me Marí; sac sca rnabey ley ni zienalpaa me miṅne rnabey ley; per laa me gocladz zhliaanse nzozit me, sacne racladzd me nriee xquielto Marí. ²⁰ Zhgab co no me, tibaque blulo tib xanjl Dios lo me lo mcaal.

—José (xiag David) —rēb anjl co—, peet tsienied guic luu, pcaania Marí gac me tsiel luu; sac gon mēdyeen ne zoney me ga, Espíritu Sant bnabey pquialo win zdoo me. ²¹ Zeēne gal dze ne laa win gal, JESUS cueelē luu win, sca grieelē win sac win csilaa grē menladz win lo dol.

²² Ga brieequia miṅne bnee Dios padzeela, zeēne bzeet zha ne biadnee xtiidz mew, rēb zho:

²³ Bii zan to ganle zeēne laa tib mēēdbgui yquiaalo zdoo tib wnaayeen ne gard gnee mgui lo.

Zeēne laa win gal, Emanuel grieelē win.
(Emanuel nac zig nacne rnee ne: Dioszhal ziaad lo ne.)

²⁴ Zeēne bna José laa guic me goc tibli; bin me xtiidz anjl co laa me ptsieelnia Marí. ²⁵ Laa me wban tipse grop me per ib bgaald me Marí, haxta bded dze ne laa mēdyeen co gol. Bdziṅ dzew, laa win gol, dzigo bleelē José win JESUS.

Güeygaṅ bla zha rac Jesús

2 Tib guiedz win ne ndxie xtan Judé lè Belén, ga gol Jesús. Lëetse leṅ dze co zob meṅ ne lè Herod nac me rey ne rnabey dan co.

Goc palal dzew, laa bla zha ne runbey lo mel ziaad nêz ne rlan ngbidz bdziṅ Jerusalén, ²bnabdiidz zho rëb zho:

—¿Pa lo dieṅ no mëed ne gac meṅ ne gnabey ladz to nu, mëed ne griiṅ gol ga? Bdzion no tib mel nêz ne no no, mel co blu lo no laa win gol-le, miṅ co ne ziaad no nu ziaaddziaṅ no win.

³⁻⁴Grë menguietz Jerusalén, zeṅe bin zhow bzee zdoz zho. Laa Herod, riendraa me zha guṅ me, bnabey me pcaalsa grë zha ne nac pxoz non, grë zha ne rseed miech ley, bnabdiidz me lo zho dieṅ pa lo nac diidz gal Meṅ ne nole diidz cxeel Dios guiaad lo guidzliu ga. ⁵Dzigo rëbchaa zho lo me:

—Belén, guiedz ne ngab Judé ga none gal meṅ co, sac scale zhobnee lo guits ne pquiaa zha ne pxeel Dios padzeela biadteed xtiidz me, zeṅe psiaab me guic zho znu bnee zho:

⁶Teṅ Belén,

niicle ne winraaw lo grë guiedz ne ngab Judé, per nroob nona;

sac gon ga grieequia tib meṅ ne gnabey,

meṅ ne so yquiaanap grë meṅ Israel, ne nac zho zha ne ngab lo naa.

⁷Nacne zhlianse bnabey Herod gocredz gza zha rac co, bnabdiidz me lo zho dieṅ blapaa dze rac psilo gon zho blan mel co.

⁸Blozhse ga, dzigo pxeel me zho Belén, rëb me lo zho:

—Ga goṽsie goṽsieguib mëed co. Zigne gdziel to win, goṽtëniegazh diidz lo naa nu, zeṅa ye naa ga gagan naa win.

⁹Blozhse sca pso me diidz lo zho, laa zho bio nêz stib laa zho zie. Laa mel ne gon zho brieequia nêz ne ziaad zho ga, laa ma neraque lo zho; haxta bdziṅ ma ngali guic yu ne no mëdyeeṅ co, gataa laa ma blëz.

¹⁰⁻¹¹Zeṅe gon zho laa mel co blëz ga, per nli rley zho. Bzëeb zho leṅ yu co, gon zho laa mëdyeeṅ co no ga grop xniaa win, dzigo pquiitsgzhib zho lo win, bnee zho tib xtiidz zho lo win. Blozh ga blee zho ncuaaṅe zienie zho lo win, blee zho or, blee zho tiblo yaalnex, ni tiblo nceit nex rnee zho mirr, bgad zho lo win.

¹²Zeṅe laa gza zha rac co wbi Belén, laa ne nieted zho Jerusalén, stible nêz bzheṅ zho zey zho; sac bnee Dios lo zho lo mcaal, rëb me tsienied zho diidz lo Herod.

¹³Laa gza zha rac co zey, zeṅe güeylulo tib xanjṅ Dios lo José lëetse nixguies me, rëb anjṅ co lo me:

—José, na zeṅa guche i pcaanie mëdyeeṅ qui nêz grop xniaa win, goṽsë nêz Egipt, sac laa Herod yquiaguib win gut me win. Egipt, ga cuëznie to win, na naaque guialnie diidz lo to zeṅe laa to gi ga.

¹⁴Guieel cogazh guche José, pcaanie me mëdyeeṅ co nêz grop xniaa win, laa zho ziese nêz Egipt; ¹⁵ga blëz me haxta bdziṅ dze ne laa Herod gut. Ga

briequia minē bnee zha ne biadteed xtiidz Dios padzeela, zeene znu bnee zho: “Nēz Egipt no xpēed naa, zeene bredz naa me.”

Bnabey Herod gut grē mēēdlas

¹⁶Laa zeene gon Herod wbiredraa gza men rac co nienie zho diidz lo me, per nli blēē me. Ntseeb rac me, pxeel me zha ne güey Belén ni grēraa guiedz ne ndxie gax ga, güeygut zho grēse mēēdbgui yeen ne no grē guiedz co, desde win ne golvēz, haxta win ne rap chop iz. Tibaque nan me sca ngaa mēdyeen ne nac Jesús ga niet win, sac blee me cuent zhile gac chop iz psilo gon gza zha rac co blan mel co. ¹⁷Guielnē dox ne bio grē miech co, ga briequia minē bzeet Jeremí men ne biadteed xtiidz Dios padzeela, zeene znu rēb me:

¹⁸Tib redz nroob ne zēēb len guiedz Ramá.

Grē wnaa Judá, zha ne ziaad lo xtii Raquel,

mbanse rac zho, roon zho no zho xquielnē xpēed zho;

zha rna zha ne cchoobladz zdoo zho, sac laa xpēed zho gut.

¹⁹Goc palal dzew laa Herod gut, dzigo pxeel Dios tib xanjl me güeynee lo José lo mcaal zaatne no José nēz Egipt, rēb me lo José:

²⁰—José, guche i, pcaanie mēdyeen qui nēz grop xniaa win, golvire nēz Israel stib; laa zha ne quiana win ga gutle.

²¹Dzigo brieenie José mēdyeen co ga grop xniaa win, bio me nēz laa me wbire zeynie win nēz Israel. ²²Per zeene bin José lēēque tib xpēed Herod men ne lē Arquelá, men co biaan xlugar Herod zobnabey xtan Judé, bdzieb José ndziñnie me mēdyeen co nēz co. Dzigo bneeque Dios lo me lo mcaal tsie me nēz Galilé.

²³Goj zho Galilé, bdzinaque zho guiedz Nazaret, ga wbannie zho mēdyeen co. Ga briequia minē bzeet grē zha ne biadteed xtiidz Dios padzeela, zeene rēb zho: men Nazaret guiab miech nac Jesús.

Psilo Juan Bautist noseed me miech

(Mr. 1:1-8; Lc. 3:1-9, 15-17; Jn. 1:19-28)

3 Len dze ne psilo Juan Bautist noseed Juan miech xtan zha Judé, dan zit ne no me ga; ²rnee me lo zho:

—iGolsaan xquielntseeb to, golvab lo Dios gun me to perdon grētaa dol ne ziyun to; sac gon laa dze bdzinle laa me csilo gnabey!

³Lēē Juan Bautist ga bzeet profet Isá, zeene znu pquiaa me:

Bii zon miech ganle zeene laa tib tsi men zēēb tib dan zit, rnee me:

“Golvhixcuaa nēz ne ted men ne rnabey,

golsaan grē guielntseeb ne run to.”

⁴Niapse guits lad camell niaa xab Juan, guid nac ncuane ndxie len me, ni niapse nguzhanch ni dzin dan row me.

⁵Nzian grē menguedz Jerusalén, grē men Judé, grē men ne no gax ro guiubee Jordán, rriee zho riequiaadiag zho zhiwseed me. ⁶Grē zha ne rxobdol grēse xtol zho, dzigo rchoobnis me zho ro guiubee co.

⁷Laa zeene ran me grë zha farisé, zha saducé ne rdziñ lo me ga racladz zho ye zho chobnis, dzigo rnee me lo zho:

—¡Miech ngoopdol, masaque nac to zig nac meel! Nan to na lëë, loxaque chobnis to laa to laale lo grë guielñë dox ne ziaadyob. ⁸Led scada gon, none zaacse gban to zeena glu nli dib zdoo to psaan to grë xquieñtseeb to. ⁹Ni gacniatsde to guiab to loxaque por nacse to xtii Abraham, laa Dios csilaale to; sac gneli naa lo to ganle telne gacladz Dios, haxta grë quie zac gnabey me tsaalow miech ne gac zha xtii Abraham. ¹⁰Nanle to ganle, grë yag nex, zeene rquiad nex low led rruga, rlozh ga rliaala lo gui, ga reca. Scadaa nagon gdzieelo miech ne gband zigne racladz Dios, sac rrieequia laa me nzhenle xquibyag me chug me yag ne sca nac.

¹¹Nli tib wrobnisse nu rnedz naa lo to, nacsew zig tib señ, sac lëë gdib rluw laa to psaan xquieñtseeb to, laa to bzëëb xnëz Dios. Sangue men ne no guiaad ga, mesi Espiritu Sant gdeed me lo zha ne gliladz me; ni scagaa zha ne gliladz me, sonëz me zho zaatne nitlo zho. Ne nligaa tib men non nac me, tel naa peet nond naa, per ni par tib ngundziin ne glit lab me raguiald naa gac naa. ¹²Laa me guiaad zig tib zha ne rbeeguizh zhobxtil, sac zha co rlozhse runmbe zho zhob, rgotsow zhow, laa paj rielaal zho lo gui, ga reca. Per gui ne gzëëg grë paj ne guiadbee me ga, gdziñd dze guiuuw.

Brobnis Jesús

(Mr. 1:9-11; Lc. 3:21-22)

¹³Len dze co brieë Jesús nëz Galilé zie me nëz ro guiubee Jordán, laa me zie par cchoobnis Juan me. Bdziñ me ¹⁴nëd Juan cchoobnis Juan me, rëb Juan lo me:

—Lëda i gon, naa none guial lo luu cchoobnis luu naa.

¹⁵Dzigo rëb me lo Juan:

—Nli scaw, per mazd pchoobnis naa, sac gon ib nonguiela dziuun ne mine rnabey Dios.

Dzigoraa pchoobnis Juan me. ¹⁶Laa me zieriee lo nis zeene laa zhan gbaa bzhial, gonpaa me zig rlu tib palom rlu Espiritu Sant laa me ziad-zëëb bdziñ me guic me, ¹⁷ni blu zëëb tib tsi men co nëz gbaa rnee me:

—Xpëed naa gon nac men qui, rleynie naa me, men nziuu nac me lo naa.

Gocladz mendox niungüet ma Jesús

(Mr. 1:12-13; Lc. 4:1-13)

4 Zeene blozh brobnis Jesús, dzigo güeynie Espiritu Sant me tib dan zit, zaatne guieñd miech; ga gocladz mendox niungüet ma me niuñ me mine racladz ma.

²Zeene goc choo ngbidz choo guieel no me dan co ni tib lë peet rowd me, laa me pcaabedz ³hor co bdziñ mendox zaatne no me ga, rëb ma:

—Telne nli Xpëed Dios nac luu, bnabey tsaalo grë quie rii ncuane gow luu.

⁴Dzigo pquiab me rëb me lo ma:

—Znu zhobnee lo Xtii dz Dios: “Niapse por xtiidz Dios mban miech, yquiamband zho loxaque guielwagwse.”

⁵Blozh ga güeynie ma me Jerusalén, blep ma me glaa guic yadoo nroob ne zob lad guiedz co, ⁶rëb ma lo me:

—Telne nli Xpëéd Dios nac luu, bringaa nu, benque led znu zhobnee lo Xtiidz Dios: “Znabey Dios grë xanj1 me yquiaanap luu, zha queedz luu, zeena ni tib quie ycaand ni luu.”

⁷Pquiab me rëb me lo ma:

—Psoladz ganle, noque stib zaatne znu rnee lo Xtiidz Dios: “Bien, Dios nac men ne rnabey luu, nodne quitnie luu me gnab luu lo me ncuane nod gun me.”

⁸Blozh ga bii güeynie ma me glaa tib guic gui, ga blu ma grëse guiedz ne ndxie dib lo guidzliu lo me, ni blu ma grëse ncuaan ndaan ne rap tib tib guiedz co, ⁹rëb ma lo me:

—Bui ganle, grëse ncuaan qui gon gnedz naa lo luu telne squiitsgzh1b luu lo naa niina, gunnon luu naa.

¹⁰Hor co pquiab me rëb me lo ma:

—iBiche lo naa nu mendox! Znu gon zhobnee lo Xtiidz Dios: “Diosse nac men ne rnabey, mese none gunnon luu, lo me riegual yquitsgzh1b luu; ni mine rnabey me min co none gun luu.”

¹¹Dzigoraa biche ma lo me, dzigo bdziñ bla anj1 bdeed zho ncuane dow me.

Psilo Jesús pseed me miech nëz Galilé

(Mr. 1:14-15; Lc. 4:14-15)

¹²Zeene bin Jesús laa Juan biab ladzguiib, dzigo brieec me ga güey me nëz Galilé, guiedz ne lë Nazaret.

¹³Zhisaque goca, brieec me ga güey me Capernaum tib guiedz ne ndxie gax ro Nisdoo Galilé, zaatne nac xtan zha xtii Zabulón ni zha xtii Neftalí.

¹⁴Ga brieecquia mine bzeet Isá (men ne pxeel Dios padzeela biadnee xtiidz me), zeene psiaab Dios guic Isá rëb Isá:

¹⁵Grëse menzit ne ndxie xtan Galilé,

nëz dan ro guiubee Jordán, gax ro Nisdoo Galilé, zaatne gocchen Zabulón ni Neftalí;

¹⁶miech ne no lo ncow nac zho, per niina tib biini nroob biab lo zho.

Ladzniale guielgut no zho,

per laa biini co biab lo zho par greec zho ga.

¹⁷Ga psilo Jesús pseed me miech, rnee me lo zho csaan zho xquie1ntseeb zho, gbig zho lo Dios, sac laa dze ne csilo gnabey Dios ziaadgaxle.

Bredz Jesús tap ngoozme1

(Mr. 1:16-20; Lc. 5:1-11)

¹⁸Len dze co, tib dze zieded Jesús gax ro Nisdoo Galilé gon me chop ngoozme1, tib zho lë Simón Pedr, stib zho lë Ndrés; grop bets zho lëetse laa zho noron guix ne rgaa me1 lo nis. ¹⁹Dzigo bredz me zho, rëb me lo zho:

—¡Goltè goltèna! zhits naa! ¡Laa naa cxel to tsie to stib gooz, tsietop to grè miech ne sèèb xnèz Dios!

²⁰Hor cogazh psan zho guiex ne rga a mel ga, laa zho ziana zhits me.

²¹Zhisaque bzè me ro nis co, gon me laa Jacob ni Juan (lèè grop xingan men ne lè Zebedé ga) no tib len barcw gza pxoz zho, noquiaabdie zho guiex ne rga a mel; dzigo bredz me zho. ²²Zigne bredz me zho bianañneque pxoz zho barcw ga, laa zho ziana zhits me.

Zèèb diidz grètaa milagr ne run Jesús

²³Dipse xtan zha Galilé, guiedz ne rdzintaa Jesús, rie me grè yadoo ne zob lad guiedz co rseed me miech Xtiidz Dios, rnee me lo zho zha racladz Dios gban zho, ni runguiac me grè men rzacnè, tel pe guielguiidztaa rzac zho.

²⁴Tel pa lotaaw zèèb diidz scataa run me grè milagr, haxta nèz Siria bin miecha. Nzian grè men co brie e ga bdzinnie zho grè zhimguidz zho lo me: no grè men rzacnè co noguitnie mendox, no zho rlan guielguidz gutye, no zho gutoo dipse xcuerp, no zho rlan grè pe stib guielguidz, nogaa zho rlan grè pe yoo b; grèse zho beenguiac me zho. ²⁵Zaatne zieetaa me, miech guizhiu ne na zhits me, grè zha Galilé, grè zha Decápolis, grè zha Jerusalén, grè zha Judé, haxta grè zha ne no stib nèz ro guiubee Jordán.

Cho nac zha ne wen zie

(Lc. 6:20-23)

5 Tib dzew, gon Jesús laa grè miech guizhiu co bdzin lo me, dzigo bzoquia me glaa tib guic gui win. Ga zob me, bdzin grè xpèèdscuel me lo me, ²dzigo psilo me pseed me zho, rèb me:

³—¡Wen zie zha ne rien ib none gbig zho lo Dios, sac ib dzin zho zaatne rnabey me!

⁴¡Wen zie zha ne mban rac roon niina, sac schoobladz Dios zdo zho!

⁵¡Wen zie zha ndooladz, zha ne zienie guic gban zigne rnabey Dios, sac scaania zho guidzliu ne gdeed me lo zho!

⁶¡Wen zie zha ne racladz gun grè mine rnabey Dios, rzac zhow zigne rzac zha ne rcaabedz, zha ne rnabga a zhis, sac ible zacnie Dios zho parne grieelo gun zhow!

⁷¡Wen zie zha ne rquia zdo miech, sac zigne rquia zdo zho samiech zho scaque Dios squia zdo me zho!

⁸¡Wen zie zha ne mbele zdo, zha ne biana mbele lo xtol, sac zanlo zho Dios!

⁹¡Wen zie zha ne noxco zaacse gban miech, til d zho, sac masaque mèèd gac zho lo Dios!

¹⁰¡Wen zie zha ne loxaque porne quiayun zho mine rnabey Dios, rquiana l miech zho, sac ible dzin zho zaatne rnabey me!

¹¹Zig nac to, zeene csilo grè miech yquiaago zho to, ctsidil zho to, yquiadiidzguizh zho to loxaque ne riladz to naa, ¡wen zie to ga! ¹²¡Nley golco zdo to, nguieel golgac, sac gon tib guielnzaac nroob ne gneedz Dios lo

to! Golsoladz ganle, scaque been zho grë zha ne pxeel me padzeela biadnee xtiidz me.

Nac to zig nac zed, zig nac biini

(Mr. 9:50; Lc. 14:34-35)

¹³Masaque nac to lo guidzliu rii zig nac zed. Nanle to ganle pa lotaa rquiin zed, per telne nzhida, ¿pa dien rquiina? ¡Lëë gdib rliaala lo quizh, zaatne rded rzë miech rzëëni zhow!

¹⁴Nac to zig tib biini ne noziini lo guidzliu. Grielod tsongueets to, sac tib guiedz ne ndxie glaa tib guic gui, grielod tsongueetsa. ¹⁵Golguien ganle nacd biini parne tsolana, sinque parne gziiniw lo grë miech ne no len yu. ¹⁶Zaacse sca golgac, mine rquiin min co golgun, masaque lëëw gac zig tib biini; zeena zeene gan miech biini co zien zho ganle pa lotaa men nroob nac Pxoze to men ne no gbaa.

¹⁷Guiabde to togo bod laa naa zial zialtichee naa ley ne psan Moisés, o grëgaa mine bnee zha ne biadteed xtiidz Dios padzeela; sac led mincod zial naa, sinque laa naa zial gun naaw zigne no gaca. ¹⁸Gneli naa lo to ganle: Laga niaa guidzliu rii, laga niaa gbaa, ib none gac mine zhobnee lo ley, mine bneegaa zha ne biadteed xtiidz Dios, ni tib lë paat gdzëëda. ¹⁹Gacxe waa zha ne quiits tib ley niicle mine mazdraa wina, ni cseed zho miecha zigne run zho ga, ib tedsod zha nac zha ne mazdraa win guiaan lo grë zha ne yгаа zaatne rnabey Dios. Sangue zha ne guna zigne rnabeya, ni cseed zho miech scaque tsienal zhow, zha cosi nroob gacnon zho lo grë zha ne gdzin zaatne rnabey Dios.

²⁰Rso naa diidz lo to sca, zaacse golgac gunde to zigne run grë maistr ley, grë zha farisé; sac telne tsoxcode to gban to zigne racladz Dios, grielod gdzin to zaatne rnabey me.

Nodne gut miech

(Lc. 12:57-59)

²¹Led nanle to ganle, no tib ley ne biaan lo xmengol to padzeela, rneew: “Gute luu samiech luu”; rnabeya zha ne gut samiech, ib none guetaque zho, quizhgazh zho dol co. ²²Sca rnee ley co, per zig nac zha ne gon në rac zdoo ran samiech, rriequia beetle zho ga, ye zho riegual quizh falt co. Zig nac zha ne gnee pe tib diidznë lo samiech, none gacredz zho lo wxtis zeena gunquizh zho zho dol co; zha ne quiegaa samiech, lëëque zha rguib guey zho gabil ga.

²³Gacxe waa tel ziesan to tib gon, per lo pcoogle zo to rsoladz to rdilnie to tib samiech to, ²⁴gase golsan gon co, goltsie goltsienabgazh perdon lo zha ne rlëë to lo ga, gbireraa to dzigo gdeed to gon co. ²⁵Zha ne sca rlëënie to, goltsoxco pront golguiaan wen; zeena tsiezod zho to lo wxtis, sac tel laa zho tsiezo to lo wxtis ib znabey wxtis tso to ladzguiib. ²⁶Gneli naa lo to ganle grieede to ga, haxtaque lozh quizh to grë dimi ne gnab wxtis lo to.

Nodne tsonie miech zha ne led tsiemeld zho

²⁷Nanlaque to ganle zha rnee stib ley ne biaan lo xmengol to, rneew: “Zha ne nole tsiel, zigtaa mguiw zigtaa wnaaw, nodne tsonie zho zha ne led tsiemeld zho.” ²⁸Per zig nac zha ne gon, ran tib wnaa ni rsilo zho riogui zho tsonie zho wnaa co, laa zho bdiitsle ley co.

²⁹Gacxe waa, bziaalo to mine rquiaqui runctal to xtol to, mazd golcueegazha; niicle tel bziaalo derech tow. Peet nacd nitlo tib leque xcuerp to, ledle dib nacesw tsietsobe gabil. ³⁰Laa tel niagaa tow, mine rquiaqui runctal to xtol to, niicle tel nia derech tow, golchuggazha. Peet nacd nitlo tib nia to, ledle nitlo to len gabil dib nace xcuerp to.

Nodne csëbtsieel miech

(Mt. 19:9; Mr. 10:11-12; Lc. 16:18)

³¹No stib ley znu rnee: “Mgui ne racladz csaan tsiel, zac ctso zho; totsaque gdeed zho tib guits lo wnaa, zaatne raquiet ne laa zho psaan wnaa.” ³²Per gni naa lo to ganle: telne quiangobd tsiel zho stib mgui, ni rsëbtsieel zho, leëque zha rguib ga yquianie tsiel zho stib mgui. Mgui ne ctsieelnia wnaa co, dol ga gun zho, sac gon nole tsiel wnaa co.

Nodne yquidie miech

³³Ziyon to ganle zha nac stib ley ne biaan lo xmengol to rneew: “Zha ne gzeet le Dios par glu zun zho mine bnee zho, yase zeene gdeed zho tib gona, gungaa zho pe tib dziina, ib none gun zhow.” ³⁴Per gni naa lo to ganle: nodne sca gzeet to le Dios, per ni gbaa nodne ne sca gzeet to, sac gon ga nac zaatne zob Dios; ³⁵per ni guidzliu, sac lo guidzliu nac zaatne zo ni me; per ni Jerusalén, sac ga nac guiedz nroob ne rnabey me; ³⁶guiaabgaa to gzeet to guic to. Gunscade to, sac gon zig nac guic to, per ni tib guitsguic to grielod csan nquits to, grielodgaa csan ngas tow. ³⁷Gacxe waa ncuane rgobey to zrieelo gun to, golguiab: “zun naaw”, togo riengaa to grieloda, golguiab: “grieloda”; tsode to dieen cho gzeet to, sac gon led Diosdraa rnabey min co.

Nodne ctsire miech guielnë

(Lc. 6:27-36)

³⁸No stib ley znu rnee: “Tel cuee zho tib bziaalo luu, guiaand luu scase bleeque stib bziaalo zho, tel cueegaa zho tib lay luu, scaque been blee stib lay zho.” ³⁹Sanguue naa laa naa rso diidz lo to gon, gunscade to; zha ne gacntseeb lo to, gacndaande to lo zho. Tel cap zho lo to, tiblise golgac, ib gunde to glisague nia to.

⁴⁰Zha ne tsiezo to lo wxtis, ni lozh ga haxta gla zho xibiaagw to, golsaan güey zhow haxta xabnal to goldeed lo zho. ⁴¹Zeene griequia zha ne gnabey to güey to xyo zho tib gro hor, golgüeya, haxta tib hor goltsie güey tow. ⁴²Zha

ne gnabtaa pe cos lo to, goldeeda; zig nac zha ne ziadtiin, goldeed ncuuane ziadtiin zho, ctsirede to zho scase.

⁴³ 'Ziyonle to ganle no zha ne znu rnee: "Zha ne rdzieel xtiidz luu bleyinie zho, scagaa zha ne rlëë lo luu, blëënie zho." ⁴⁴ Per led scada gon, inone zaacse gac to lo zha ne rlëë lo to! ;Zha ne rgodee to, golnab lo Dios gunlay me zho! ⁴⁵ Zeena sca glu nli xpëëd men ne zob gbaa nac to. Golgan ganle tel me rnabey me rziini ngbidz lo grëse miech, zigtaa lo zha wena, zigtagaa lo zha ntseeba; scaque nisguie me rsiaaba rquiin zho grëse zho, rbed me dien cho ngable lo me, chogaa ngabd lo me. ⁴⁶ ;Gase nasca golwi! Tel loxaque zha ne ndzieeldiidz to zha cose rleyinie to, ;niacxe zgaa to guielnzaac ne gdeed Dios? Haxta zha ne mazdraa ntseeb run min co. ⁴⁷ Tel loxaque zha ne nacse menlidz to, lo zha cose zaacse rnee to, ;pe lëë guielwen ga na rlu to? Haxta zha ne runbeyd Dios run min co. ⁴⁸ Goltsoxco sca ndzinli golgac, zigne rleyinie Pxoze to (men ne zob gbaa) grëse miech, scaque none gun to.

Zha ne run xyudar samiech

6 'Zeene gun to xyudar samiech to, ib gunde to zaatne ndxiepaa miech ga so to glu to xquielwen to, par gan zho mine run to. Telne sca gun to, ygaade to guielnzaac ne gdeed Pxoze to men ne zob gbaa. ² Gacxe waa, zeene gun to xyudar zha ne guiend pe yquiin, gooldide tow zigne run grë zha ne rquiaalo rquia zdoo samiech; sac zha co tel pe ncuuane rgad zho, rzo zho len yadoo, rzo zho ro nëz rlozhd yquiaabdzie zhow par gacnappaa miecha, zeena zha ne gona guiab zho: ;Zha wentaa zha qui! ;Gneli naa lo to ganle ne sca riannziuu zho lo miech, lëële gdib guielnzaac ne ygaa zho ga!

³ Golguien sca, zeene gun to xyudar zha ne no tib liaadz, choot lo gzodiidzde tow, per ni zha ne mazdraa ndzieeldiidz to nodne gacnaa. ⁴ Dzigo scagaa Pxoze to nroob guielnzaac ne gneedz me lo to, sac tel me grësew ran me.

Zha gzodiidznie miech Dios

(Lc. 11:2-4, 34-36; 12:22-31, 33-34; 16:13)

⁵ Scaque zeene gzodiidznie to me, gunde to zigne run grë zha ne rquiaalo miech wen nac zho. Sac tel zha co zeene rzodiidznie zho me, rzo zho zaatne ganpaa miech zho, zig nac len yadoo, zig nac len guiedz zaatne rded rzë miech. Gneli naa lo to ganle lëële guielnzaac ne ygaa zho ga. ⁶ Golguien zeene gzodiidznie to me, golsëëb len lidz to dziits golsioog ro yu, ga golzodiidznie me. Ible tedsod nroob guielnzaac gneedz me lo to, sac niicle ncuuane mazdraa nguëets zhliana, ran mew.

⁷ Ni zeene nozodiidznie to me, gunde to ncuuane nonee to lëëw rlozhd, lëëw rsilo zigne run grë zha ne runbeyd me. Sac zha co rzac zho por nroob diidz gnee zho, por nzian vuelt gnee zhow dzigo squiaadiag mew. ⁸ Gunscade to, sac me ne nac me Pxoze to gardle gnee to xliadz to lo me laa me nanle pe nac ncuuane rquiin to. ⁹ Gacxe waa zeene gzodiidznie to me, znu golnee:

Dios, luu ne nac luu Pxoze no, zob luu gbaa;

luuse nac men ne mazdraa ndzon.

¹⁰ Luu nac men ne gnabey no,
mine gnabeytaa luu zigne raca gbaa,
scaque none gaca lo guidzliu nu.

¹¹ Been guielnzaac bneedz ncuane dioow no nadze.

¹² Bzhiguiel been no perdon grese dol ne ziodziuuu no lo luu,
zigne rdziuuu no samiech no perdon gre falt ne run zho lo no.

¹³ Gdeete luu diidz yquuil mendox no,
been guielnzaac bla no lo ma.

Luu nac men ne rnabey, men ne rap poder, men ne mazdraa nroob.
Mine rnab no nu, ndionpaa no zun luuw.

¹⁴ Sca nagon none gnee to. Ni golgona ganle, zha ne gon gun samiech zho perdon tel pe nactaa falt ne been zho lo zho, scaque PxoZ to men ne zob gbaa, zun me zho perdon. ¹⁵ Zha ne gund samiech zho perdon, niicle megaa gund me perdon xtol zho.

¹⁶ Stiba, zeene nocuan to nozodiidznie to me, gunmbande to lo to. Sac gre zha ne rquiaalo miech wen nac zho, sca run zho; zeene nocuan zho xtsiinpaa run zho runmban zho lo zho par gan miech laa zho nocuan. Gneli naa lo to ganle, zha ne sca run leele guielnzaac ne yгаа zho ga. ¹⁷⁻¹⁸ Gunscaade to, nguiel golgac ine golzëe biegw guic to, golquiib lo to, zeena ni tib choot guiend laa to nocuan, loxaque PxoZ to gacnana, sac grese ncuane rac ngeets ran mew. Grese ncuane rac, me rana, me nac men ne gneedz tib guielnzaac nroob lo to.

¹⁹ Tsienalde to loxaque dien zha gapchen to lo guidzliu rii, sac nac ncuane lo guidzliu rii rban ngbaana, rnitlo mxila, haxta noxtseeb guioochena. ²⁰ Mazd goltsoxco yгаа to guielnzaac ndzon ne no gbaa, sac mine no gbaa, led yed min co guioochen, led yed min co cuan ngbaan, led yedgaaw gnitlo mxil. ²¹ Golgona ganle, guielnzaac ne gon gunlo to, ga glu pa gdzin xalm to, sac zaatne gunlo to guielnzaac co ga nac zaatne gdzin xalm to.

²² Rreequia nac bziaalo to zig nac tib biini. Telne niapse lo gre ncuane ndzinli rwi to, dzigo gdipse xcuerp to no lo guielbiini. ²³ Laa telne loxaque lo gre ncuane nonguield rwi to, dzigo gdipse xcuerp to no lo guielcow ga. iZha rnazhe lo guielcow co, tel leëque biini noyac guielcow!

²⁴ Golgona ganle, grieelod gon gleynie to dimi, ni gleynieque to Dios. Ib none telne Dios rleynie to, me none gleynie to, togo dimigaaw, dimi golleynie.

²⁵ Gacxe waa, gni naa lo to ganle: Tsoe to zhgab dien zha gban to lo guidzliu rii, pa griee pe gow to, pe guie to, pe gacwxabгаа to. Stiba, zniacxe mazdraa non guielwagw lo xquielmban to? Xabгаа tow, zniacxe mazdraa nona lo xcuerp to? ²⁶ Golwi lo gre mguin ganle, led yed ma rquia gon, led yed ma rquia wlaap, led yed ma rgotsow pe guielgon, per row ma, sac PxoZ to men ne zob gbaa, men co rdeed ncuane row ma. iTel to gon, mazdraa non to lo gre mguin co! ²⁷ Ni lalnu paat rquiinda tant tso to zhgab. Telne guiab to tso to zhgab dien zha gacnool xtse to spalal yeense, zniacxe zrieelo to gunnool tow?

²⁸'Zig nac lar, ¿pe nacne tant tso to zhgab dien pe gacwxab to? Pe rwide to lo grë guiee ne ganle zëëb dan, zha rrooba, led yeda rio zhgab dien zha gacwxaba, per niow rnaw; ²⁹gni naa lo to ganle, per ni rey Salomón con grë xab niazh me, blud me scataa niow.

³⁰Gase na ganle golwi, niicxe grë guiee dan co na, zna dze zob nguiaw, gzhe widz laaw bidzle, laaw tsecle, ni scataa niow rgacwxab Diosa, ¿pe lel to dzigo ygacwxabd me, niicle ne squi gard guien to dib zdoo to gnalo to me?

³¹'Tso de to zhgab sca guiab to: "¿Bay pa griee pe dioow ne, pa griee pe dio ne, pa griee pe dziaacwxab ne?" ³²Grë miech ne runbeyd Dios, tibaque zhgab co rio zho. Sangue to golsoladz ganle, PxoZ to men ne zob gbaa, nanle me pe nac grë xliaadz to, ³³me nac men ne gneedz ncuaane yquii to, per ib none glo tsoxco to gban to zigne rnabey me. ³⁴Golguien sca tso de to zhgab dien zha ted to gzhe widz, sac gzhe widz co zhaalaeque xco ne ziaad. Tib tib dze zhaase zhaase zhgab ne ziaadniew.

Nodne gzee zdoo ne cho zha rac

(Lc. 6:37-38, 41-42)

7 Blozh ga rëbchaa me lo zho:

—Golguien, ib gunde to në gac zdoo to zeene ran to ncuaan nonguield ne run stib miech, sac to tozhal gunquizh zhow; zeena scagaa Dios, gunscad me to. ²Sac gon tel zha rzac to samiech to, scasaque sac Dios to.

³¿Lëda ga gon tso to lozhd gzee zdoo to dien cho pe run, ni nenda mazdraa mine run to! ⁴¿Pe ro to glisqui to mine run stib zho, ni tel mazdraa nac mine run to? ⁵¿Golguien sca glude to ncuaane nacde to! Glo goltsoxco ndzinli gac to, dzigo lozh ga zac tsienee to lo stib zho zha gacndzinli zho.

⁶'Ndzon nac Xtiidz Dios, gdeete tow lo zha ne rlëeniew, sac gon rrieequia lo mëcw ga gdeed tow, ib zun zho mine run mëcw, zacttseeb zho lo to. Naca zig nac quie perl, gdeete tow lo zha ne rleynieda, sac gon rrieequia lo nguts ga gdeed tow, tel ngutsa niicle ncuaane mazdraa non glaal zho lo ma, loxaque gzeëni maw.

Ncuaane gnabtaa ne zgaa new

(Mr. 1:22; Lc. 6:31, 43-44, 47-49; 11:9-13; 13:24-27)

⁷Ncuaane rquii to, gollnaba lo Dios, scagaa me zneedz mew. Golguib tel pe racladz to, me nac men ne gacnie to gdziel tow. Golcuedzlë me, scagaa me scaania me to. ⁸Sac grëse zha ne rbig lo me rnab zho ncuaane rquii zho, rdeed mew. Zha ne rguib ncuaane racladz, racnie me zho rdziel zhow. Zha ne rbedzlë me, rcaania me zho.

⁹'Golwi ganle, zig nac to zeene rnab xpëed to quiet gow win, ¿niacxe ziazh to co to tib quie nia win? ¹⁰Zeene rnabгаа win mel, ¿niacxe zdeed to tib meel lo win? ¹¹Led rioxco to lëë niapse ncuaane wen rdeed to lo xpëed to, niicle ne miech ntseeb nac to. Telne sca rioxco to xpëed to, pelel PxoZ to dzigo, men ne zob gbaa, tsoxcod me to. Ib tedsod grëse zha ne gnab lo me gdeed me ncuaane rquii zho, zdeed mew.

12⁷Zha ne racladz ndzinli gac miech lo zho, none glo zho zaacse gac zho lo miech. Zigtaa ley ne psan̄ Moisésa, zigtagaa min̄e bnee gr̄e zha ne biadteed xtiidz Dios padzeelaw, sca rnabeya.

13-14⁷Goltsoxco sca tsienal̄ to min̄e rnabey Dios, niicle ne nac guielmban co zig nac zeene rz̄e ne tib n̄ez nia. Zhis zha ne rz̄ëb n̄ez co, per n̄ez co zgaa miech guielmban ndzon ne rdeed Dios. Sac gon̄ zha ne mban zigne notaa guic zho, rrieequia tib n̄ez nzhen ga zie zho; ndal miech ne zie n̄ez co, per n̄ez ne nitlo zho ga zie zho.

15⁷Nsin golso lo zha ne gacladz yquidie to gn̄e zho xtiidz Dios noteed zho, niicle ndooladz rlu zho pale cho gr̄e mëcwxiiil yeen̄, per zha ntseeba, masaque nac zho zig gr̄e coyot bl̄e. 16⁷Zigne run̄bey miech tib yag por nex ne rquia low, scaque wen wen gol̄wi zha nac ncuaañe run̄ zho, dzigo ga gun̄bey to cho nac zho. Sac gon̄ zig nac uv, rquiada lo yag guiets; niicle guigwgaaw rquiada lo gr̄e lb̄e guiets. 17⁷Tib tib yag nex rdeedsew xnexa. Tib yag wen, nex wen rquia low; scagaa yag ncuana, nex ncuana rquia low. 18⁷Griee lod yquia nex ncuana tib lo yag ne rquia nex wen, ni griee lodgaa yquia nex wen tib lo yag ncuana. 19⁷Gacxe waa gr̄e yag ne rquia nex ncuana, paat rquiinda, l̄ëe gdib rruga, rlozh ga rz̄ëg zhow. 20⁷Min̄ co nagon̄ rne naa lo to, zha ne sca guiaad, por ncuaañe run̄ zho ga gun̄bey to cho nac zho.

21⁷Gr̄e zha ne rnee noxco zho min̄e rnabey Dios, no zho lega rneesew. Nenda haxta rnee zho, naa nac men̄ ne rnabey zho, per gdziñd zho zaatne rnabey Pxoza naa. Sac zha ne nlipaa run̄ min̄e rnabey me, zha cose gdziñ ga. 22⁷Gāl̄ dze co, nzian zha ne grieequia gn̄e lo naa: “Conque rdziun̄bey no luu, blactaa name bio no bionee no Xtiidz luu lo miech, nzian milagr ne bdziun̄ no, haxta men̄dox bdziun̄cxoon̄ no zeene bzeet no l̄e luu.” 23⁷Niicle sca gn̄e zho, ib ycaaniad naa zho, son̄ez naa zho; sac ni lalnu beend̄ zho ncuaañe ndzinli.

24⁷Zha ne rquiaadiag min̄e rne naa, ni rioxco zho rban zhow zigne naca, rrieequia nac zho ga zig tib zha ndzielguic ne bzaa lidz zaatne nac tib lo quie. 25⁷Niicle riab guie dox per peet racd lidz zho, niicle rriee me dox, nis naal ne raclor ded zaatne zoba ga, per rbixcheda.

26⁷Laa gr̄e zha ne rquiaadiag xtidz naa, ni rioxcod zho gban zhow zigne naca, ziaad gac zho ga zig tib zha nxen ne güeyzoob lidz zaatne nac tib lo yuzh. 27⁷Znuse bnitlo lidz zho, sac zeene biab guie dox, lo me dox ne brie, lo nis naal ne goclo bded zaatne zoba, znuse bixchew, ni stib l̄ew biaand̄.

28⁷Zeene blozh bnee Jesús, gr̄e miech ne noquiaadiag ga, per nli rzee zdo zho gon̄ zho zha rseed me, 29⁷sac rlu men̄ rnabey nac me, led yed me rseed miech zig rseed gr̄e maistr ley.

Biac tib mgui ne rlan lepr

(Mr. 1:40-45; Lc. 5:12-16)

8 Laa Jesús ziad-z̄ëb cho gui win co, miech guizhiu ne nal̄ zhits me, 2⁷tibaque briequia tib mgui ne rlan guiedz dox ne l̄e lepr, wbig me pquiitsgzh̄ib me lo Jesús, r̄eb me:

—Tebaa siguieel luu gunguiac luu naa.

³Dzigo pxobnia Jesús guic mgui, rëb Jesús:

—Zunguiac naa luu. ¡Niinagazh laa luu guiaanmbe!

Hor cogazha laa grë guiedz co bnitlo. ⁴Dzigo rëbchaa Jesús lo me:

—Bina ganle, choot lo gzodiidzd luu gon zha biac luu; sinque güey lo pxoz güeyсан gon ne rieguial gdeed luu zigne rnabey ley ne psan Moisés, zeena gan zho ganle laa luu biacle.

Biac tib zha ne rquia dziin tib lo menguiib

(Lc. 7:1-10)

⁵Loxaque bdzin Jesús guiedz Capernaum, laa tib men ne rnabey lo xmenguiib zha Roma bdzinle lo me, rnab men co gunguiac Jesús tib zha ne quia xtsiin me, rëb me:

⁶—Been tib guieInzaac beenguiac tib zha ne rquia xtsin naa, laa zho nix lidz naa ib gacd grial zho, mban rac zho yoob dox ne rquia zho.

⁷Dzigo rëbchaa Jesús:

—Peet nacda, na së naa guio ne gunguiac naa zho.

⁸—Coo —rëb menguiib co—, rieguiald csodziin naa luu sëë luu haxta lidz naa. Nanpaa naa zrieelo luu nugazh gnabey luu guiac zho. ⁹Sac zig nac naa no zha ne rnabey lo naa, ni ron naa mine rnabey zho; scagaa tel guiep naa tib lo zhaguiib ne rnabey naa: “Güey nu”, rie zho; rnegaa naa: “Dë nu”, riaad zho; zha ne runгаа dziin lo naaw, mine rnabeytaa naa zho, run zhow. Scaque luu nagon nappaa naa zrieelo sca gnabey luu guiac xmoz naa.

¹⁰Zeene gon Jesús sca rnee men co, rley me, rëb me lo grë zha ne zianal zhits me ga:

—Lo grë zha Israel, gard gon gan naa tib zha ne squitaa dib zdoo rnal Dios.

¹¹Ni golquiaadiaga ganle, zdzin dze grële zha zit ne squi gnalo Dios, zha co ygaa sobnie Abraham, sobnie Isaac ni Jacob zaatne rnabey Dios. ¹²Laa grë zha Israel, niicle nac zho zha ne nac diidz gdzin ga, lel lo ncow nëz ley guiaan zho, ga tso zho goonnë zho, haxta gow lay zho lo guieInë dox co.

¹³Blozh ga rëbchaa me lo menguiib co:

—Bzë nasca, gocnan ganle zigne bliladzse luu guiac xmoz luu, sca gaca.

Hor cogazha laa moz co biac.

Biac xniadzoop Pedr

(Mr. 1:29-34; Lc. 4:38-41)

¹⁴Laa zeene bdzin Jesús lidz Pedr, gon me laa xniadzoop Pedr nix rlan xlëë.

¹⁵Dzigo bded me zaatne nix zhuz co, zigne bzhen me nia zhuz laa xlëë co blëz. Hor cogazh guche zhuz beenlo zhuz ncuane dow zho.

¹⁶Ziedzele dzew, laa ngbidz rzëëblew, zeene bdzin grë miech co, nzian grë zha ne nosacsi mendox bdzinne zho lo me. Grëse zho beenguiac me, goctox me lo grë mendox ne nosacsi zho ga, bencxoon me ma; ni zha ne rlangaa pe stib guielguidz, grëse zho beenguiac me. ¹⁷Ga brieequia mine bzeet Isá, men

ne biadteed xtiidz Dios lo miech padzeela, zeene rëb me: “Grëse xquieInë ne, grëse guieIguidz ne rziaac ne, me biw.”

Zha ne racladz sëëb xnëz Jesús

(Mr. 4:35-41; Lc. 8:22-25; 9:57-62)

¹⁸ Zeene gon Jesús scataa ndal miech ne goclo lo me ga, dzigo bnabey me xpëëdsuel me gzhixcuaa zho, sac laa zho no tedquia stib nëz ro nisdoo co.

¹⁹ Dzigo wbig tib men ne nac maistr ley lo me, rëb maistr co:

—Zaatne tsietaa luu gon, sënal naa zhits luu.

²⁰ Dzigo rëbchaa me:

—Gocnana ganle, naa ne nac naa Mgui ne pxeel Dios, peet rapd naa nu, mazd zig nac grë mëz, grë mguin, rap ma zhibliee ma, rap ma zhiptsieez ma; per naa per ni zaatne gaguies naa quianied naa.

²¹ Wbigaque stib zha ne rzënalIe zhits me, rëb zho:

—Ye naa gon sënal naa zhits luu, per bzhiguieI bneedz diidzbey cuëz naa gangazh naa tsoliu pxoz naa.

²² Pquiab me rëb me:

—Dënal zhits naa. Psaan, nzian grë zha gut no, tsow tsiequeets zho samengut zho.

²³ Dzigo laa me bzëëbnie xpëëdsuel me tib len barcw, laa zho zie. ²⁴⁻²⁵ Laa zho zie lo nis co, tibaque zeene psilo brieë tib me dox, masaque rlis me lo nis co, laaw psilo rzëëb len barcw. Dzigo lëëIëd güey zho güeycuaan zho me, sac lëëtaque nixguies me.

—Ligier ganle —rëb zho—, blee mcaal lo luu. ¡Bui ganle laa ne nitlo lo nis rii, csaand luu guet ne nu!

²⁶ Dzigo rëbchaa me lo zho:

—¿Pe nacne squitaa rdzieb to? ¡Gardaque dzigo lëë gliladz to cho nac naa! Dzigo guche me, bnee me lo me co, bnee me lo nis co cuedzew. Hor cogazha blëz me co, niicle nis cow laaw bredze. ²⁷ Zeene gon zhow, bzee zdoo zho.

—Bay chozhe waa nac men rii —rnee zho—. ¿Zha nac ne haxta me, haxta nis ron xtiidz me?

Men Gadar ne nosacsi mendox

(Mr. 5:1-20; Lc. 8:26-39)

²⁸ Laa zho bdzindze stib nëz ro nisdoo co, zaatne nac xtan zha Gadar, zeene brieëquia chop mgui ne nosacsi mendox, bdzin lo Jesús ga. Zha ntseeba, rdzieb miech zho, choot rdete nëz co. Len baa brieë grop mgui co bdzin zho ga, ²⁹ nguedz roptsie zho rnee zho:

—¡Peet gund luu no Jesús, psaan no! Rdziunbey no luu, Xpëëd Dios nac luu. Ne nligaa been guieInzaac csacsid luu no niinaga.

³⁰⁻³¹ Zitlaaque ga ndxie tib dzoon nguts notop lag, dzigo bnab grë mendox co lo Jesús rëb ma:

—Telne cuee luu no nu, bzhiguieI bneedz diidz lose grë nguts qui gdziin no.

³²—Niinaga sca goltsie —rëb me.

Zigne psaan mēdox co grop mgui co, güey ma bdziñ ma lo grē nguts co. Hor co psilo grē nguts co, rquiaa ma corr güeypix ma tib ro yee dox ne quia ro nisdoo co, bliaaḷ ma lo nis, grēse ma gut.

³³Zha ne quianap grē nguts co, gzase zho bzhoon. Güey zho lad guiedz güeyzodiidz zho zha goc ma, ni bzodiidz zho zha biac grop mgui ne nosacsi mēdox ga. ³⁴Grēse miech co, brieē zho zieso zho. Zeēne bdziñ zho goñ zho laa Jesús zo ga, dzigo bnab zho lo me siguiel me gbi me xtan zho.

Biac tib meñ ne gutoo

(Mr. 2:1-12; Lc. 5:17-26)

9 Dzigo wbiireque bzëeb zho leñ barcw, bdziñ zho guiedz Capernaum stib, sac ga nac zaatne rëbēz Jesús leñ dze co. ²Zhisaque goc bdziñ me, laa zho bdziñniele tib meñ rzacne lo me, dipse meñ co gutoo, ib gacd sē me. Lo yag zhoob me bdziñnie zho me ga.

Zeēne goñ Jesús dib zdoo grē zha co rnalo zho ne me gunguiac meñ rzacne co, rëbchaa me lo meñ rzacne co:

—iNley bloo zdoo luu xin! iLaa naa benle perdon grēse xtol luu!

³Ga zob blalaa maistr ley, zeēne goñ zho sca bnee me, bza zdoo zho rëb zho: “iQuiaguitnie meñ qui Dios goñ squi rzē xtiidz me!” ⁴Biēnga Jesús sca rza zdoo zho, dzigo rëbchaa me:

—Lëda i goñ squi rza zdoo to. ⁵Nli ngānda guiab ne lo miech: “Laa naa benle perdon grēse xtol luu”; per grielod lega guiab ne laa ne gunguiac zho. ⁶Gacnan to sca ganle naa ne nac naa Mgui ne pxeel Dios, ible rap naa poder par gun naa miech perdon.

Dzigo rëbchaa me lo meñ rzacne co:

—iNiinagazh guche i, bi yag ne bzhoob luu i, zeēn bzë!

⁷Zigne sca bnee me, laa mgui co bzoli, laa me zey. ⁸Grē miech guizhiu ne ndxie ga, zeēne goñ zho sca beēnguiac me mgui co, bdzieb zho. Psilo zho rdeed zho xquizh lo Dios, scataa poder ne bdeed Dios lo me.

Bredz Jesús Matew

(Mr. 2:13-17; Lc. 5:27-32)

⁹Blozh ga laa Jesús brieē ga. Ro nēz zieded me goñ me tib meñ lë Matew, lëētaque laa meñ co zob lo mezh zaatne razh dimi ne rey lo zha Roma; sac me rcaania dimi co. Dzigo bredz Jesús me tsienal me zhits Jesús. Ga guso me, laa me zienal.

¹⁰Bded ga güeynie me Jesús tib wagw lidz me. Grē zha ne rcaania dimi ne razh lo zha Roma, grē zha ne zëeb diidz nac zha ntseeb, tipse brenie Jesús zho grē xpëēdscuel me.

¹¹Blalaa zha farisé, goñ zho sca tipse zobnie me grē zha co, bded ga, rëbchaa zho lo xpëēdscuel me:

—¡Mod scataa na rownie xmaistr to grë zha ngoopdoĭ, grë zha beed ne nac recaudador!

¹²Bin Jesús sca quianee zho, dzigo rëbchaa me lo zho:

—Nanĭe to ganĭe, zha ne ruĭ rmed, zaatne no zha rzacnë ga rquiin zho, ĩniacxe squiin zho zaatne no zha ne ndip ndaan? ¹³Golsoladz ganĭe znu rnee Dios: “Laa naa racladz gacndooladz miech, yquia zdoo zho samiech zho, racladzaxe naa waa guiaad zho dieenĭ peraa guiaadlogon zho lo naa.” Mazd ganĭe goĭtsie, tsow goĭsob goĭguienĭ dienĭ zha nacne sca rnee me. Teĭ naa, zialĭguibd naa miech wen, sinque laa naa zialĭguib grë zha ngoopdoĭ.

¿Pe nacne rcuand xpëëdsuel Jesús?

(Mr. 2:18-22; Lc. 5:33-39)

¹⁴Bdzinaque xpëëdsuel Juan Bautist, bnabdiidz zho lo Jesús, rëb zho:

—¿Pe nac waa ib rcuand xpëëdsuel luu? Ni no grë no zha farisé, zhiga zhiga laa no rcuanle.

¹⁵Pquiab me rëb me lo zho:

—Zaatne nadienĭ noyac tib guieĭtsieel, ĩpe niacxe lega csilo grë zha ne ndxie lo lni tso zho guieĭnë, ycuan zho, ni ranĭ zho laa mgui ne notsieelnia zo lo zho? Per zdziĭ dze zeene laa mgui co gbiche, ni zeene laa dze co gdziĭ, dzigosi nagonĭ rieguiāl tso zho guieĭnë, rieguiāl ycuan zho.

¹⁶Ranĭe to ganĭe, zha ne rquiaabdie tib lë lar, yquiaad zho lar cub lad lar gox, sac zha ne sca gunĭ paat yquiind wquiaabdie co. Zeene laa lar cub gbe, lëëque lëëw gunnat zaatne nriez lar gox. ¹⁷Scaque tsod zha ne cotsow vin cub tib lenĭ guid ne padzeela noquiin, sac stsiez nziu cuba; dzigo niicle guid cow, niicle nziugaaw laaw nitlo ga. Gacxe, teĭ nziu cuba none lenĭ guid cubaque tsotsowa.

Brieban tib mëdwnaa yeen

(Mr. 5:21-43; Lc. 8:40-56)

¹⁸Lëëtaque sca quianee Jesús lo xpëëdsuel Juan Bautist, zeene bdziĭ tib mgui ne nac zha non yadoo. Zigne bdziĭ me pquiitsgzhib me lo Jesús, rëb me:

—Beenĭ tib guieĭlnzaac së luu guio ne lidz naa. Laa tib xpëdwnaa naa blozh niina, per nanpaa naa teĭne cxobnia luu guic win, zbeeban luu win.

¹⁹Dzigo bio Jesús nëz zienāl me zhits menĭ co, gza xpëëdsuel me. ²⁰Lad grë miech ne zienāl ga, lad co no tib menĭ wnaa, gocle tsiipchop iz rlan me tib guieĭguidz, rzac me zigne rzac grë menĭ wnaa gzob mëë, tibaque rlan mew ib rbëzda.

Ga zie me, zeene wbig me nëz zhits Jesús, bzhenĭ me ro lar ne mbix Jesús, ²¹sac tibaque güeynie guic me, ziac me totsaque ygaa xab Jesús nia me. ²²Dzigo wbire lo Jesús, dze bui Jesús lo me.

—Xin —rëb Jesús—, peet tsienied guic luu. Laa luu biac sacne bliladz luu naa.

Gataa laa wnaa co biac lo guieĭguidz co.

²³Laa zeene bdziñ Jesús lidz meñ rnabey co, laa zha ne rool ndxiele, noquiaa zho grë di ne rac lo ngutoo, grëraa zha ne ndxie ga, nguiedz zëeb tsi zho roon zho, tib ruid ne rac. ²⁴Dzigo rëbchaa me lo zho:

—Golriee nëz ley, sac gon gute mëed qui, nixguesse win.

Zha ne rlëë, zha ne rzhidzniegaa me, laa zho brieey ley. ²⁵Dzigo laa me bzëeb leñ yu zaatne nix mëed co, bzheñ me nia win. ¡Hor cogazha laa win guche!

²⁶Grëse guiedz ne ndxie dib gax ga, gocnan miech scataa milagr nroob ne been me, bleeban me mëed co.

Biac chop zha ne rold lo ni tib zha ngop

²⁷Zeene laa Jesús wbi ga, nëz zie me brienañ chop zha ne rold lo zhits me, nguiedz rbedz zho rnee zho:

—¡Jesús, xingan David, pquia zdoo no!

²⁸Bdziñ Jesús yu ne rbëz me, laa zho wbig lo me. Dzigo rëbchaa me lo zho:

—¿Dib zdoo to dzigo lëë rliladz to zrieelo gunguiac naa to?

—Dib zdoo now —rëb zho.

²⁹Dzigo pquiaania me zhits bziaalo zho, ni rëb me:

—Mine bliladz to i nasca, laaw gac niina zigne bliladz tow.

³⁰¡Hor cogazha laa lo grop zha co biac!

Dzigo pso Jesús diidz lo zho choot lo gzodiidzd zho zha biac zho, ³¹ni zigne brieey zho ga, laa zho bzodiidzlew. Blozh ga, grëse guiedz ne ndxie dib gax ga, gocnan miech scataa nac milagr ne run me.

³²Loxaque wbi grop zha ne biac lo ga, laa bla zho bdziñlaque, bdziñnie zho tib meñ ne nosacsi mendox, psanngop ma meñ co. ³³Dzigo bençxoon Jesús mendox co, zeene laa ma bzhoon laa meñ co psilo bnee. Grë miech guizhiu ne ndxie ga, per nli rzee zdoo zho, rnee zho:

—¡Wlaltaa gard dziañ ne tib meñ ne squitaa gun grë milagr qui!

³⁴Laa grë zha farisé rnee:

—Ma ne rnabey lo mendox nacie meñ qui, gane rrieelo runçxoon me mendox.

³⁵Grëse guiedz ne ndxie gax ga, zigtaa guiedz nrooba, zigtagaa guiedz lasa rie Jesús rieseey me miech. Zaatne rdziñtaa me, rie me xyadoo zho rnee me lo zho zha racladz Dios gban zho, ni runguiac me zho tel pe nactaa guielguidz ne rzac zho.

³⁶Zeene ran me grë miech guizhiu ne rcaalsa lo me, rquia zdoo me zho, sac ran me mban rac zho guiend cho tib zha ne gacie zho, rac zho zig grë mëcwxiiil yeen ne guiend xbaxtor.

³⁷⁻³⁸Tib vuelt haxta rëb me lo xpëedscuel me:

—Golnab lo Dios cxeelraa me zha ne gun xtsiin me. Golwi ganle pe zhidaa grë miech qui, quiambëz zho dien cho gnee Xtiidz Dios lo zho. Masaque nac zho niina, zig tib guielgon ne golle gliiap.

Bzo Jesús zha ne tsienee xtiidz me

(Mr. 3:13-19; Lc. 6:12-16)

10 Blozhse sca bnee Jesús, dzigo bredz me gza tsiipchop zha ne nac xpëédscuel me ga, bzo me zho tsienee zho Xtiidz Dios lo miech, bdeed me poder lo zho gũncxoon zho mēndox zaatne nosacsi ma miech, ni gunguiac zho grē meñ rzacñē.

²⁻⁴Znu lē gza tsiipchop zha co:

Simón (zha ne rneeque zho Pedr),

Ndrés (bets Simón),

Jacob ni Juan (zha co nac xingan Zebedé),

Lip,

Bartol,

Mazh,

Matew (zha ne ptop dimi ne razh lo zha Roma),

Jacob (xingan Alfé),

Lebeo (zha ne rneeque zho Tadé),

Simón (zha ne no lo partid ne racladz griee zha Roma Israel),

ni Judas Iscariot (zha ne güeyto Jesús).

Pxeel Jesús zha ne tsienee xtiidz me

(Mr. 6:7-13; Lc. 9:1-6)

⁵Blozhse ga, pso me diidz lo zho zha tsie zho, rēb me lo zho:

—Nanle to nagon, tsiede to zaatne no grē zha ne nacd zha Israel, niicle sēēbde to grē guiedz ne ndxie xtan zha Samar. ⁶Zaatne no grē zha Israel, gase goltsie; lēē grē mēcwxiil ne nonziaab ga.

⁷Goltsie, goltsienee lo zho gacnan zho ganle laa dze ziaadgaxle zeene laa Dios csilo gnabey.

⁸Grēse zha ne rzacñē, golgunguiac zho; zha ne rlan guiedz lepr, golsanmbe zho; zaatne nix zha ne gutle, golcueeban zho; grē zha ne nosacsi mēndox, golguncxoon ma. Peet gnabde to lo miech, golguien ganle lega bnedz naa poder qui lo to, bzhiide tow.

⁹⁻¹⁰Peet güeyde to, xab tow, lab tow, minē nacwse to, minē quiase ni to, mincose goltsienie. Güeyde to dimi, per ni tib quiet güeyde to; sac zaatne tsiegun to dziin rii, ib ga none gneedz zho ncuaañe gow to.

¹¹Guiedz ne gdziñtaa to, golguib dien pa lo no tib zha ne ndzinli, dzigo lidz zha co goltsiebēz, haxta gza dze ne laa to gbi guiedz co. ¹²Zeene noguib to pa cuēz to, yu ne tsie to, zaacse golgac, golquiaabdiuzh zha ne no yu co, ¹³golnab gunlay Dios zho. Telne wen gac zho lo to, zunlay me zho, togo guncasdgaa zho to, dzigo toque gunlay me. ¹⁴Zha ne sca siguield ycaania to, golrieegazh lidz zho; guiedz ne siguield zho yquiaadiag zho minē nonee to, golbigazh guiedz co; gollit grē yudie co ni to, gollu lo zho ganle led xtoldraa to ga tel laa zho nitlo. ¹⁵Gneli naa lo to ganle zeene gal dze ne laa Dios gun xquielwxtis me,

bii lëëtaa gac guielnë ne yгаа grë miech ne bio guiedz Sodom, guiedz Gomorr, lëdle guielnë ro ne yгаа grë miech ne sca siguield ycaania to.

¹⁶'Nsin golso, golguien ganle rrieequia tib mëcwxiiil yeense nac to, ni laa naa rxel to zaatne no grë coyot dox. Ndooladz golgac, niowse golgac lo miech zig rac grë palom, per scagaa con cuidad goltsie, golgan ganle zha rzë meel.

¹⁷Nligaa nsin golso, sac gon ib ziezo miech to lo wxtis, ni lëëque len yadoo ga quin zho to, ¹⁸haxta ziezo zho to lo grëraa zha nroob ne rnabey. Laa zho gūna, loxaque ne nac to zha ne no xnëz naa, ni gagaa nagon gdeeda diidz gnee to xtidz naa lo grë zha co, ni lo grëragaa miech ne nacd zha Israel.

¹⁹'Zeene sca tsiezo zho to lo grë zha rnabey co, tsode to zhgab dien pe gnee to, dien zhagaa gnee tow; sac zeene sca tsiegala, Dios gneedz diidz ne gnee to.

²⁰Led tod gnee, sinque, izhiEspiritu PxoZ to men ne zob gbaa, men co gnee ga!

²¹'Zlëëniedox miech zha ne no xnëz naa. Zio zha ne lëëque bets zho, zha ne lëëque pxoz zho, zha ne lëëque xpëed zho ctsidil zho, tsielo zho zho ladznia zha ne gut zho. ²²Tel to, guiets yag gan miech to, per telne dziits so to tel pe nactaa lo guielnë ne ted to, ib zgaa to tib guielmban ndzon ne gdzindraa dze lozh. ²³Guiedz ne no to, zeene laa miech csilo yquiaana to, golree ga, goltsie stib guiedz. Gneli naa lo to ganle, niicle stib guiedz stib guiedz tsie to, gardaque lozh tsieted to grë guiedz ne ndxie Israel zeene gal dze ne laa Mgui ne pxeel Dios guiaad stib.

²⁴'Golwi ganle zha ne nac mëedscuel, tsod zha ne ndziibraa non lo maistr, zha ne rquiagaa dziin, tsod zha ne nonraa lo zha ne rree zho. ²⁵Tel zha gun miech maistr, scaque gun zho mëedscuel; tel pe cteed zho bizhuan dziin, mincoque cteed zho zha ne quia dziin. Gacxe waa peet tsienied guic to, tel pe nactaa ncuane gnee miech to, sac gon niicxe naa name ne nac naa Dad, mendox rnee zho nac naa.

²⁶'Gdziebde to, dzdin dze ne glu ganle cho ziana mine nac diidzli, chogaa ziana guielntseeb, gal dze co grësew xoobnen.

²⁷'Grëse mine rne naa lo to zeene nese rziodiidza, golneew lo miech, haxta glaa guic yu golso, nguiedz golneew. ²⁸Gdziebde to miech, golguien ganle no tib men nroobraa, lëë men co nac Dios. Tel miecha, loxaque cuerpse zrieelo zho csacsi zho, sangue Dios, zrieelo me gnitlo me miech dib xcuerp zho, dib xalm zho len gabil.

²⁹'Nligaa gdziebde to, csaand Dios lega pe gac to. Golwi ganle, zig nac grë mguin niicle ne rzac miech peet nond ma, haxta chop ma rdeed zho por tib gaay centav; per PxoZ to gon men ne zob gbaa rsaanladzd me ma, ni tib ma guete telne gdeete me diidz. ³⁰Pelel to dzigo csaan me, haxta guits guic tow, grësew ngaba lo me. ³¹Gdziebde to sca, golguien ganle nonraa to lo tib dzoon mguin.

³²'Gneli naa lo to ganle, zha ne glu lo miech nacie zho naa, scaque naa zeen gal dze co zlu naa lo PxoZ naa men ne zob gbaa, nacie naa zho. ³³Sangue zha ne ctoladznie naa lo miech, scaque naa ziep naa lo me runbeyd naa zho.

³⁴¡Guiabde to togo laa naa zial̄ loxaque par cuiñ wense miech! Lēda gon̄, ye zial̄ naa zial̄gunctil̄ naa zho. ³⁵Sac zha ne sēeb xnēz naa, zlēenie xpēed zho zho, tel̄ mēēdgaaw, zlēenie pxoz zho zho; scaque men̄ wnaaw, zlēenie xinzhizh zho zho, zha ne nacгаа nguzhizha, zlēenie xniaa tseel zho zho. ³⁶¡Lēēque men̄lidz miech gac zha ne glēē gan̄ zho!

³⁷Zha ne mazdraa rquia zdoo glēenie pxoz zho zho, glēenie xniaa zho zho, glēeniegaa xpēed zho zho, porne gun̄ zho min̄e rnabey naa, peet xtsiind̄ zha co par ygab zho xnēz naa. ³⁸Scaque zha ne yquia zdoo cueeladz zho zho guiaadnal̄ zho zhits naa, grielod ygab zho lo naa. ³⁹Sac grēse zha ne rquia zdoo guiel̄mban ne rap zho lo guidzliu rii, ygaad zho guiel̄mban ndzon ne gneedz Dios; sangue zha ne cueeladz xquiel̄mban, niicle tel̄ csacsi miech zho loxaque ne no zho xnēz naa, ib zgaa zho guiel̄mban ndzon co.

⁴⁰Niina gon̄ ne squi tsie to, grēse zha ne zaacse ycaania to, zaacse gnee zho lo to, rrieequia naa ga sca ycaania zho; ni zha ne sca ycaania naa, rrieequia men̄ ne pxeelle naa ga sca ycaania zho. ⁴¹Zha ne cuēzlo tib men̄ ne noteed xtiidz Dios lo miech, guiel̄nzaac ne gdeed Dios lo men̄ co, ye zho yгаа guiel̄nzaac co. Zha ne cuēzlo tib miech ndzinli, guiel̄nzaac ne gdeed Dios lo zha co, ye zho ygaaw. ⁴²Ni zha ne gneedz maase tib zhigaque nis yag lo cho tib zha win ne nac to ne nac to xpēedscuel naa, ib tedsod zdeed Dios guiel̄nzaac ne tsieguial̄ zho.

Zha ne pxeel̄ Juan Bautist

(Lc. 7:18-35)

11 Zeene blozh pso Jesús diidz lo gza tsiipchop zha co, dzigo laa zho zie. Blozh ga laa me brieaque, güey me grē guiedz ne ndxie gax ga, güeyseed me grē miech co.

²⁻³Len̄ dze co no Juan Bautist ladzguiib, ga no Juan bin Juan zha nactaa grē milagr ne run̄ Jesús, dzigo pxeel̄ Juan bla xpēedscuel Juan güeynabdiidz zho lo me, dien̄ pe lēēle Men̄ ne zēēble diidz cxeel̄ Dios lo guidzliu ga nac me, te dzigoraa gdzin̄ men̄ co ye. ⁴Dzigo rēbchaa me lo zho:

—Grē ncuaañe bin to rne naa, grēgaa ncuaañe gon̄ to run̄ naa, gol̄tsie gol̄zodiidza lo Juan. ⁵Ran̄ to gan̄le grē zha ne rold̄ lo, grē zha ne gacd sē, grē zha ne rlan guiedz lepr, grē zha ne rcuaat, laa zho riac; haxta grē zha ne gutle, laa zho rrieeban. Xtiidz Diosa, laaw quiagaaz lo grēse zha ne rquiina. Grēsew, gol̄zodiidza. ⁶Ni gol̄guiab lo me, dichos zha ne racchopd guic, sinque tiblrique rac zho rliladz zho cho nac naa.

⁷⁻⁸Zeene laa xpēedscuel Juan zey, dzigo psilo me bzeet me Juan lo miech guizhiu ne ndxie lo me ga, rēb me:

—Zeene güey to dan ngan co, güey to lo Juan, ¿zha dien̄ güeynie guic to nian̄ to me? ¿Pe rēb to rlu me zig tib goobgui ne nēzrii nēzrec rey me, te rēb to ye masaque grē lar niazh ne racw zha non nacw me? Per nan̄le to gan̄le, zha ne scataa racwxab riord zho dan. ⁹Nligaa cho dien̄ güeynie guic to nac me, ¿te rēb to ye tib men̄ ne noteed xtiidz Diosa? Gacnan̄ to gan̄le tib men̄

ne noteed xtiidz Dios gon nac me, ni me nac tib zha ne mazdraa nroob lo grë zha ne ziyun dziin co. ¹⁰Me ga raquiet lo Xtiidz Dios zaatne znu rnee:

Sxel naa tib zha ne tednerga lo luu,
zha co gzhixcuua nëz ne ted luu.

¹¹Ne nligaa, lo grëse mgui ne zieded lo guidzliu gard grieequia tib zha ne mazdraa non lo Juan Bautist; per zha ne gon winraa zaatne rnabey Dios, nonraa zha co lo me.

¹²'Desde psilo Juan noseed me miech zhapaa racladz Dios gban zho, ni rchoobnis me zho, hor co psiloque brieequia zha ne rlëenie zhiwseed Dios, gacxe waa zha ne nlipaa rdziebd, zha cose rcaaniaw, rzëëb zho xnëz me.

¹³Mazd glo tibaque raquiet ne laa men ne cxeel Dios ga guiaad, zigtaa lo leya, zigtagaa grë zha ne biadteed xtiidz Diosa, bzeet zhow. Ni niina ne laa Juan biaad, laa men co blanso. ¹⁴Juan gon biaad niina zig no diidz guiaad Lí; golgacnan sca ganle cho nac me. ¹⁵Zha ne racladz guien zho zha nac grë mine none naa nu, ¡yquiaadiag zhow!

¹⁶⁻¹⁷'Nac grë miech rii, riend zho pe racladz zho. ¿Cho ganle run zig run zho? Lëë zho run mine run mëëdlas ne rio wguit ro nëz, niicle rool xcompañer win di nguieel rreed win, niicle roolga zho di ngan, roond win. ¹⁸Sac gon biaad Juan, ran zho rowd me tel pe ncuuane row zho, ried me ncuuane rie zho, dzigo laa zho rnee mendox nacnie me. ¹⁹Blozh ga ziaad Mgui ne pxeel Dios, ran zho row me, rie me, laa zho rneeque, lega rowcho me, lega riecho me, ib riend me cho rtsieelsa me, haxta grë zha ngoopdol, haxta grë zha yozh ne rtop dimi ne razh lo zha Roma rzënie me. Sca rnee zho, sangue zha ne rgaa guielbiini ne rdeed Dios, rien zho cho nac zha ne ziaadgun xtsiin me.

Miech ne bzhiguield ncaania xtiidz Jesús

(Lc. 10:13-15, 21-22)

²⁰Blozhse ga, dzigo psilo Jesús bzeet me mine ygaa grë zha ne pcaaniad xtiidz me; sac nzian guiedz ne güey me niicle gon zho grëtaa milagr ne been me, per ib psaand zho xquieIntseeb zho, rëb me:

²¹—¡Probsaxe grë men guiedz Corazín, grë men guiedz Betsaid! Sac gon gonpaa zho grë poder ne rap Dios, per ib psaand zho xquieIntseeb zho. Tel niaca mine nian grë men guiedz Tiro, grë men guiedz Sidón, grë milagr ne gon zho ben naa, ib ndedsod mban niac grë zha co nio zho guielné, zëëb nsaan zho xquieIntseeb zho, mbig zho lo Dios. ²²Gacnan zha Corazín, gacnan zha Betsaid sca ganle, gal dze ne gun Dios guielwxtis, lëëtaa caxtigw ne ygaa zha Tiro ni zha Sidón, mazdraa mine ygaa zho.

²³'Scaque zha Capernaum, masaque rzac zho niina zha nziuuraa lo Dios, per gacnan zho ganle haxta guiet lo ncowdoo ne guey mendox ga guey zho; sac gon tel niaca mine nian zha Sodom grë milagr ne ran zho noyun naa, ible nsaan zha co xquieIntseeb zho, nitlod zho. ²⁴¡Gacnan zha Capernaum ganle, gal dze ne gun Dios guielwxtis, lëëtaa caxtigw ne ygaa zha Sodom, mazdraa mine ygaa zho!

²⁵Dzigo bzodiidznie Jesús Dios, rëb me:

—Dios luu ne nac luu Pxoꝝ naa, luu rnabey gbaa luu rnabey guidzliu, rnedz naa xquizh lo luu sac grë miñe noyũ luu nu niina bdeete luu diidz niacnañ grë zha raca, sinque laaw blu luu lo grë zha ne nac zig grë mëédlas. ²⁶Sca quiayũ luu, sac ib scale racladz luu gaca.

²⁷Blozh ga, rëb me lo grë miech ne ndxie ga:

—Grëse ncuaane ran to quiayũ naa, Dios meñ ne nac Pxoꝝ naa, me bneedz poder rii lo naa; sac ib laa me bzo naa, naa guña. Xpëéd me nac naa, wen wen runbey me naa, scagaa naa wen wen runbey naa me. Choot runbeyd me zigne runbey naa me, per zha ne gacladz naa gunbey me, zunbey zho me.

²⁸Grëse to ne nac to zha ne në noded, rdib rdzag to quiaguib to dien zha guiaanwen zdoo to, goltë lo naa, naa gneedz tib wdziiladz ndzon lo to. ²⁹Nligaa golbig lo naa, goltënal zhiwseed naa, golgac tib miech tibliladz, tib miech ndooladz zigne nac naa; zeena gap to descans co. ³⁰Nacda ncuaane ngan, nacda ncuaane guiab to glëbde to gun tow.

Dze ne rdziiladz zha Israel lo dziin

(Mr. 2:23-28; Lc. 6:1-5)

12 Len dze coqew, tib dze lëëtaque dze ne rdziiladz zha Israel lo dziina, bded Jesús zaatne zëëb zhobxtil grë xpëédscuel me. Ga zie zho rcaabedz zho, dzigo psilo zho ptop zho mzion co dow zho zhobxtil co. ²Gon bla zha farisew, dzigo rëb zho:

—ÿLëda i gon noyũ to, noguuits to ley i! Golguien ganle dze nda nac dze rii.

³Pquiabchaa me rëb me lo zho:

—ÿPe gard glab to zaatne ziaad ganle zha been rey David, tib dze zeene pcaabedz me grë me zha ne ziegza me, ni zienied zho pe gow zho? ⁴Rneew, bzëëb me len yadoo güey nab me quietxtil ne nac gon, downie me grë zha ne ziegza me ga, ni loxaque zha ne nacse pxoz row quietxtil co, ÿpe led bdiitsd me ley ga? ⁵Lo xley Moisés name zhobnee ganle zha haxta dze ne rdziiladz to lo dziin run grë pxoz dziin len yadoo, ni rneeda dol ga sca run zho. ⁶Golwi ganle zha rats ley par gac dziin len yadoo, ni yadoose ga, gacnan to ganle lo to nu zo meñ ne mazdraa non lo yadoo.

⁷Rnee Dios lo Xtiidz me, quiambëzd me dien peraa gun miech, dien peraa cogon zho lo me, sinque miñe racladz me guien zho yquia zdoo zho samiech zho. Tel niaca miñe nli rien to miñ co, zien to gdziibdolde to zha ne rapd dol. ⁸Gacnan to ganle naa ne nac naa Mgui ne pxeel Dios, naa rnabey dze rii, nanpaa naa pe nonguiel gac.

Biac tib mgui ne mband tib nia

(Mr. 3:1-6; Lc. 6:6-11)

⁹Bded ga, gol stib dze ne rdziiladz zho lo dziina, güey Jesús len yadoo win ne zob lad guiedz co. ¹⁰Lad grë miech ne ndxie len yadoo co, no tib mgui ne mband tib nia; porque laa zha farisé bnabdiidzlaque lo me dien pe nonguiela

gunguiac me miech dze ne rdziiladz zho lo dziin. Sca bnabdiidz zho, sac quiaguib zho dien pe yquiaaqui zho me tsezo zho me lo wxtis.

¹¹Dzigo pquiab me rëb me lo zho:

—Togase dien, zha run to zene lëetse dze rii rietsobe tib xpëcwxiil to tib len blë nroob, ðled zëëb lëë rie to riebee to ma? ¹²Tel sca rquia zdoo to mëcwxiil, ðgolguien ganle mazdraa gon non miech lo tib mëcwxiil! Gacxe waa ible nonguiela gun ne xyudar samiech ne, niicle maase dze nda nac dze co.

¹³Dzigo rëbchaa me lo mgui ne në nia ga:

—ÿBzigaa nia luu!

Zigne bzigaa mgui nia mgui, biacgazha, biaana zig nac stib mine ndaantaque ga.

¹⁴Grë zha farisé co, zigne briee zho ga laa zho psilo bnediidz dien zha gdeeda diidz gut zho Jesús. ¹⁵Bien Jesús sca no guic zho, dzigo mazd briee me ga. Miech guizhiu ne zianal zhits me, grëse men rzacne ne zianal ga, beenguiac me zho; ¹⁶per per so me diidz lo zho, choot lo gzodiidz zhow.

¹⁷Ga brieequia mine pquiaa Isá, tib men ne biadteed xtiidz Dios padzeela, zene rëb me:

¹⁸Lëë men rii bzooblo naa gun xtsin naa,
rleynie naa me, rzac zdoo naa grë ncuaane run me.

Zded naa zhiEspíritu naa gacnie me,
me nac men ne cxobnen xtidz naa lo grëse miech.

¹⁹Tilnied me miech, sedzd yan me lo zho,
sod me ro nëz goptsie me.

²⁰Grë zha ne gzhe gzhele rac, zig tib goobgui ne quiaxweele, zig tib lë
guier ne noyiidiele,

csand me zdoo zho;
zha ne mban rac lo xliaadz zho,
csand me zho.

Min co tsoxco me, haxta gan me grëse miech gacnan mine nac diidzli,
ni tsianal zhow.

²¹Haxta zene gan me ye grë zha ne nacdraa zha Israel,
laa zho gnalo me.

Rëb zho mendox nacie Jesús

(Mr. 3:20-30; Lc. 6:43-45; 11:14-23; 12:10)

²²Dzigo güeynie zho tib mgui lo Jesús, rold lo mgui ni gacdaque gnee mgui, sac nosaci mendox mgui. Znuse beenguiac me mgui, gagazh psilo gon mgui, psilo bnee mgui. ²³Grë miech ne ndxie lo me ga, per nli bzee zdoo zho, rnee zho:

—ÿBay pe lëë men qui naye nac Men ne zëëble diidz ga cxeel Dios!

²⁴Zene gon zha farisé sca rnee grë miech co, rzachaa zdoo zho rnee zho: “Pe Dios nazho cxeel me, ma ne rnabey lo mendox ma co nacie me, gane rrieelo runcxoon me mendox.”

²⁵Bien Jesús sca rza guic zho, dzigo rëbchaa me lo zho:

—¡Ncuaane gacđ gon rnee to! Tel tib wxtis nadien lëëque zha ne nacie zho csilo tilnie zho, ¿niacxe zac gnabey zho? Tib guiedza, tel lëëque zha guiedz co tilnie menladz zho, led znuse lozh guiedz co; tib diigaa miecha, tel lëëque zha tilnie menlidz zho, ¿niacxe nitlod dii co? ²⁶Scaque mendox nagon, telne lëëque lëë ma guncxoon samendox ma, ¡pe nale na bnitlo ma! ²⁷Nana ne squi rnee to Beelzebú nacie naa gane rrielo runcxoon naa mendox, ¿zha ne nacgrë to dzigo, cho nacie zho ne ye zho runcxoon ma? Gase naganle rlu dol dox i quiayun to, squi rnee to. ²⁸Sangue tel naa zhiEspíritu Dios nacie naa gane runcxoon naa mendox, ni ga rlu ganle laa Dios psilo quianabeyle nu.

²⁹¡Masaque nac mendox zig tib zha ne no xfuerz, zha ne gacladz cuee grë ncuaane no lidz zha co, none cxidoogazh zho zho! ³⁰Tel mendoxa rlëënie ma naa, ni nanle to ganle zha ne rlëë lo ne, gacnied zho ne.

³¹⁻³²‘Gacnan to ganle, grëse dol ne run miech, grë tel zha rguie zho, rdzibdee zho, niicle tel haxta gneenë zho naa, bii zun Dios zho perdon min co; sangue zha ne gneenë zhiEspíritu me, ib gundraa me zho perdon.

³³Nanle to ganle zig nac yag nex, mine nac yag, min co nac nex ne rdeeda. Tel yag wena nex wen rquia low, togo yag ncuaangaaw, nex ncuaanaque rquia low. ³⁴¡Scaque to nagon zhin mendox! ¿Zha nan to nadien gac to miech wen, tel desde zdoo to ntseeb? Miech ntseeb to gane squi rzë xtiidz to, sac gon, ¡grëse diidz ne rriee ro miech, zdoo zho rzaw! ³⁵Gacxe waa, zha ne mbe zdoo, niapse diidz wen, diidz ndooladz nac xtiidz zho. Sangue zha ne ntseeb zdoo, niapse diidz ntseeb, niapse diidznë rrieeche ro zho. ³⁶Ni gal dze ne gon gun Dios guielwxtis, ib tedsod zunquizh me miech tib tib diidz ntseeb, tib tib diidznë ne sca rriee ro zho. ³⁷Sac gon zigne rzë xtiidz zho niina, min co cueequia zho gal dze co, o mincogaa cteedquie zho.

Racladz zha farisé gan zho milagr

(Mr. 3:31-35; 8:12; Lc. 8:19-21; 11:24-26, 29-32)

³⁸Tib dze wbig zla zha farisé lo Jesús gza zho zla maistr ley, rëb zho lo me: —Maestro, racladz no dzian no gun luu tib milagr, milagr ne glu nli Dios pxeel luu.

³⁹Pquiab me rëb me lo zho:

—Nazdpaa ntseeb to, squitaa gocndip zdoo to nëz lo Dios, ¿zha nacraa milagr ne racladz to gan to? ⁴⁰Stibaque milagr gon gan to, lëë min co gac zeen gal dze ne laa Mgui ne pxeel Dios, tso len liu tson dze, tson guieel, zigne bio Jonás len mel nroob co tson dze ni tson guieel. ⁴¹Ni gal dze ne gon gun Dios xquielwxtis me, ib steedquie zha Nínive miech ntseeb ne nac to i; sac gon zeene güeynee Jonás lo zho, grëse zho psaan xquielntseeb zho wbig zho nëz lo Dios; laa to, nëde to gon to diidz niicle ne lo to nu zo tib men ne mazdraa non lo Jonás. ⁴²Scaque rein ne bzob nëz Sabá, steedquie me to gal dze co, sac tel rein co golwi ganle pa lo guidzliu ne brie me biaadgan me rey Salomón, biadquiaadiag me grë xtiidz Salomón. Ni to, lo to nu zo men ne mazdraa non lo Salomón, ni ib ronde to xtiidz me.

⁴³Te₁ne csaande to xquie₁ntseeb to i gon₁, low lozh to. Sac to zig bzhaac tib zha ne psacsi mendox. Zeene brie ma zdoo zho, güey ma güeyquianzë ma grë dan zit güeyguib ma dien₁ pa cuëz ma. Gonse ma rdziel₁ zaatne cuëz ma, ⁴⁴rëb ma: “Mazd laa naa gbireque guia naa zaatne brie naa ga.” Zeene biire ma bdzi₁n ma zdoo zha co, gon₁ ma nroob lugar no, pale tib yu dets, ⁴⁵nacne güeyaque ma güeyxi ma zgadz samendox ma, ma ne mazdraa ntseeb blëznie ma zdoo zha co. iDzigole mazdraa mban biaan₁ zha co, lëdlegaa zigne goc zho glo! Scadaa nagon₁ gdzieelo to.

⁴⁶Laa me bii noneeque, zeene laa xniaa me ni zha bets me bdzi₁n, racladz zho gzodiidznie zho me. Per brieelod nzëeb zho haxta len₁ yu, sac scataa miech guizhiu ne ndxie lo me ga. ⁴⁷Dzigo rëb tib zho lo me:

—Laa xniaa luu gon₁ ni zha bets luu quiambëz luu nëz ley, racladz zho gzodiidznie zho luu.

⁴⁸Pquiab me rëb me:

—iXnia naa ye, bets naa ye?

⁴⁹Blis nia me, blu me grë xpëedscuel me, dzigo rëbchaa me:

—Zha ne gon₁ nac zig zha rii, lëë xnia naa ga, lëë bets naa ga. ⁵⁰iSac grëse zha ne run₁ mine rnabey Pxoza naa men₁ ne zob gbaa, grëse zha co nac bets naa, nac bzian naa, nac xnia naa!

Nac Xtiidz Dios zig zhoxtil

(Mr. 4:1-20; Lc. 8:4-15)

13 Blozh ga brie Jesú₁s güey me ro nisdoo. Ga zob me, ²zeene gon₁ me nzian miech ne nocaalsa lo me ga, nacne bie₁p me güeysob me tib len₁ barcw zo gax ro nis co, psilo me pseed me zho.

³⁻⁴Ndal grë ncuane pseed me zho, per niapse con cuent rnee mew lo zho. Lëë tib cuent ne bzodiidz me ga nu, rëb me:

—Tib zha name güey gon₁ zhoxtil. Zeene laa zho quialaa₁ zho₁ co, now bliaa₁ gax ro nëz, now bliaa₁ lad quie, now bliaa₁ len₁ yag guiets. Mine bliaa₁ gax ro nëz ga, güey grë mguin₁ znuse dow maw. ⁵Mine bliaa₁ zaatne nac lad quie, znuse znuse blana, ⁶per zeene laa lo ngbidz brie, znusaque bgool₁a, bidz₁gaw; sac guiend₁ nroob low. ⁷Mine bliaa₁ zaatne nac len₁ yag guiets co, zeene laa yag guiets pxii, bnitlogaw. ⁸Sangue mine bliaa₁ zaatne nac lo liu naa₁, blana, brooba ni goca; lo tib tib zho₁ co no zhimziona brie galptsi₁i zho₁, now brie tsonga₁la, nogaaw brie haxta tib gayoow.

⁹Blozh ga, rëbchaa me:

—Zha ne racladz guien₁ mine rne naa nu, yquiaadiag zhow.

¹⁰Zeene laa grë miech co zey, dzigo wbig xpëedscuel me bnabdiidz zho lo me dien₁ pe nac ne sca niapse con cuent rseed me grë miech. ¹¹Pquiab me rëb me:

—Tel₁ to, Dioszhal rlu lo to zha rnabey me, niicle ncuane mazdraa nguetsa; laa grëraa miech ne gard gbig lo me, grieelod guien₁ zhow. ¹²Sac zha ne noxcole dien₁ zha rnabey me, zdedraa me guielbiini lo zho guien₁ zhow, laa zha ne noxcoda, mine riense zho, stiche mew. ¹³Sca rseed naa zho parne tso₁guic zho

zha rnabey Dios, per nac zho niicle nzhal lo zho rwi zho, per peet ranḁ zho; niicle nzhal diag zho per peet rond zho; ib peet riend zho. ¹⁴Lëë miṇe nac zho i bzeet Isá, zeene znu rëb me:

Nac miech qui, niicle peraa ron zho, per peet riend zho;
niicle rwiraa zho, per peet ranḁ zho.

¹⁵Ne nlipaa miech nad, miech ndip zdoo nac zho,
rrieequia ntse zho diag zho, ntse zho lo zho;
parne peet gond zho, peet ganḁ zho.

Ib riend zho zha gbig zho lo naa, ygab zho xnëz naa, parne csilaa naa zho.

¹⁶Sangue to —rëb Jesús lo zho—. ¡Dichos to porne rien to pe ran to, ni riengaa to miṇe ron to! ¹⁷Blactaa zha ne biadteed xtiidz Dios padzeela, blactaa zha ne güeynaḁ miṇe nac diidzli, bzoobladz zho nian zho grë ncuaaṇe ran to niina, per bgaad zho nian zhow; bzoobladz zho nquiaadiag zho grë ncuaaṇe noquiaadiag to, per bgaad zho nion zhow.

¹⁸Golquiaadiag sca ganle zha nac xcuent zha ne güey gon ga. ¹⁹Ro nëz ne sca bliaaḁ zhob co, sca nac palal miech ne riepaa zha ne rienee Xtiidz Dios lo zho, per rioguicd zhow, rlozh ga rdzinaque mendox, rietiche ma tel palalse miṇe rien zho. ²⁰Lad quie ne bliaaḁ spalal zhob co, sca nac grë zha ne rley rcaania Xtiidz Dios; ²¹per led dib zdood zho rcaania zhow, gane zeene laa miech rsilo rlëë lo zho, laa miech rtsidil zho porne riladz zhow, rsaanga zhow. ²²Nogaa zho nac zig nac len yag guiets co. Rquiaadiag zho Xtiidz Dios, per rsilo zho lel grë ncuaaṇe no lo guidzliu rii mazdraa rionie guic zho, rquidie grë dimi zho. Grë ncuaaṇ co rioxcora zho, laa ne tsonie Xtiidz Dios guic zho, min co rquiaqui ib rund zho miṇe rnabey me. ²³Laa liu naaḁ ne bliaaḁ miṇe scataa goc ga, sca nac grë zha ne dib zdoo rquiaadiag Xtiidz Dios, rien zho zha naca, ni rban zhow zigne rnabeya. Rrieequia grë ncuaaṇe run zho, no zho nac zig mzion ne brieec galptsii zhob ga, no zho nac zig miṇe brieec tsongala, nogaa zho nac zig miṇe brieec tib gayoow ga.

Zha nac xquieḁrnabey Dios

(Mr. 4:30-34; Lc. 13:18-21)

²⁴Biire pcaalsa miech lo me stib, dzigo psiloque me pseed me zho con stib cuent, rëb me:

—Ziaad gac xquieḁrnabey Dios lo guidzliu rii zig bzhaac tib men ne gon zhobxtil. Niapse zhob wen, zhob nal gon me, ²⁵per no tib zha ne rlëë lo me, gol tib pcow liu, horne grëse miech nixguies, güey zho güeylaaḁ zho xmidz guizh ncuaaṇ zaatne gon me.

²⁶Zeene laa zhobxtil co psilo blan mzion, hor coraa blu laa guizh ncuaaṇ co no lada. ²⁷Grë zha ne quia xtsiin me, zeene gon zhow güey zho rëb zho lo me: “Tebaa gan luu ganle, dipse lad xoob luu zëëb guizh ncuaaṇ, ḁdieen pa brieew gocbniw ga?” ²⁸Dzigo rëb me: “Rien naa no cho tib zha ne rlëë lo naa, zha co been dziin co.”

²⁸Gocladz zho, hor cogazh nielaadz zhow per bzhiguiel me, ²⁹rëb me lo zho: “Tsielaadzde tow, sac tel glaadz tow niina ye zhoxtil gliaadzniew. ³⁰Golsaan sca zëeba ga, na zeene laa wlaap gac, hor co gnabey naa zha ne quiits zhob, ctogazh zhow gdiin zhow tib lad tseca; lozhraa ga quiits zho zhob, tsasa ga, glansow ro yu.”

³¹Blozh ga bzeet me midz moxtaz, rëb me:

—Nac xquielrnabey Dios zig nac tib midz moxtaz ne ran miech dan rii. Nan to ganle midz moxtaz nac midz ne mazdraa win, ³²ni tel gacniw, rrooba ni lëew rroobraa lo grë guizh ne ran zho ro yu, raca lal tib yag nex, haxta rdzin grë mguin rzhixcuua ma zhiptsiez ma lo grë zhicwa.

³³Rëbaque me:

—Nac xquielrnabey Dios zig nac ncobi ne rquiaa men wnaa lad ncob ne rriaa guietxil. Niipaque ncobi riots tson lmud rin, ni dib nacse ncob co rzibe.

³⁴Grëse mine pseed Jesús grë miech co, niapse con cuent bnee mew lo zho. ³⁵Ga briequia mine bzeet zha ne biadteed xtiidz Dios padzeela, zeene rëb zho: “Niapse con cuent cseed naa miech, sca gnee naa lo zho grëtaa ncuane gard gacnan miech wlal ne bre guidzliu.”

Zha nac xcuent guizh ncuuan co

³⁶Blozhse bnee Jesús lo grë miech co guey zho, yeque me laa me zey gza xpëëdsuel me. Bdzin zho ro yu, ga bnab zho lo me siguiel me gnee me lo zho dien zha nac xcuent guizh ncuuan ne bzeet me ga. ³⁷Dzigo rëbchaa me lo zho:

—Golgota sca, znu gon nac cuent co. Rriequia gon naa ga nac men ne gon zhob co. ³⁸Liu ne bniaaw ga, nac lo guidzliu, zhoxtil co nac grë miech ne nole xnëz Dios, laa guizh ncuuan co nac grë zha ne no ladznia mendox. ³⁹Zha ne güeygan guizh ncuuan co, lëe mendox ga. Dze lo wlaap co, gac dze ne gun Dios xquielwxtis me, zha ne tsie wlaap ga, lëe anjl ga. ⁴⁰Ni zigne sca cuee zho guizh ncuuan co lad zhoxtil, gzëëg zhow, scapaa nagon gal dze ne gac xquielwxtis Dios, ⁴¹sxel naa grë xanj naa tsie zho tsiebee zho grë zha ntseeb, zha ne sca runctal xtol grëraa miech, lad zha ne no xnëz naa.

⁴²Grëse zha ntseeb co, hor co laa zho guey lo gui dox ne riegual zho! Ga tso zho goonnë zho, haxta gow lay zho lo guielnë dox co. ⁴³Laa grë zha ne güeynal mine nac diidzli, zha co gdzin zaatne rnabey Pxoza naa, masaque zig xbiini ngbidz glu zho ga. ¡Zha ne racladz guiena yquiaadiag zhow!

⁴⁴Ziaad gac xquielrnabey Dios zig tib ncuuan non ne noliu tib lo xcuua miech. Zha ne gdziel tib ncuane sca non, ib tedsod zie zho sto zho grëse ncuane rap zho grieedimi si zho liu co, parne gunchen zho ncuuan non co.

⁴⁵Zha ne rzëeb lo xquielrnabey Dios, ziaad gac zho zig tib zha ne rzi quie perl mine mazdraa niazh. ⁴⁶Zeene ron zho pa no tib perl co, rto zho grëse ncuane rap zho, rie zho rzi zhow.

⁴⁷Nacaque xquielrnabey Dios, zig tib guiex nroob ne rga mel niina, zeene rsëeb ngooz mela lo nis grë lose mel rtopa. ⁴⁸Rlozhse riodzëw, dzigo rbeequia zhow ro nis, garaa rzob zho rbe zho grë mel co; ma ne rqiin laa tib chicuid

zole rio ma, laa ma ne rquiind rsëëb zho. ⁴⁹Scapaa nagon gac miech gaḷ dze ne gun Dios xquielwxtis me, ziaad grë xanjḷ me cuee zho grë zha ntseeb lo zha ne no xnëz me, ⁵⁰tsieron zho zho lo gui dox ne rieguial zho. Ga tso zho goonnë zho, haxta gow lay zho lo guielnë dox co.

⁵¹Blozhse ga, rëb me lo zho:

—¿Pe bien to na zha nac grë minë blozh bne naa lo to nu?

Grëse zho pquiab rëb zho:

—Bien now.

⁵²Dzigo rëbchaa me:

—Tib zha ne rienle zha nac grë ley ne psan Moisés, ni squi guien zho zha nac zhiwseed Dios minë zialnie naa niina, masaque nac zho zig tib zha gol ne quianie chop lo ncuuan non lidz zho, quianie zho grë min gol-le ni quianiequegaa zho min cub.

Güey Jesús ladz me

(Mr. 6:1-6; Lc. 4:16-30)

⁵³Blozhse sca bzodiidz me grë cuent co lo zho, laa me briece ga zie me nëz ladz me.

⁵⁴Bdzin me ga güey me yadoo, psilo me pseed me grë miech co. Per nli rzee zdoo zho ron zho grë minë rnee me, rnabdiidzlsa zho rnee zho:

—¿Pazhe waa squitaa pseed men qui? ¿Zha nac guielbiini ne squitaa rap me i, ne rnee miech ndal grë milagr ne run me? ⁵⁵Tib zhinse ngurëëyag name nac me. Led lëë xingan Marí i, bets me name nac Jacob, nac José, nac Simón ni Judas; ⁵⁶grë bzian mew, nu no zho grë zho. ¿Pa dzigo güey me wseed qui?

⁵⁷Ib beencasd zho me, haxta rlëë zho lo me. Zeene gon me sca rac zho, rëbchaa me lo zho:

—Zha ne rteed xtiidz Dios, mazd wen rnee miech lo zho stib dan, stib guiedz, lëdle ladz zho ni menlidz zho ni menladz zho nëd gunbey zho.

⁵⁸Beend me nzian milagr ga, sac sca ndip zdoo grë miech co ib nëd zho nililadz zho cho nac me.

Gut Juan Bautist

(Mr. 6:14-29; Lc. 9:7-9)

14 Len dze co bin rey Herod (men ne rnabey Galilé) grë ncuane run Jesús, sac tel pa lotaaw zëëb xtiidz me; ²dzigo rëb Herod lo grë zha ne run dziin lo me:

—Rien naa lëë Juan Bautist ga quiayun grë min co, segur brieaban me.

³Sca rnee Herod sac nanwen me zha been me Juan. Me bnabey bgaa Juan bzoob zho Juan caden bio Juan ladzguiib, ⁴loxaque ne rnee Juan lo me nonguielda ga lëëque Herodí ptsieelnia me, sac tsieelpaa bets me Lip nac Herodí. ⁵Gocladz Herod niut me Juan, per bdzieb me menguedz, sac rleynie zho Juan, rien zho xtiidz Dios ziadteed Juan lo miech.

⁶Laa tibtaa dzew, lëëtaque noyac zhilni Herod dze ne bloozh me stib iz, bded tib xindzooop Herodí squi ndxie grë zha ne zobnie me psilo ndzooop biee ndzooop. Bdziladz me gon̄ me zha biee ndzooop, ⁷haxta brieë ro me rëb me: “Ncuaane gacladztaa luu gnab luu, znedz naaw.” ⁸Per glole pquuil Herodí ndzooop, nacne rëb ndzooop lo me: “Mïne racladz naa, xoob guic Juan tib len̄ bandej gneedz luuw lo naa niinagazh.”

⁹⁻¹⁰Zeene bin Herod sca rëb ndzooop, mbanse rac me; per rdeetraaw diidz niab me grieeloda, sac grëse zha ne zobnie me ga, bin zho rëb me zdeed me ncuaane gnabtaa ndzooop. Dzigo racse me pxeel me zha ne güeychug guic Juan len̄ ladzgüiib. ¹¹Zeene wbire zho, zhoobse guic Juan tib len̄ bandej bdeed zhow lo ndzooop, dzigo güey ndzooop güeydeed ndzooopa lo xniaa ndzooop.

¹²Zeene gocnan̄ xpëëdsuel Juana, güey zho güeylis zho me ga güeyqueets zho me. Blozh ga güeyzodiidz zho lo Jesús zha bzhaac me.

Bguiaan̄ Jesús gaay mil miech

(Mr. 6:30-44; Lc. 9:10-17; Jn. 6:1-14)

¹³Zeene bin Jesús sca bzhaac Juan, dzigo brieë me ga bzëëb me barcw zie me tib zaatne guiend̄ miech. Per znuse bien̄ diidza, nzian grë guiedz co zha ne gocnana, tib ro nis güey zho, glole zho bdziñ zaatne no gdziñ me ga.

¹⁴Laa me noyet len̄ barcw, zeene blis lo me gon̄ me laa grë miech guizhiu co ndxiele ga; pquia zdoo me zho, beenguiac me grë mguidz ne zienie zho.

¹⁵Laa dze ziedzelew, wbig xpëëdsuel me rëb zho lo me:

—Mazd gudz lo grë miech qui guey zho na, zeena guiob tsie zho grë guiedz win ne ndxie gax i tsiesi zho ncuaane gow zho; sac gon̄ laa dze bdzele.

¹⁶Pquiab me rëb me lo zho:

—¿Pe nacne guey zho squise? To none gdeed ncuaane gow zho.

¹⁷Rëbchaa zho:

—¿Per pe dien̄ yguiaan̄ no zho? Pe rnase gaay quietxtil ni chop mel̄ ne ziaadnie no nu, lo grëtaa miech qui.

¹⁸Dzigo bnabey me zho güeynie zho quietxtil co, güeynie zho mel̄ co lo me, ¹⁹ni bnabey me grë miech co bzob zho lo grë guizh nguia ne zëëb ga. Hor co bzhen̄ me gza quietxtil co ni grop mel̄ co, blis lo me nëz gbaa, bdeed me xquizh lo Dios. Blozhse bdeed me xquizh, beengrol̄ me gza quietxtil co, mel̄ co ne, zigse rdeed mew lo xpëëdsuel me scase scase bdiiz zhow lo grë miech co. ²⁰⁻²¹Grëse zho dow zho haxta zaatne bieltaa zdoo zho. Miech tafa, zha bguise rgaa zig gaay mil, nandragaa grë men̄ wnaa, grë mëëdlas; ni zeene blozh dow zho, scase ncuaane nroob biaan̄, biodzë tsiipchop chicuid bio grë quietxtil co, bio grë mel̄ co.

Rzë Jesús lo nisdoo

(Mr. 6:45-56; Jn. 6:16-21)

²²Zeene blozh ga, bnabey Jesús xpëëdsuel me bzëëb zho len̄ barcw, zeena zienerga zho tedquia zho stib nëz ro nis co; laa me bii blëz ga, nozonëz me

grè miech co. ²³Blozhse bzonèz me zho, dzigo güey me tib guic gui zob gax ga, güeyzodiidznie me Dios, tipse me zo ga laa liu pcow.

²⁴Hor co laa barcw ne zie xpëedscuel me ga no lo nis co, ib gacd csëeniob zhow, sac rrie me rtsire mew, nëzrii nëzrec raca lo nis. ²⁵Merle guini liuw, tibaque zeene laa me bdziñ zaatne zie zho ga, tib lo nis co ziezë me.

²⁶Zeene gon zho laa men co sca ziaad-zë lo nis co, bdzieb zho, broptsie zho rnee zho:

—¡Tib ndziin i gon ziaad i!

²⁷Dzigo bnee me lo zho rëb me:

—¡Gdziebde to, naa zial nu!

²⁸⁻²⁹Pquiab Pedr rëb Pedr:

—Te!ne luu i ziaad i, bneedz diidz së naa lo nis glanso naa lo luu i.

—¡Dë sca! —rëb me.

Lëälëd biet Pedr len barcw, laa Pedr ziezële lo nis co ³⁰zeene gon Pedr scataa rlis me low, bdzieb Pedr. Tibaque zeene bien Pedr laa Pedr nodedquiele low, hor co broptsiedan Pedr, rbedz Pedr me, tsiebee me Pedr ga.

³¹Dzigo wbig me bzhen me nia Pedr, bzoli me Pedr lo nis co.

—¡Aque luu gon Pedr! —rëb me—. ¿Pe nacne gocchop guic luu? ¿Gard gon gliladz wen luu cho nac naa?

³²Zeene laa me biepnie Pedr len barcw, laa me co blëz. ³³Grëraa zha ne no len barcw ga, rleynie zho me, rzee zdoo zho rnee zho:

—¡Nasi nagon ndion no nli Xpëed Dios nac luu!

³⁴Zeene bdziñ zho stib nëz ro nis co, zaatne rnee zho Genesaret, ga biet zho barcw. ³⁵Grè miech co zeene gocnan zho laa me bdziñ ga, znuse znuse pxoon zho diidz grëraa guiedz ne ndxie gax ga. Dzigo brieë grè miech co, güeynie zho grë men rzacnë lo me, ³⁶rnaab zho lo me siguiel me maase ni xabse me xen grë men rzacnë co. Grëse zha ne bzhen ni xab me, biac zho.

Ncuaane runctal xtoł miech

(Mr. 7:1-23)

15 Tib dze, bdziñ bla zha farisé ni zla maistr ley ne ziaad nëz Jerusalén, lo Jesús; rëb zho lo me:

²—¿Pe nacne dien zianałd xpëedscuel luu mine blu xmengol ne, pe nacne zeene laa zho row, ib rguiibd zho nia zho zigne nopaa tsara?

³Pquiab me rëb me lo zho:

—¿To waa, pe nacne quiaguiits to xley Dios? Golguien ganle laa ne gun to mine rnabey Dios zigne naca, lel ncuaane blu xmengol to, min co zianał to.

⁴Led znu gon rnee lo xley Dios: “Gon pxoz luu, gon xníaa luu”, ni rneew: “Zha ne quie pxoz, quiegaa zho xníaa zho, ib none guet zho.” ⁵Laa to gon rnee to: “Peet nacda gund zho xyudar xmengol zho niicle no me liaadz, totsaque gdeed zho gon.” ⁶Tib lad rsan to xley Dios, mine blu xmengol to min co noxcoraa to.

⁷¡Loxaque guielwquidie qui no to! Rquiaalo to miech wen nac to, per lëepaa mine run to i ga bzeet Isá zeene rëb me:

⁸ Grë miech rii, rquiaalose zho runnon zho naa,
rond zho diidz gun zho miñe rnabey naa.

⁹ Zhlëse nac grë ncuaañe run zho, rnee zho laa zho rиаadgan naa;
sac niapse guicle zho riab grë wseed ne quialu zho lo miech.

¹⁰ Dzigo bnee me lo grë miech ne ndxie lo me ga, rëb me:

—Golquiaadiag miñe gni naa lo to nu, ni goltsoxco guien to zha naca.

¹¹ Golgacnan ganle, grë ncuaañe rdziñ zdo miech, led miñcod runctal xtol zho; sinque grë ncuaañ ntseeb ne rza guic zho, diidz ntseeb ne rriee ro zho, miñ co runctal xtol zho.

¹² Hor co wbig xpëëdsuel me, rëb zho:

—¿Pe bien luu ganle blëe zha farisé gon zho sca rëb luu lo zho?

¹³ Pquiab me rëb me:

—Grëse yag ne squi beenbnid Pxo z naa men ne zob gbaa, ib none laaw gliaadz zolo zolow. ¹⁴ Golsaan zho, nli zha noseed miech per nac zho zig nac zha ne rold lo. Ni nanle to ganle, tel tib zha ne sca roldle lo ni xenaque zho nia stib zha ne rand, zaatne nac tib len blë, ib tedsod grop xcuaa zho tsietsobe ga.

¹⁵ Bdedse ga, wbig Pedr lo me rëb Pedr:

—Bzhiguiel bnë lo no dien zha nac diidz ne në luu ga, ne rnee luu led ncuaañe rowd miech runctal xtol zho.

¹⁶ Pquiab me rëb me:

—¿Pe niicle to riendaquew dzigo lëe? ¹⁷ ¿Pe riende to grë ncuaañe row miech, led miñcod runctal xtol zho? Sac grë ncuaañe row zho rdziñda len zdoomban zho, zhaa zaatne rdziña; tib rietedsew xcuerp zho, rlozh ga rrieehaw. ¹⁸ Sangue grë diidznë ne rriee ro zho, zdoomban zho ga rzaw, ni lëe miñ co nac miñe runctal xtol zho. ¹⁹ Zdoomban zho nac zaatne rza grë ncuaañ ntseeb ne run zho, zig nac:

zeene rio zho grë zhgab yozh,
zeene rut zho samiech zho,
zeene rionie zho zha ne nole tsieel,
zeene rionie zho zha ne nacd tsieel zho,
zeene run zho guielgbaan,
zeene lega rnexuu zho samiech zho,
zeene rneenë zho samiech zho.

²⁰ Grë ncuaañ ntseeb co nagon nac miñe runctal xtol miech, gunctald zho xtol zho niicle tsard nia zho zigne nacpaa grë zhiwseed mengol.

Biac xpëëd tib wnaa zit

(Mr. 7:24-30)

²¹ Ga brieë Jesús, güey me haxta nëz Tiro ni nëz Sidón.

²² Nëz co no me güey tib wnaa ne ziaad lo xti zha Canaán lo me, nguietz zëeb tsi wnaa co rnab me lo Jesús siguiel Jesús tsiegunguiac tib xpëdwnaa me nosacsí menodox. ²³ Per ib pquiabd Jesús lo xtiidz wnaa co, dzigo wbig xpëëdsuel me, rëb zho:

—Mazd bzhiguiel̄ pquiaadiag miñe rnee wnaa qui, bui ganle zha ncuëtaa zëëb tsi me nal̄ me zhits ne.

²⁴Pquiab Jesús rëb me:

—Ziald naa par gun̄ naa xyudar zha zit, sinque laa Pxoz naa pxeel̄ naa par gun̄ naa xyudar grë zha Israel ne rzac zig grë mëcwxiiil ne zonziaab lo xbaxtor.

²⁵Scaque nonee me laa wnaa co wbig pquitsgzhib lo me.

—Bzhiguiel̄ —rëb me—, been̄ tib guiel̄nzaac been̄ xyudar naa.

²⁶Rëbchaa Jesús lo me:

—Nonguiel̄da gon̄, cob ne guiet ne no nia mëëd gdeed new lo mëcw.

²⁷—Nliw, scaw —pquiab wnaa co—, per niicle mëcwa name rsaanaque bizhuan ma rbig ma row ma miñe rrieengaa nia mëëd.

²⁸Hor co pquiab Jesús rëb me:

—¡Squiw nagon̄! ¡Rlu nli dib zdoo luu rnalo luu naa! Gacxe waa miñe rnab luu i gun̄ naa, niinagazh laaw gac.

Hor cogazh biac xpëëd wnaa co.

Nzian miech ne beenguiaic Jesús

(Mr. 8:1-10)

²⁹Nëz co wbi Jesús bdziñ me ro Nisdoo Galilé.

Ro nis co no me, miech guizhiu ne pcaalsa lo me. Tib dze gon̄ me scataa nzian miech co, dzigo güey me güeysob me tib guic gui win zob gax ga. ³⁰Ga zob me rdziñ grë miech co rdziñnie zho grë zhimguidz zho lo me, no zho zienie grë zha ne në ni, no zho zienie grë zha ne rold lo, grë zha ne guieñd tib nia, grë zha ne guieñd tib ni, grë zha ngop, ni grëragaa zha ne rlan pe stib guiel̄guidz; grëse zho beenguiaic me.

³¹¡Ncuaane gzee zdoo ne goc ga! Grë zha ne ni tib diidz gard gnee, per nli rley zho laa zho psilo rnee; grë zha ne guieñd tib ni, guieñd tib nia, laa ni zho laa nia zho biaan̄ zigne no gaca; grë zha ne rgob ni, haxta rias zho laa ni zho goc-wen; grë zha ne rold lo, rlozhd gzee zdoo zho grë ncuane ran̄ zho. Grëse miech ne ndxie ga, rzee zdoo zho, rley zho rool̄nie zho Dios.

³²Dzigo bredz me xpëëdscuel me rëb me lo zho:

—Rquia zdoo naa grë miech rii. Nadzele rac tson̄ ngbidz blanso zho lo ne nu, ni na quianiedraa zho pe gow zho. Tel̄ne squise gzonëz naa zho, nend pa lo zie zho nëz ycow zho.

³³Pquiab zho rëb zho:

—¿Per pe yguiaan̄ ne zho? ¿Pa guioxi ne guiel̄wagw ne yquiuin grëtaa miech qui dan rii, naca zaatne guieñd miech?

³⁴Dzigo bnaabdiidz me lo zho, rëb me:

—¿Bla quietxtil̄ ziaadnie to i?

—Gadzaquew no —rëb zho—, ni chop tson̄ mel̄ win.

³⁵⁻³⁶Dzigo bnabey me grëse miech co bzob zho lo liu. Blozh bzhen̄ me gza gadz quietxtil̄ co, ni gza mel̄ co, bdeed me xquizh lo Dios; blozhse bdeed me

xquizh, zigse rungröl me guietxtil co scase scase rdeed mew lo xpëëdsuel me rguiz zhow lo grë miech co; scaque beñ me gza mel co.

³⁷⁻³⁸ Grëse miech co dow zho haxta zaatne bieltaa zdoo zho. Miech guizhiuw, zha bguise rga zho maase tap mil, nandragaa grë men wnaa, grë mëëdla; ni zeñe blozh ga bii biodzë gadz chicuid bio grë minë biaan.

³⁹ Blozhse bnee me lo grë miech co, blozhse bzonëz me zho, dzigo laa me bzëëb leñ barcw zie ne nëz xtan zha Magdal.

Gocladz zha farisé niungüet zho Jesús

(Mr. 8:11-21; Lc. 12:54-56)

16 Magdal no Jesús, bdziñ bla zha farisé ni zla zha saducé lo me, gocladz zho niungüet zho me dien pe nxiñd me tib diidz, pe tib ncuane nonguieldgaa niun me. Rquiaalo zho rnab zho lo me gun me pe tib milagr, zeña gliladz zho nli Dios pxeel me.

²⁻³ Dzigo pquiab me rëb me lo zho:

—iPe nlipaa rnee to riende to zha nac grë ncuane noyac leñ dze rii! Zha zëëb dzigo runbey to pe rlu lo xcow. Zeñe ran to rquia xcow nizhnie bdze dze, rienle to guiet stib dze co zriee lo ngbidz. Sil ne rangaa to quia xcow nizhnie, quia xcow nlaan zhan gbaa, rienle to guixoo guiab dze co. ⁴ Nazdpaa ntseeb to, squitaa gocndip zdoo to nëz lo Dios, ¿zha rnaraa milagr ne racladz to gan to? Stibaque milagr gon gan to, tib minë gac zigne bzhaac Jonás.

Blozhse sca rëb me lo zho, zoque zho ga, ziega me.

⁵ Zeñe brie zho ga, zoladz xpëëdsuel me ney zho guietxtil ne niow zho.

⁶ Lega nacle psilo me nonee me lo zho, rëb me:

—Golguien gon, napaa noyab to lo zhincobi zha farisé, lo zhincobigaa zha saducé.

⁷ Zeñe gon zho sca rëb me, rneechaa zho:

—Porne nagon ziaadnied ne guietxtil, gane squi rnee me lo ne.

⁸ Bien me sca nonee zho, dzigo rëb me lo zho:

—iGardaque lëë guien to cho nac naa! ¿Pe nacne tso to zhizhgab guietxtil?

⁹ Ni lalnu lëë peet riende to! ¿Pe rsoladzde to zeñe gaayaque guietxtil bguiaan ne gaay mil miech, bla chicuida biaan? ¹⁰ Scaque zeñe gadzaque guietxtil ni bgaaw dow tap mil miech, ¿pe niicle min co rsoladzdraa to? ¹¹ ¿Zha nac dzigo rzac to guietxtil nozet naa? Golguien ganle zhincobi zha farisé, zhincobi zha saducé ni naa.

¹² Dzigoraa bien zho led ncobidpaa rzeet me, sinque rëb me lo zho gap zho cuidad lo zhiwseed zha farisé, lo zhiwseedgaa zha saducé.

Bnee Pedr cho nac Jesús

(Mr. 8:27-30; Lc. 9:18-21)

¹³ Bdziñ Jesús nëz xtan zha Cesarea de Filipo grë xpëëdsuel me, nëz co no me bnabdiidz me lo zho rëb me:

—¿Cho dien ron to rnee miech nac naa?

¹⁴Pquiab zho rëb zho:

—No zho rnee Juan Bautista, no zho rnee LÍw, no zho rnee Jeremíw, men ne biadteed xtiidz Dios padzeela; nogaa zho rnee no cho stib men ne ziadteed xtiidz Diosa zig biaad zha ne biaad padzeela.

¹⁵Dzigo rëb me lo zho:

—¿To waa? ¿Cho rzac to nac naa?

¹⁶Pquiab Pedr, rëb Pedr:

—¡Luu nac Men ne zëëble diidz ga cxeel Dios! ¡Xpëed Dios nac luu!

¹⁷Dzigo rëbchaa me:

—Dichos luu Simón (xingan Jonás) brieed diidz qui ro luu, sac gon Pxoz naa men ne no gbaa, men co bneedz guielbiini qui lo luu, nacda ncuaae cho miech nëw lo luu. ¹⁸Ye naa gon niina laa naa gni ganle cho nac luu, luu nac zig tib quie, ni quie ne gon squi nac gzhixcuaa naa xyadoo naa; tsod zha ne grieelo gnitlo yadoo co, per ni guielgut gnitloda. ¹⁹Laa naa rzo luu, luu gnee Xtidz naa lo miech zeena gacnan zho zha grieelo yгаа zho zaatne rnabey Dios; luu gac zig tib zha ne rey liow, tel zha cow, zha zac cxal ro yu, ni zha zac csiooga.

²⁰Dzigo pso me diidz lo zho choot lo gneed zho, me nac Men ne zëëble diidz ga cxeel Dios.

Bzeet Jesús zha guñ miech me

(Mr. 8:31-9:1; Lc. 9:22-27)

²¹Len dze co psilo Jesús bzeet me lo xpëedscuel me zha csacsi miech me. Rëb me nroob ncuaae cteed zho me, zeene laa me tsie Jerusalén; grë zha non lo menguedz, grë pxoz ne rnabey, grë maistr ley, ible stsidil zho me ni haxta zut zho me; per zeene gac tson ngbidz gut me, laa me grieeban.

²²Gon Pedr zha rnee me, dzigo bredzaque Pedr me blisqui Pedr lo me dien pe nacne rnee me laa me guet. ²³Zeene bin mew, zoque Pedr ga, biecw me rëb me:

—¡Biche lo naa nu mendox! ¡Loxaque no luu par gungüet luu naa! Zienied guic luu mine rnabey Dios, sinque mine rleynie miech, min co zienie guic luu.

²⁴Dzigo bnee me lo zho, rëb me:

—Zha ne racladz sëëb xnëz naa, none cueeladz zho zho, none lëb zho guiaadnal zho mine rnabey naa, niicle tel min co yquiaaqui csacsi miech zho. Nodne yquia zdoo zho xquielmban zho, ²⁵sac zha ne yquia zdoo xquielmban, lel znu nitlo zho; sangue zha ne sca cueeladz xquielmban porne no zho xnëz naa, ib zgaa zho tib guielmban ndzon ne gdziñd dze lozh. ²⁶Zha ne zienie guic loxaque gapchen, ¿pa dien yquiina lo zho, tel lëew yquiaaqui guey zho gabil? ¿Niacxe zrieelo gdziib zho dimi, laa zho len gabil? ²⁷Naa ne nac naa Mgui ne pxeel Dios, zdziñ dze ne gbiire guial naa stib, guialnie naa grë xanjl naa, glu naa ganle pa lotaa men nroob nac Pxoz naa; dze co gded naa mine tsieguial tib tib miech, tel zha wban zho. ²⁸Ib tedsod lo grë zha ne ndxie nu niina, bii no zha ne gan ganle, zeene laa naa csilo gnabey lo guidzliu rii.

Bdzëëlo Jesús

(Mr. 9:2-13; Lc. 9:28-36)

17 Goca xoop ngbidz, bredz Jesús Pedr, Jacob ni Juan bets Jacob güeynie me zho tib guic gui glaa.

²Guic gui co no zho, zeene gon zho laa me bdzëëlo. Masaque biinidoo rriee lo me, pale lo ngbidz; xab mew, per nli rquiabniw, masaque biini ne rrona.

³Tibaque zeene gon zho laa Moisés ni Lí men ne biadteed xtiidz Dios padzeela, nozodiidznie me. ⁴Rdzieb zho, lo dzeb co brieer ro Pedr rëb Pedr:

—Maestro, itebaa zha grieelo guiaan ne nu! Tejne racladz luu, na maase gzaa no tson yu yag xiid nu, tiba cuëz luu, tiba cuëz Moisés, stiba cuëz Lí.

⁵Scaque nonee Pedr, zeene znuse pquia tib xcow ngali zaatne zo zho ga, masaque biini ne rron xcow co, lo xcow co bin zho zëëb tsi tib men co, rnee me:

—Lëë xpëed naa i gon, rleynie naa me, rzac zdoo naa mine quiaayun me. Mine rnee me, gologna.

⁶Mazdraa bdzieb zho bin zho sca rnee men co, lëëled pquitsgzhib zho haxta bzin lo zho lo liu. ⁷Dzigo wbig Jesús, pcaannia me zho, rëb me:

—Golsoli, gdziebde to.

⁸Zeene blis lo zho bui zho, mese zo ga, gondraa zho schop men co.

⁹Blozhse ga, laa zho wbi ga. Cho gui co ziad-zëëbnie me zho, pso me diidz lo zho mine gon zho ga, choot lo gzodiidzd zhow, nieeda gal dze ne laa me brieaban.

¹⁰Dzigo bnabdiidz zho lo me, rëb zho:

—¿Bay zha nacne rnee maistr ley, glo Lí no guiaad stib, dzigora guiaad Men ne zëëble diidz ga cxeel Dios?

¹¹Rëbchaa me:

—Nliw, ible nacle diidz ne glo Lí guiadseed miech gon zho xtiidz Dios. ¹²Ni gacnan to ganle laa me biaadle, per beenbeyd miech me, lel psacsi zho me been zho me mine gocladztaa zho; ni ib tedsod gon, scaque csacsi zho Mgui ne pxeel Dios.

¹³Zeene blozh sca rëb me, dzigo bien zho Juan Bautist ga rzeet me.

Biac tib mëed ne nosacsi mendox

(Mr. 9:14-29; Lc. 9:37-43)

¹⁴Zeene blozh biet zho cho gui co, gon zho miech guizhiu ndxie ga quiambëz Jesús. Lad co brieer tib mgui, wbig me lo Jesús, pquitsgzhib me lo Jesús, rëb me:

¹⁵—Laa naa rnab lo luu, bzhiguiel beenguiac xpëed naa, nrooble nosacsi guidz gutye win. Blactaa ziyobe win lo gui, ziyobe win lo nis ne. ¹⁶Blansonie naa win lo xpëedscuel luu nu, per rrieelod zho gunguiac zho win.

¹⁷Dzigo rëbchaa Jesús lo xpëedscuel me:

—¡Pe na squitaa miech ntseeb nac to, ib nëde to gnalo to Dios! ¿Palal tiemp ne so naa gne naa lo to? ¡Ncuane cxecwdraa naa lo to squi nac to! ¡Goltënie mëed qui nu!

¹⁸ Dzigo goctox Jesús lo mēndox ne nosacsi mēēd co, bēncxoōn me ma, hor cogazh laa mēēd co biac.

¹⁹ Haxta wbiraa zho ga, wbig zho lo me bnabdiidz zho dien pe nacne brieelod zho niuñcxoōn zho mēndox ne nosacsi mēēd co. ²⁰⁻²¹ Dzigo rēbchaa me:

—Brieelode to niuñcxoōn to ma, sacne rnalode to Dios. Teḷ niaca miñe rnalole to Dios siquier palal yeen, gzoob ne siquier lal tib midz moxtaz, niicxe ncuaañe mazdraa ngañ gnab to lo me, zuñ mew; tsod ncuaañe grieelod guñ to.

Bzeet Jesús laa miech csacsi me

(Mr. 9:30-32; Lc. 9:43-45)

²² Xtan zha Galilé no zho, tib dzew rēb me lo zho:

—Naa ne nac naa Mgui ne pxeel Dios, ib znaaz miech naa, ²³ haxta zut zho naa; per zeene gac tson ngbidz gut naa, zriebaan naa.

Zeene bin zho sca rnee me, bio zho guielñē, mbanse rac zho.

²⁴ Bdziñ me guiedz Capernaum, loxaque bzēēb me lad guiedz, laa zha ne rtop dimi ne razh yadoo wbigle lo Pedr, bnabdiidz zho dien pe rguizh me dimi co. Pquiab Pedr rēb Pedr lo zho:

²⁵ —Rguizh mew, ¿pe nacne quizhd mew?

Zeene bdziñ zho len yu ne rbēz me, gardle guiab Pedra lo me, glole me bnabdiidz rēb me lo Pedr:

—Zig nac dimi ne razh lo men ne nac rey dien, ¿pe ye xpēēd me rguizha, te loxaque zha zit rguizha ye?

²⁶ Pquiab Pedr rēb Pedr:

—Zha zitse rguizha.

—Nligaa sca naca —rēb Jesús—. Zha ne nac mēēd nodne quizh zho, ²⁷ per par guiabd zho rdziond ne diidz, güey güeyron xanzuel luu lo nis. Meḷ ne glopaa yгаа low, bzhen ma pxal ro ma, ga gdziel luu dimi; dimi co güeynie bdiizh miñe no dizh ne grop ne.

¿Cho nonraa?

(Mr. 9:33-37, 42-48; Lc. 9:46-48; 15:3-7; 17:1-3)

18 Len dze co bnabdiidz xpēēdscuel Jesús lo me, dien cho tib zho gac zha ne mazdraa gacnon lo grē zha ne no xnēz Dios.

² Dzigo bredz me tib mēēdbgui win, bzo me win glowtaa lo zho, ³ rēb me:

—Gneli naa lo to ganle, telne csaande to xquielntseeb to, telne gacnguudzladzde to, gac to zig mēēdwin rii, per ni xnēz Dios grieelod sēēb to. ⁴ Zha ne racladz gac zho zha non, none gac zho tib miech ndooladz, none gac zho zig tib mēēdlas. ⁵ Miech ne gacnie zha ne sca nac, zha ne rleynie naa, rrieequia naale ga racnie zho.

⁶ Per miech ne yquuil zho gunc̄tal zho xtol̄ zho, ¿probsaxe zha co! Mazd zhi guielñēw lo zho ygadoo tib quie molin zhobxtil yañ zho, tsieron̄ zho zho nisdoo. ⁷ ¿Nac lo guidzliu rii, runfalte guielntseeb low! Runfalte ncuaañe gunc̄tal xtol̄ miech, ¿per probsaxe zha ne yquuil zha ne nole xnēz naa, gunc̄tal zho xtol̄ zho!

⁸ Golguien telne tib nia to, tib nigaa to rquiaqui runctal to xtol to, goltichegazha. Peet nacda maase tibaque ni to, tibaque nia to zob totsaque yгаа to guielmban ndzon ne gdziind dze lozh, lëdle zob gropa ni laa to guey gabil, lo beldox ne gdziind dze guiuu. ⁹ Scaque bziaalo to, mine rquiaqui runctal to xtol to, goltichegazha, peet nacd maase tibaque lo to zob totsaque yгаа to guielmban ndzon ne gdziind dze lozh, lëdle zob gropa ni laa to guey lo beldox ne nac gabil.

¹⁰ Ib gunde to csanwin to grëraa zha ne no xnëz naa, zha ne nac zha mban, sac gon non zho lo Dios, anjl ne quianap zho, tibaque zo me lo Pxoз naa men ne zob gbaa.

¹¹ Nziuu miech lo Dios, tel naa ne nac naa Mgui ne pxeel me, ib laa naa zial zialsilaa naa gre zha ne zonziaab lo me.

¹² Rzac Dios miech zig tib men ne rquianë zdoо xpëcwxii. Telne quianie zho tib gayoo ma, ni gziaab tib ma, led zëeb lëe rсан zho stapgal tsiimtap ma ne zo lo zho, rbire zho rieguib zho ma ne bziaab ga. ¹³ Zeene rdziel ma lo zho, rlozhd gleynie zho ma, lëe ma rac guielbley que grëraa xcompañer ma. ¹⁴ Scadaa nagon rzac Pxoз naa miech, gre zha ne nole xnëz me, ib racladz me gziaab zho.

¹⁵ Golguien sca, tib tib to zeene cho tib zha ne nacgre to gun pe tib falt lo to, goltsie goltsienee lo zho; gropse to golzodiidz pe nac mine pxin zho. Telne siguiel zho guiaan to mpaz, laa to beenle gan ga gneewen to stib. ¹⁶ Laa telne nëd zho, dzigo golguib tib zha ne së, chopgaa zha ne së gan ganle zha rac zho. ¹⁷ Tel niicle scaw nëdaque zho guiaan to mpaz, dzigo mazd golguiab lo grese zha ne nacgre to gnee zho lo zho. Telne niicle xtiidz zha co nëd zho gon zho, dzigotaa mazd golsaan zho, sacdraa to bets to ga, golcueue zho lad to, golsac zho zig rzac miech gre zha ne zienal guielntseeb.

¹⁸ Gneli naa lo to ganle, grese zha ne gon xtiidz to zeene rnee to lo zho gacwen zho, scagaa Dios scaania me zho; per zha ne gonda, ycaaniad me zho.

¹⁹ Ni racladz naa gacnan to ganle, gre zha ne no xnëz naa, niicle tib nëzaque zho, per telne tipse rac zho, ncuane gnabtaa zho lo Pxoз naa men ne zob gbaa, zdeed mew. ²⁰ Sac zeene rcaalsa zho roolnie zho naa, ga zo naa lo zho; niicle maase chopaque, tsonaque zho.

²¹ Dzigo wbig Pedr rëb Pedr lo me:

—Zha ne sca dzigo gun falt lo naa, blataa vuilt no gun naa zho perdon? ¿Gadztaaw lëe?

²² Pquiab me rëb me:

—Lëda gon Pedr, led loxaque gadzdse vuelta. Tel blataa vuilt gun zho falt lo luu, none gun luu zho perdon.

Zha ne beend perdon

²³ Grë zha ne no xnëz Dios, ib none gun zho perdon samiech zho.

Tib rey name, tib dzew bredz me gre zha ne rquia dziin lo me, par dien zha quiayun zho dziin. ²⁴ Loxaque psilo me, zeene laa xcuent tib zha co blozh

briee, nroob briequia zho lo me; ²⁵par quizh zhow, peet nzheñd zho. Dzigo bnabey me to zho grop tsiel zho, xpëed zho ne, ni grëse ncuaañe rap zho, parne grieelo gazh xquielqui zho. ²⁶Zeene gon zho sca rëb me, pquitsgzhib zho lo me, rëb zho: “¡Been guielnzaac, gop tib paciens, na dien zha gun naa quizh naa xquielqui naa lo luu!” ²⁷Gon me zha rac zho, pquia zdoo me zho, psilaa me zho, beenquizhdaque me zho xquielqui zho.

²⁸Loxaque briee zho ga, bdziel zho tib zha ne nzëeb palal yeen dimi lo zho, tib zha ne rquiaque xtsiin rey cow. Zigne gon zho zha co, zolinëz wbig zho bdie zho yan zho, rnab zho gagazh quizh zho xtimi zho. ²⁹Dzigo pquitsgzhib zha co lo zho, rnab zho siguiel zho gap zho paciens, dien zha gaclo dimi co quizh zhow. ³⁰Pe nquiaadiag zho ga, bnab zho bio zha co ladzguiib, haxta bdiizh zho dimi ne zëeb zho ga. ³¹Grëraa zha ne rquia dziin lo rey co, zeen gocnañ zhow, bdeednë zho, güey zho güeyzodiidz zhow lo me. ³²Zeene bin mew, bnabey me gocredz zho, goctox me lo zho rëb me: “¡Pe clas miech nac luu! Pe rsoladz luu zha rac luu bnab luu pquia zdoo naa luu, haxta beenquizhd naa luu guielquidox ne zëeb luu ga. ³³¡Pe nacne pquiad zdoo luu zha co, zigne pquia zdoo naa luu?” ³⁴Blëe me gon me sca been zho, bnabey me bio zho ladzguiib, haxta blozh bdiizh zho grëse xquielqui zho.

³⁵Scadaa nagon gun Pxoz naa to, telne gunde to samiech to perdon tel pe nac falt ne gon zho lo to.

Zha ne rsëbtsieel

(Mr. 10:1-12; Lc. 16:18)

19 Blozhse sca bnee Jesús lo zho, brienie me zho ga güeyted zho grë guiedz ne ndxie xtan zha Judé, grë mine riaan nëz dan ro guiube Jordán, nëz ne rlan ngbidz. ²Miech guizhiu ne rree grë guiedz co, rdzin lo me; grë men rzacnë ne rdzinnie zho, beenguiac me zho.

³Ga no me, bdzin bla zha farisé gocladz zho niungüet zho me, par dien pe nxiñd me tib diidz; bnabdiidz zho lo me rëb zho:

—Pe gnë luu dien, ¿pe wena csëbtsieel zha bgui ne gacladztaa csëbtsieel?

⁴Pquiab me rëb me:

—¿Mod rande to zha zhobnee lo Xtiidz Dios? Lo co zhobnee ganle zeene psan me miech, tib nëz zho psan me, tib mgui ni tib wnaa. ⁵Ni rneew, ib none greezhaa mgui lo pxoz zho, lo xniaa zho par gbannie zho wnaa ne nac tsiel zho, gac zho tibaque miech grop zho. ⁶Nligaa nacdraa zho chop miech, sinque laa zho rac tibaque. Dios nac men ne psan ycatsieel miech, cho dzigo nac miech par quiits zho mine rnabey me.

⁷Dzigo rëb zho lo me:

—¿Pex nac dzigo waa bdeed Moisés diidz csëbtsieel mgui ne racladz csëbtsieel? Rëb Moisés, zac csëbtsieel zho, totsaque yquia tib guits gdeed zho lo wnaa zaatne raquiet laa zho psaan wnaa.

⁸Pquiabchaa me rëb me:

—Ne squitaaxe waa miech nad, miech ndip zdoos goc xmenjol to, gane bdeed Moisés diidz csëbtsieel zho; sangue Dios psand me diidz csëbtsieel miech. ⁹Gacnan to ganle, zha ne csëeb wnaa ne nac tsieel zho, ni tel peet guelyozh beend wnaa co, dol ga gun zho csëeb zho tsieel zho ycaa zho stib wnaa. Scaquegaa mgui ne ycaa wnaa ne psëeb zho ga, dol ga gun zho sac gon no tsieel wnaa co.

¹⁰Dzigo rëbchaa xpëedscuel me:

—Tel scataa nac xcuent gueltsieel, mazd lëequew dzigo ctsieelniad ne.

¹¹Pquiab me rëb me:

—Nligaa no mgui ne rtsieelniad, per zhis zho, ni no pe nacne sca riaan zho.

¹²No zho desde rac zho mëed, nacd zho zha ne grieelo tsonie wnaa; no zho ib miech sca rsan zho. Nogaa zha ne ib zha rbeeladz zho ctsieelniad zho, parne grieelo tsoxcoraa zho gun zho xtsiin Dios. Zha ne sca rquiabladz ctsieelniad, maase ctsieelniad zho.

Beenlay Jesús mëedlas

(Mr. 10:13-16; Lc. 18:15-17)

¹³Ga no Jesús, ndal zha ne bdzin bdzinne zho xpëedlas zho lo me, parne xcobnia me guic win gunlay me win. Grë zha ne nac xpëedscuel me, lel psilo zho rtsidil zho pe nacne nodzinne zho grë mëedlas co lo me.

¹⁴Zeene gon me sca quiayun zho, rëbchaa me lo zho:

—Ctsirede to grë mëedlas yeen qui, golsaan guiaad win lo naa. Sac gon grë mëedlas yeen, ni zha ne nac zig nac win, zha co nac zha ne sëeb ygab lo Dios.

¹⁵Dzigo psilo me pxobnia me guic grë mëedlas yeen co, beenlay me win. Blozhse ga, laa me briece ga.

Bzodiidznie tib zha ricw Jesús

(Mr. 10:17-31; Lc. 18:18-30)

¹⁶Laa me zieriee ga, zeene bdzin tib mgui nguieg, tib zha ricwa, rëb zho lo me:

—Nan naa luu nac tib men ne noseed miech, ni tib men wen nac luu. Bnë dien, ¿pe nac mine gun naa parne grieelo ygaa naa guielmban ndzon ne gdzind dze lozh?

¹⁷Pquiab Jesús rëb me:

—Rnee luu lëe tib men wen nac naa. ¡Nligaaw, Diosse nac men wen! Telne nli racladz luu ygaa luu guielmban co, none tsoxco luu gban luu mine rnabey Dios.

¹⁸Pquiab zho rëb zho lo me:

—¿Pa min waa?

Rëbchaa me:

—Mine rnee:

Gute luu samiech luu,

telne nole tsieel luu, tsonied luu zha ne led tsieeld luu,

cuand luu samiech luu,

yquiadiidzguizhd luu samiech luu,

¹⁹ gon pxoz luu, gon xniaa luu, cued luu xquielto me.

Bleyne samiech luu, zigne rleynie luu luu.

²⁰ Dzigo rëbchaa zho:

—Ni tib minë rnee luu i gard quits naa, grësew zanaḷ naaw zigne naca. Racladz naa gacnaḷ naa, dien peraa no guḷ naa.

²¹ Hor co rëb me lo zho:

—Telḷ racladz luu gac luu tib zha ne gban grëse minë rnabey Dios, güey sca güeyto grëse ncuaane rap luu, dzigo güeytiiz dimi co lo grë zha ne guiend pe yquiin. Lozh ga, dë dënaḷ zhits naa. Min co nagon guḷ luu, dzigo zгаа luu guielmban ndzon co; ni scagaa nroob guielnzaac ne yгаа luu nëz lo Dios.

²² Zeene bin zho sca rëb me, mbanse rac zho laa zho zey, sac nroob ncuaane quianie zho.

²³ Dzigo rëbchaa Jesús lo xpëedscuel me:

—Gneli naa lo to ganle, grë zha ne squi rapchen, rzacxuu zho par sëeb zho xnëz Dios gnabey me zho. ²⁴ ¡Ne nligaa ngan rzac zhow! Mazd ngandse rded tib camell guieer guzh, lëdle sëeb tib zha ne squi rapchen xnëz Dios.

²⁵ Zeene bin zho sca rëb me, rzee zdoz zho, rnee zho:

—Bay, ¿chosezhe dzigo waa nac zha ne zrieelo sëeb xnëz Dios?

²⁶ Dze bui me lo zho, dzigo rëbchaa me:

—Nligaa par miech zootle tsod zha ne grieelo sëeb xnëz me; sangue me nan me no zho. Sac telḷ me, tsod ncuaane grielod guḷ me.

²⁷ Hor co pquiab Pedr rëb Pedr lo me:

—No dzigo waa, ¿pe nac minë yгаа no? Nanle luu ganle, telḷ no grëse ncuaane rdziaap no, laa no psana, ziaadnaḷ no zhits luu.

²⁸ Pquiab me rëb me:

—Golgona ganle, dze ne gacnub grëse ncuaane no, zeene laa Mgui ne pxeel Dios zob lo xcan ne zo zaatne nac lo guielndzon ne no me, dze co lo gza to ne nac to zha ne biaadnaḷ zhits naa, sob to lo gza tsiipchop xcan ne rieguialḷ to. To gac zha ne guḷ guielwxtis lo gza tsiipchop dii ne nac zha Israel. ²⁹ Grëragaa zha ne psan lidz, psan zho bets zho, bzian zho, xniaa zho, pxoz zho, tsiel zho, xpëed zho, liun zho porne noyun zho xtsin naa, na lo guielmban riique laa zho gana stib tib gayoogaw tib tiba; ni ib tedsod zгаа zho tib guielmban ndzon ne gdzindraa dze lozh.

³⁰ Nli zig nac niina, nzian zha ne rzac zha non nac zho, nogaa zha ne rzac zho peet nond, per zeene galḷ dze co lalga gac zho grë zho.

Lalga nac grë zha ne no xnëz Dios

20 Grë zha ne no xnëz Dios, zac zho lo me zig bzhaac grë zha ne güey xtsiin tib men co.

¹ Tib men co name nroob dziin quianie me, tib dzew zigne biini liu brie me güeyguib me zha ne tsielaap xuv me. ² Bdziel me palal zho, biaan zho diidz palal quizh me zho dze, laa zho bzëeb lo dziin. ³ Glaale ngbidza brie me güeyted me lenḷ guiedz, lëtse güeytsib me lo bla zha ne zob ga racladz

dziin. ⁴Dzigo bree me zho, rëb me: “Goltsie xtsin naa, na quizh naa to mine non xtse to.”

⁵Rwe ngbidza, biire me güey me güeyguib me spalal zho. Maase las treza güeyaque me stib.

⁶Zhile sëeb ngbidza, biire me güey me len guiedz. Ga bdzieel me zla zho, gon me scase zob zho ga. Dzigo rëbcha me lo zho: “¿Pe nacne squise noded dze to?” ⁷Pquiab zho rëb zho: “Choot rneedzdaxe dziin waa yquiaa no.” Rëbcha me: “Nasca zeena tsie to lo xtsin naa, maase quizh naa xtse to.” Dzigo laa zho zie.

⁸Zeene laa dze blozh bdze, bnee me lo zha ne zo lo xtsiin me, rëb me: “Bredz grë zha qui na, bdiizh xtse zho grëse zho. Zha ne bza bzëeb lo dziin, zha co glo bdiizh, lozhraa ga quizh luu zha ne glo bzëeb.” ⁹Dzigo bded zha ne bdzele dze bzëeb lo dziin ga, tib tib zho pcaase zho mine non zho tib dze. ¹⁰Grë zha ne glo bzëeb lo dziin, zeene gon zhow, tibaque güeynie guic zho nroobraa nguizh me zho. Per zeene laa zho gozh, lalgaque pcaa zho.

¹¹Zeene gon zho lalga pcaa zho grë zho, blëe zho, güey zho güeylisqui zhow lo men ne nacchen dziin ga, rëb zho: ¹²“Psacsi luu no i gon squi been luu. Bui ganle gdipse dze ptsuu ngbidz no pquiaa no xtsiin luu, ¿zha nac dzigo lalga quizh luu no grë no zha qui, ni niipyeenaque been zho dziin?” ¹³Pquiab me rëb me: “Bets, nosacsid naa to, biaanle ne diidz name palal quizh naa xtse to. ¹⁴Nana sca golgüey xtimi to i, zeena golsë. Ib zdoo naa rala lalga quizh naa to grëse to. ¹⁵¿Stiba, xtimi naaw, zrieelo gundziin naaw zigne racladz naa! ¿Te në rac zdoo to ye, ran to rquia zdoo naa miech?”

¹⁶Scapaa nagon gac zha ne no xnëz Dios. Lal gacnon zho, zigtaa zha ne glo bzëeb xnëz mew, zigtagaa zha ne sëeb bzaw.

Bzeet Jesús stib laa miech csacsi me

(Mr. 10:32-45; Lc. 18:31-34)

¹⁷Nëz no Jesús zie me nëz Jerusalén, tibaque bredz me gza tsiipchop xpëedscuel me, ¹⁸bzeet me lo zho zha gon miech me zeene laa zho gdzin Jerusalén, rëb me:

—Ib ziaab naa ladznia grë pxoz ne rnabey grë zho maistr ley, zha gnab guet naa. ¹⁹Zha co naa ladznia zha zit, parne gunnguzee zha co naa, parne quin zho naa, ni haxta squiaa zho naa lo cruz. Per zeene gac tson ngbidza, zriebaan naa.

²⁰Tibaque zeene wbig tsieel Zebedé wbignie me grop xingan me Jacob ni Juan, pquiitsgzhib me lo Jesús rnab me gon Jesús tib favor ne racladz me.

²¹Dzigo bnabdiidz Jesús lo me, pe nac favor ne racladz me. Pquiab me rëb me: —Racladz naa gnedz luu diidz sob tibga xpëed rii naa cue luu, zeene gdzin dze ne laa luu zob zobnabey luu; tib zho nëz derech, stib zho nëz revés.

²²Pquiab Jesús rëb me lo wnaa co:

—¿Ni luu gon riend pe rnab luu! ¿Niacxe zleb zho gan zho grë guieinë ne gan naa, tedgaa zho grë mine teed naa?

Pquiab zho rëb zho:

—Zlëëb no.

²³Rëbchaa me lo zho:

—Nli nenda zañ to grë guieñe ne gañ naa, ni zdedgaa to miñe teed naa; per ne gnedz naa diidz sob to cue naa nëz derech, nëz revésgaa, led naad raguial miñ co; sac laa lugar co biaanle par zha ne tsieguiala, ni Pxoz naa men ne zob gbaa men cose nañ dien chow.

²⁴Grëraa xpëëdscuel me, zeene bin zho pe nac miñe rnab Jacob grop Juan, blëë zho lo zho. ²⁵Dzigo bredz Jesús zho grë zho, rëb me lo zho:

—Rañ to ganle zha run grë zha ne rnabey grë guiedz ne ndxie lo guidzliu, ni grë zha ne nac zha non, masaque rnabey zho samiech zho zigne racladztaa zho. ²⁶Sangué to gon gunscade to. Zha ne racladz gac zho zha non lo to, laa ne glu zho zha non zho, none glo zho guiaanwin, gac zho zig tib ngundziin lo to. ²⁷Scaquegaa zha ne racladz gnabey zho lo to, none glo cseed zho gun zho miñe gnabey to zho. ²⁸Golgan ganle, niicle naa ne nac naa Mgui ne pxele Dios, ziald naa par gnabey naa miech, sinque laa naa zial par gac naa tib ngundziin lo zho, ni gded naa xquielmban naa zeena laa zho lo grëtaa ncuane ngadoo zho. Ni nanpaa naa miech guizhiu ne laa.

Biac chop zha ne rold lo

(Mr. 10:46-52; Lc. 18:35-43)

²⁹Miech guizhiu nal zhits Jesús, laa me zieriee guiedz Jericó. ³⁰Ro nëz co zob chop zha ne rold lo, zeene bin zho laa me ziaad ga, psilo zho nguiedz rbedz zho rnee zho:

—¡Jesús, men xtii rey David, pquia zdoo no!

³¹Blalaa zha ne zie ga, psilo zho ndox zho lo grop zha co parne guioog ro zho, per lele hor cole nguiedzraa rbedz zho me. ³²Nacne zeene bdziñ me zaatne zob zho, blëz me, bnabdiidz me lo zho rëb me:

—¿Pe nadien gun to naa?

³³Pquiab zho rëb zho:

—¡Racladz no guiac lo no!

³⁴Pquia zdoo me zho gon me sca rac zho, dzigo pquiaania me zhits guidlo zho. Hor cogazh laa lo zho biac, laa zho zienal zhits me.

Bdziñ Jesús Jerusalén

(Mr. 11:1-11; Lc. 19:28-40; Jn. 12:12-19)

21 Sca no Jesús nëz grë xpëëdscuel me, laa me bdziñ guiedz Betfagé. Gaxle ga riaan Jerusalén, nëz danse squi riaan Gui Oliv. Dzigo pxele me chop xpëëdscuel me, rëb me lo zho:

²—Goltsie guiedz win ne ndxie danse lo ne i. Ga gdziñ to zaatne quidoo tib burr gus grop xpëëd, dzigo golxadz ma goltënie ma nu. ³Tele cho gnabdiidz pe nacne noxadz to ma, golguiab lo zho: Men ne rnabey ne, men co rquiin ma, na zigne lozh xtsiin ma guiaadsañ no ma.

⁴Ga bricequia minē bnee tib meṅ ne biadteed xtiidz Dios lo miech padzeela, zeene rēb me:

⁵Golguiab lo meṅ Jerusalén:

“Golwi ganle, laa meṅ ne nac zhirey to ziaad i.

Tib meṅ ligase rlu me, zob me lad tib burr win,

tib ladse ma ne rey yo zob me.”

⁶Laa zho zie, zigne bnabeyse me zho ga, scase been zho. ⁷Zeene wbire zho, laa zho bdziṅnie burr co grop xpēed ma. Pxob zho lar ne rbix zho lad xpēed ma, laa me bzob ma. ⁸Zigse zie me, no grē miech guizhiu co, rta zho lar ne rbix zho ro nēz rded burr ne zob me ga; nogaa zha ne rchoo nia grē yag nguia, rdziṅ zhow ro nēz rded me. ⁹Grēse zho, zigtaa zha ne nera, zigtaa zha ne naḷa, nguiedz roptsie zho rnee zho:

—¡Golgotsaa co ne xviv xingan David! ¡Golgotsaa gleynie ne me! ¡Zha ndzontaa Dios, pxeel me meṅ nroob qui lo ne!

¹⁰Zeene bdziṅ me Jerusalén, rlozhd gzee zdoo grē miech ne ndxie ga, rnabdiidzlsa zho rnee zho:

—¿Bay cho nac meṅ qui?

¹¹Rquiab grē zha ne naḷ zhits me ga, rnee zho:

—¡Lēē Jesús i! ¡Lēē meṅ Galilé qui, noteed xtiidz Dios lo miech!

Blee Jesús miech leṅ yadoo

(Mr. 11:15-19; Lc. 19:45-48; Jn. 2:13-22)

¹²Biini liu co, zeene bdziṅ Jesús Jerusalén stib, güey me yadoo nroob ne zob lad guiedz co. Bdziṅ me gon me nzian miech ne ndxie ga, masaque tib lgui quiayun zho, zha ne no wto, zha ne no wzi. Nacne güey me ptiixche me xmezha zha ne notsēē dimi, ptiixche me xmezha zha ne no wto palom; blee me zho ga grēse zho, ¹³rēb me lo zho:

—Led znu gon zhubnee lo Xtiidz Dios: “Zaatne nac lidz naa nu, nu none guiaad grēse miech sodiidznie zho naa.” Laa to gon, quiayun to lugar rii zig tib zhibliee ngbaan.

¹⁴Ga no me bdziṅ bla zha ne roḷd lo, zla zha ne nē ni, wbig zho lo me. Gzase zho beenguiac me. ¹⁵Nzian mēēdlas yeen ne ndxie leṅ yadoo ga, psilo win nguiedz rnee win: “¡Zha ndzontaa xingan rey David!”

Grē zha ne nac pxoz ne rnabey, ni grē maistr ley, zeene gon zho milagr ne been me ga, ni gon zho zha rnee grē mēēdlas co, rlēē zho, ¹⁶rēb zho lo me:

—¿Pe ib rond luu ganle pe nonee grē mēēdlas qui?

Pquiab me rēb me:

—Ron naaw. ¿To waa, pe rande to ganle zha zhubnee lo Xtiidz Dios, zaatne raquiet minē noyac nu? Led rneew lēē:

Haxta grē mēēdlas ne bii radz,

ye win rley win roolnie win me.

¹⁷Blozhse sca rēb me, zoque zho ga, laa me bio nēz zie me nēz Betain. Ga blēz me wdze co.

Wbidz tib yag guigw

(Mr. 11:12-14, 20-33; Lc. 20:1-8)

¹⁸Sil co zeene no me nöz gdziñ me Jerusalén, pcaabedz me. ¹⁹Goñ me zob tib yag guigw gax ro nöz, dzigo güey me güeyso me low dien pe ndziel tib nex low niow me. Bdziñ me goñ me loxaque zhiblagsew zëeb, nacne rëb me low:

—¡Lëe blozh xtse luu nu goñ! ¡Gdzindraa dze ne yquia nex lo luu!

²⁰Biini liu, zeene laa zho zie Jerusalén stib, goñ xpëedscuel me, laa yag guigw co bidzle. Bzee zdoo zho, bñabdiidz zho lo me rëb zho:

—¿Bui ganle, bay zha nacne squi znuse wbidz yag guigw qui?

²¹Pquiab me rëb me:

—Gneli naa lo to ganle, telne dib zdoo to rnaló to Dios, niicle ncuaañe mazdraa ngan gnab to lo me, zun mew. Lëeraasi none dib zdoo to gliladz to zaca, ni palal gacchopd guic to. ²²Grëse ncuaañe gnab to zeene rzodiidznie to me, zneedz mew, totsaque dib zdoo gliladz to laa to ycaaniaw.

²³Bdziñ me Jerusalén, wbiire güey me len yadoo. Ga noseed me miech, zeene bdziñ bla zha ne nac pxoz ne rnabey ni zla zha ne nac men non lo mengüiedz, bñabdiidz zho lo me rëb zho:

—¿Cho dzigo nac luu ne squitaa ziaadnabey luu len yadoo? ¿Cho rnabey luu?

²⁴Pquiab me rëb me lo zho:

—Ye naa laa naa gun tib wñabdiidz lo to. Telne stsire to low, dzigo gni naa lo to ganle cho rnabey naa ne laa naa noyun grë ncuaañe noyun naa. ²⁵Golñë dien, ¿cho pxeel Juan Bautist biaad me pchoobnis me miech? ¿Pe Dios pxeel me, te miechsew ye?

Psilo zho rñabdiidzlsa zho dien zha ctsire zho lo xtiidz me, rnee zho:

—Telne dzieets ne Dios pxeel Juan, dzigo laa me gnë: “¿Pex nac dzigo waa bliladzde to minë bnee me?” ²⁶Tel na dzieetsgaa ne, miechse pxeel Juan, grieequiadaque ne.

Rdzieb zho niab zho miechse pxeel Juan, sac nan mengüiedz nli Dios pxeel Juan biadteed Juan xtiidz me lo miech.

²⁷Dzigo mazd minë been zho rëb zho lo me:

—Ndiond no dien cho pxeel Juan.

Dzigo rëbchaa me lo zho:

—Niicle naagaa nagon, grieelod gni naa lo to cho rnabey naa quiayun naa grë min rii.

Zha nac zha ne rond diidz

²⁸Golquiaadiaga ganle. Tib mgui, quianie me chop mëëdbgui. Tib dzew, bredz me tib zho rëb me lo zho: “Xin, none goñ tsie luu nadze, tsietop luu uv xcuaa ne.” ²⁹Pquiab zho rëb zho: “¡Gad naa!” Wdzeelaaw, bien zho nongüelda ga sca gun zho, dzigo bio zho nöz güey zho. ³⁰Laa stib zho, zeene bredz me zho bñabey me zho tsie zho lo dziin, rëb zho: “Peet nacda, na maase ga naa.” Blozh ga pasë zho nie.

³¹ 'Golnë dien, lo grop mēēd co, ¿cho nac zha ne bin xtiidz pxoz?

Pquiab zho rēb zho:

—Zha glo cow.

Dzigo rēbchaa me:

—Gneli naa lo to ganle, miñcodaa quiayac nu niina: Grē zha ne rzac to mazdraa ngoopdol, zig nac grē zha ne rtop dimi ne razh lo zha Roma, zig nac grē wnaa ro nēz, mazd glole zha co nozēēb xnēz Dios, lēdle to. ³² Biaadpaa Juan Bautist name biadseed me miech csaan zho xquiełntseeb zho, gban zho zigne racladz Dios, ni pe liaadz to nion to miñe rnee me. Mazd grē wnaa ro nēz, grē zha ne rtop dimi ne razh lo zha Roma, znuse psaan zho xquiełntseeb zho. Laa to, niicle ran to nosaan grē zha co xquiełntseeb zho, per ib rsaande to miñe nac to.

Xcuent zha ne pquianap liu

(Mr. 12:1-12; Lc. 20:9-19)

³³ Dzigo bzodiidz me stib cuent lo zho rēb me:

—Tib men name, nroob lbē uv beenbni me lo liun me. Psilo me ptse me igose liu co, bzaa me zaatne gzhii grē uv co, ni bzaa me tib yu glaa zaatne sob zha ne yquiaanapa. Blozh ga, blediin me liu co lo bla zha ne ran liu, dzigo laa me brieē, laa me zey zit.

³⁴ 'Zeene gol mēē ne laa nex co gol, pxeel me bla zha ne quia xtsiin me zie lo zha ne quianap liun me ga, parne gdeed zha co uv ne rieguial me ycaa me.

³⁵ Per leł bnaaz zho zho, zha ne blooquie zho, zha ne bdeedgolp zho, haxta beet zho tib zho. ³⁶ Wbiire pxeel me zla zho, hor cole nzianraa zho pxeel me, per niapse sca psacsi zha co zho.

³⁷ Tibaque zeene pxeelaque me xpēēd me, bza guic me rēb me: “Ganse zho xpēēd naaw, zon zho miñe gnee me.”

³⁸ 'Pex nion zho diidz, zeene gon zho xpēēd me, rēbchaa zho: “¡Lēē zha qui nagon guiaannie liu rii! ¡Golgotsaa dziuut ne zho, zeena guiaana lo ne!”

³⁹ Dzigo bnaaz zho xpēēd me, güeynie zho me zaatne nac tib lad lo liu co, ga güeygut zho me.

⁴⁰ ¿Zha sca dien rzac to gun bizhuan liu co gza zha co, zeene laa me gbire?

⁴¹ Pquiab grē zha ne nac pxoz ne rnabey, ni zha ne nac zha non lo menguedz ga, rēb zho:

—Ni lalnu yquiad zdoo me zho, znitlogazh me zho. Lozhse ga, cuediinga me liun me lo zla zha ne gundziina, zha ne guien gdeed nex ne rieguial me ycaa me.

⁴² Dzigo rēbchaa me lo zho:

—Haxta lo Xtiidz Dios no tib zaatne znu rnee, ¿pe gard ganle glab tow? Rneew:

Quie ne psēēb zha ne nozaa yu,

ni nanđ zho lēēpaa quie co nac miñe rnazdziits yu.

¡Ncuaañe gzee zdoo new! Sac Dios bnabey sca goca.

⁴³Gacnaṅ to gaṅle, scadaa nagon griece to lad grē zha ne ngab lo Dios, parne gbig zha ne tsoxcopaa guṅ xtsiin me, zha cole guiaan xlugar to. ⁴⁴Zha ne tsietsoobe lo quie ne raquiet ga, zac zho zig tib ncuaaṅ rac tsoṅ tap lē; laa tel lēegaaw tsoobe lad zho, zac zho zig tib ncuaaṅ die die rac.

⁴⁵Grē zha ne nac pxoz rnabey ga, ni grē zha farisé, zeene blozh pquiaadiag zho cuent ne bzodiidz me lo zho ga, bien zho zha ga rzeet me. ⁴⁶Nacne gocladz zho naaz zho me, per bdziebaque zho; sac ndal miech rleynie me, niicle ne rzac zho tib zha ne noteedse xtiidz Dios nac me.

Zha ne nēd sēēb xnēz Dios

22 Bzodiidz Jesús stib cuent lo zho, rēb me:

²—Grē zha ne rbedz Dios ygab zho xnēz me, none tsoxco zho gon zho miṅe rnee me; sac nenda gdzieelo zho zig bdzieelo zha ne bredz tib rey co nie zho lo zhilni xpēēd me.

³Tib rey name, ziaadyob ctsieelnia xpēēd me, nzian zha ne bredz me tsie lo lni. Zeene laa dze co bdziṅ, pxeel me zha ne quia dziin lo me zietsedz grē zha ne bredz me lo lni ga, per nēd zho nienal zho. ⁴Wbiire me pxeel me zla zho rēb me: “Gołtsietsedz zho, gołguiab, laa guielwagw ne yquiiṅ goclole, siguiel zho na guiaad zho.” ⁵Per ib beencasd zho zha ne pxeel me ga, no zho briece zie lo xcuaa, no zho briece zie zhiwto, ⁶nogaa zho lel bnaaz zho zha co, psacsi zho zho, beet zho zho.

⁷Zeene gon me sca been zho, blēe me, bnabey me grē xmenguiib me güey zho güeygut zho grē zha ntseeb ne psacsi xmandad me ga, ni bnabey me bzēēg zho guiedz co. ⁸⁻⁹Blozh ga biire pxeel me zla zho, rēb me: “Laa guielwagw rii goclole, miṅe naca gołtsie tib nēz yu, zha ne gdzieeltaa to, gołcuedz zho guiaad zho lo lni; sac grē zha ne bredz naa ga niaad, laa zho blule gaṅle rieguiald zho guiaad zho nu.”

¹⁰Dzigo briece zho güey zho, miech ne bdzieeltaa zho, zigtaa zha ndzinliw, zigtaa zha ntseeba, grēse zho bredz zho bdziṅnie zho zho lo lni. Goł hor wagw, biodzēse len yu ndxie miech. ¹¹Zeene laa rey bzēēb zienee me lo zho, gon me lad co no tib zha co nacwxabd zho zigne rieguiald gacwxab zha ne sca rie tib lo guieltsieel. ¹²Dzigo rēbchaa me lo zho: “Bets, ¿pe nacne squise luu bzēēb luu nu, bui gaṅle nacwd luu lar ne bneedz zho niacw luu?”

¹³Dzese zob zho, rdzielz zho pe guiab zho lo me. Gonse me sca rac zho, ¹³bnabey me zha ne nodziib lo mezh rēb me: “Gołzobdoo zha rii, gołxidoo grop nia zho, grop ni zho, gołcuee zho nu gołtsieron zho lo ncow nēz ley. ¡Ga nac zaatne rieguiald zho, ga gaṅ zho guielnē dox ne no ted zho, goonnē zho, haxta gow lay zho!”

¹⁴Mincodaa nagon rac len dze rii —rēb Jesús—, ndal zha ne racredz sēēb xnēz Dios, per zhis nac zha ne rioxco rzēēb.

Pe nonguiel quizh miech contribucion

(Mr. 12:13-17; Lc. 20:20-26)

¹⁵Blalaa zha farisé ne ndxie ga güey zho bnediiz zho dien zha gungüet zho Jesús cxin me tib diidz, zeena miṅ co yquiaaqui tsiezo zho me lo wxtis.

¹⁶Dzigo pxeel zho bla zha ne nacgrë zho, ni güey zla zha ne racnie Herod gogza zho. Bdzin zho rëb zho lo me:

—Maestro, ndion no niapse diidzli ziena luu, ni scagaa zeene rseed luu miech, rdziebd luu mine nac diidzli min co rnee luu lo zho. ¹⁷Gane niina, racladz no gnë luu dien pe nonguiela ga rdeed no dimi ne razh lo rey ne zob Roma, te nonguiel da ye.

¹⁸⁻¹⁹Bienga me racladz zho gungüet zho me, dzigo rëbcha me lo zho:

—¿Pe nan to na riend naa pe no guic to? Masaque rëb to na lëë, znuse gungüet to naa. Golneedz tib pes ne rguizh to nu ganle.

Dzigo bdeed zho tib pes plat lo me. ²⁰Blozh ga, rëbcha me lo zho:

—¿Cho nu, cho lë nu quia lo pes rii?

²¹Pquiab zho rëb zho:

—Lëë rey i, lëë lë me i quia lo qui.

Dzigo rëb me lo zho:

—Mine rieguial sca ycaa rey, goldeeda lo rey; scaquegaa mine rieguial ycaa Dios, lo Dios goldeeda.

²²Zeene gon zho sca ptsire me lo xtiidz zho, bzee zdoo zho, mazd mine been zho laa zho wbichese ga, laa zho zey.

¿Pe nli zrieeban miech?

(Mr. 12:18-27; Lc. 20:27-40)

²³Dze coqew, güey bla zha saducé lo Jesús. Nac zha saducé riladzd zho dzin dze grieeban miech. Dzigo bdzin zho, ²⁴rëb zho lo me:

—Maestro, znu psan Moisés diidz: Telne glo mgui guet lo wnaa ne nac tsiel mgui, ni gopd wnaa mëéd, dzigo none betsaque zho ctsieelnia wnaa co stib, zeena gap wnaa mëéd ne guiaan xlugar xpëéd zha ne gut ga.

²⁵Bio tib dii zha co znu bzhaac, gadz bets nac zho. Ptsieelnia zha ne nac zha gol, zeene laa zho gut biaand xpëéd zho. Dzigo ptsieelnia stib bets zho wnaa co. ²⁶Blozh ga gutaque zha co, pa së zho nsan mëéd. Ptsieelniaque me stib zho, goc zho tson, niicle zha co psandaque mëéd. Sca sca haxta bza gza gadzse zho ptsieelnia me, ²⁷tibaque zeene yeque me laa me gut. ²⁸Mine racladz no gacndion no, ¿chopaa dzigo gac tsiel wnaa co zeene laa zho grieeban? Sac gza gadzse zho ptsieelnia me.

²⁹Pquiab Jesús rëb me lo zho:

—I nagon laa to rxin, mine naca riende to zha nac Xtiidz Dios, niicle riladzde to zrieelo me gun me ncuaan ro ne gard gan miech. ³⁰Sac gon zeene gal dze ne laa grë miech grieeban, niicle mguiw niicle wnaaw led yedraa hor co dien cho ctsieelnia zho; sac hor co laa zho gac zig nac grë anjl ne no gbaa. ³¹Stiba, ib nli zrieeban mengut. Mod rande to zha zhobnee zaatne raquiet zeene rëb Dios: ³²“Naa nac Dios ne riladz Abraham, naa nac Dios ne riladz Isaac, naa nac Dios ne riladz Jacob.” Niicle ne gutle gza zha co hor co, per zeene sca bnee Dios gase rlu mban zho no zho lo me; sac tel Dios, inacd me xDios mengut, sinque xDios zha mban nac me!

³³Grè miech ne ndxie ga, zeene gon zho sca ptsire me lo xtiidz zha saducé co, rzee zdoo zho.

Xley Dios miñe mazdraa non

(Mr. 12:28-34)

³⁴Grè zha farisé ne ndxie ga, gon zho sca psioog Jesús ro grè zha saducé co. Hor co biire grè zha farisé co bzodiidz zho stib. ³⁵⁻³⁶Lad zho no tib maistr ley, dzigo wbig maistr ley co lo Jesús, rëb zho:

—Maestro, lo grè xley Dios, bzhiguiel bnë lo naa dien, ¿pa miñ nac miñe mazdraa non?

Sca rëb zho, sac gocladz zho niungüet zho me. ³⁷⁻³⁸Pquiab me rëb me lo zho:

—Lëë miñe mazdraa non nu znu rnee: “Dib zdoo luu, dib xalm luu, dib guielbiini ne no guic luu, bleyne Dios, men nroob ne rnabey luu.” Lëew nac miñe mazdraa non, ni lëew gloopaa raquiet lo grëse ley. ³⁹No stib miñe rnee: “Bleyne samiech luu zigne rleyne luu luu.” Ye miñ rii nona, meraque lala con miñ glo. ⁴⁰Zha ne gban zigne rnabey grop ley rii, lëële grè ley ne psan Moisés ga, lëële grè zhiwseed zha ne biadteed xtiidz Dios ga, zienal zho.

¿Cho xpëed nac Crist?

(Mr. 12:35-37; Lc. 20:41-44)

⁴¹⁻⁴²Gon Jesús nzian farisé ndxie lo me ga, nacne bnabdiidz me lo zho rëb me: —¿Zha dien rzac to guiaad Men ne zëëble diidz ga cxeel Dios? ¿Cho lo xtii grieequia me?

Pquiab zho rëb zho:

—Lo xtii David grieequia me.

⁴³Dzigo rëbchaa me lo zho:

—¿Pe scaw sca? Zha nac waa zeene bdeed Espíritu Sant guielbiini lo David bzeet David men co, rëb David me nac men ne rnabey David. Golgan ganle znu bnee David:

⁴⁴Rëb Dios lo men ne rnabey naa:

“Cue naa nëz derech, nu bzob,

nieeda lozh gnaz naa grëse zha ne rlëë lo luu, csan naa zho ladznia luu.”

⁴⁵Gase nagon telne nli zha xtii David gac Men ne cxeel Dios ga, ¿zha nac dzigo rnee David men co rnabey David?

⁴⁶Ni tib zho ib bdziidz zho zha ntsire zho lo xtiidz me; desde dze co ni stib zho biazhdraa pe nabdiidz zho lo me.

Miñe nac maistr ley grè zho zha farisé

(Mr. 12:38-40; Lc. 11:37-54; 13:34-35; 20:45-47)

23 Dzigo psilo Jesús bnee me lo grè miech co, ni lo xpëedscuel me, ²rëb me lo zho:

—Grè maistr ley ni grè zha farisé ib lëë xtsiin zho ga, nac cseed zho miech zha nac ley ne psan Moisés. ³Golguien golgon xtiidz zho, ¿per nsin golso, ib

gunde to mine run zho! Nac zho, ni lalnu rund zho mine rseed zho miech. ⁴Rio zho rnee zho lo miech, min rii, min rii rnabey ley gun to, ni per ni zha rioxcod zho siquier csilo zho gun zhow.

⁵Grè ncuane run zho, laaw runse zho par ganpaa miecha! Par guiab miech nguzobdiidz zho lo Dios, rio zho led zhid nzhen grè lo cint rquiaa zho Xtiidz Dios, rlozh ga rzhidoow yan nia zho, rzhidoow quia zho ne. Lar ne rbix zhow, rlozhd dieen peraa rquia lada, xab zhow, haxta zhits ni zho rbiba. ⁶Zeene rbedz miech zho tib wagw nroob, rdziladz zho zhapaa rzob groł mezh, niicle len yadoogaaw, zaatne glupaa zha non nac zho, ga rzob zho. ⁷Ro nēza, rdziladz zho ndooladz gnee miech bdiuzh lo zho, zeene rnee miech “zha rac”, “zha non”, nac zho, rlozhd gley zho.

⁸Sangue to gon yguibde to dien zha gnee miech “zha rac” nac to, sac tibaque men rac no, lēē me ga zēēble diidz cxeel Dios; golguien ganle tel to lalga nac to, rriequia bets to grè to. ⁹Ib gunde to zig run grēraa miech, runnon zho tib samiech zho rnee zho lēē pxoz zho ga, sac tibaque men ne nac Pxoz to, lēē men co no gbaa. ¹⁰Yguibde to sac miech topaa gunctsin zho lo Dios, sac loxaque Men ne nole diidz ga cxeel me, men cose zrieelo gunctsin zho lo me. ¹¹⁻¹²Nodne gacglaa to lo samiech to, mazd ndooladz golgac lo zho, sac zha ne racglaa, ziaanwin zho. Gacxe waa, telne racladz to gacnon to, none ndooladz gac to lo samiech to.

¹³Probsaxe to maistr ley, probsaxe to zha farisé! Lēda i gon noyun to, rzac to noxco to sēēb miech xnēz Dios, per lel noca to sēēb zha ne racladz sēēb. Ni stiba, per ni to nod xnēz me. ¹⁴[i]Probsaxe to! Guielntseeb i gon run to, rio to rlozhd gool to xlay to rzo to ro nēz, ni noque to rla to ncuane rapse grē wnaa viud; ib tedsod gon guielnē dox ne ygaa to.]

¹⁵Probsaxe to, rzac to na lēēw ga run to! Rio to gui dan rbix to, haxta rded to nisdoo, rquiaguib to dien cho sēēb xnēz to ni rlozh ga laa ne ygab zho nēz lo Dios, lel nēz len gabil zienie to zho.

¹⁶Probsaxe to, nac diidz name to noseed miech, ni per ni to riend pe rnee to! Rnee to lo miech: “Zha ne rzeet yadoo ni tel gund zho mine rnee zho, peet nacd ga, per tel gzeet zho grè or ne no len yadoo ni gund zhow, dol ga gun zho.”

¹⁷Probsaxe to, nadzpaanxen to, nadzpaan cow nac guic to! ¿Niacxe mazdraa non or lo yadoo? Golguien ganle por yadoo, naclay grè or co. ¹⁸Rneeque to: “Zha ne gzeet lo pcoog, led dollda telne gund zho mine rnee zho; per tel gzeet zho gon ne ndziib lo pcoog ni gund zhow, dol ga gun zho.” ¹⁹Pe nlipaa rnee to peet riende to! ¿Niacxe mazdraa dzigo non gon que lo pcoog? ¿Pe rande to por lo pcoog co raclay gon? ²⁰Golguien ganle, zha ne rzeet lo pcoog, yele grè ncuane ndziib low ga quiazeet zho; ²¹zha ne gzeetgaa yadoo, haxta Diosle ga gon rzeet zho, sac ga rbēz me. ²²Scasaque zha ne gzeet gbaa, zaatne rzoble Dios ga nozeet zho, masaque rriequia me ga rzeet zho.

²³Probsaxe to maistr ley, probsaxe to farisé! Rzac to na demas nguzobdiidz to lo Dios, rio to haxta grè guizh bitxtil, guizh nizh, guizh comin run to tsi

lal, rdeed to tib lala mine riegual tsiesan to yadoo, laa ley ne mazdraa non zienied guic to gun to mine rnabeya. Nli rieguiala gdeed to grè gon co, per none scaque tsoxco to gun to mine nac diidzli, none yquia zdoo to samiech to, none dib zdoo to gnalo to Dios. Min rii nac mine mazdraa non.

²⁴ ;Ne nlipaa ib riende to pe quiayun to! Rzac to na noxco to guntalde to xtol to, masaque ni tib ngurudz rsaande to tso lo ncuaane row to, ni riende to rriequia haxta tib camell rab to. ²⁵ ;Probsaxe to, masaque nac to zig tib plat, zig tib tas ne nèz zhitssew mbe rna, laa nèz lena rnadraa! Laglaase rquiaalo to miech wen nac to, per tibaque noban to, tibaque nosacsi to samiech to.

²⁶ Golguien none glo csaan to xquielntseeb to, none gac to zig tib plat zig tib tas ne zigtaa mbe nèz zhitsa, scagaa mbe nèz lena. ²⁷ ;Probsaxe to, nac to gon zig grè baa ne dieen paraa nquitsbie rna! Niow rlu nèz zhitsa, laa nèz lena loxaque grè ncuaan biodz, loxaque grè dzit ngutoo nodzè. ²⁸ Sca gon nac to, ne rac to zootxe luu waa nli miech ndzinli nac to, per nèz len zdoo to loxaque zhgab ne dien zha yquidie to miech, zha csacsi to miech no to.

²⁹ ;Probsaxe to maistr ley, probsaxe to farisé! Ni lalnu guielto guiend lo to, rio to rzhixcuua to ro xpaa grè zha ne biadteed xtiidz Dios, ni lèepaa grè pxozgol to beet zho. Dieen peraa run to rquiaalo to rsoladz to zho. ³⁰ Rnee to: “Telne niaca mine nole ne len dze co, ndeete ne diidz nsacsi xmengol ne grè men rii.” ³¹ ;Lèèque to gon nobeero ga, zha nactaa lo dii ntseeb ne ziaad to! ³² ;Scaque nasca golgun! ;Goltsienal grè mine been pxozgol to ga! ³³ ;Miech ngoopdo! ;Zhin mendox! Telne csaande to xquielntseeb to i, ib tedsod gon gabil guey to.

³⁴ Grè zha ne cxel naa, zig nac zha ne guidteed xtidz naa, zha ne nacnie Espiritu Sant, zha ne yгаа guielbiini yquiaa zho mine gnabey Espiritu Sant zho, ib tedsod sacsi to zho. No zho gutgazh to, no zho yquiaa to lo cruz, no zho lèèque len xyadoo to gdeed yag to zho, ib gandzede to zho, stib guiedz, stib guiedz tso to ctsidil to zho. ³⁵ Blactaa grè miech ne sca peet xtold ziyut to grè xmengol to, psilow desde Abel haxta Zacarí xingan Berequí, men ne beet xmengol to zaatne nac gax lo pcoog len yadoo. Ni ye to gon zèèb xchen grèse zha co. ³⁶ ;Gneli naa lo to ganle, grè miech ne gon mban len dze rii, grè to zho yгаа guielnè dox ne tsieguial to por grètaa guielntseeb co!

³⁷ ;Aque tow men Jerusalén! ;Pe nacne squitaa nac to, rut to zha ne ziadteed xtiidz Dios lo to, rgoquie to grè zha ne rxeel me lo to? Blactaa gocladz naa, niacnie naa to, nquianaap naa to, zig run nguid rguedz ma xpèèd ma, per bzhiguielde to. ³⁸ Gacnan to sca ganle, nadzetaa gon laa lidz to nu guiaan ngan, ³⁹ sac gandraa to naa, haxta gal dze ne guiab to: “;Zha ndzontaa men qui pxeel Dios lo ne!”

;Nsin golso!

(Mr. 13:1-23; Lc. 17:22-24; 21:5-24)

24 Laa Jesús zieriee len yadoo grè xpèèdscuel me, zeene pcuèèdzde zho me, rèb zho:

—Gotsaa gwi ne ganle zha niaataa yadoo rii.

²Blozhse bui zho low, rëbchaa me lo zho:

—Niicle squitaa nagon niaaw, per zdziñ dze ne nitlow dib nacsew. Ni stib quie qui guiaandraa zigne squi zhoxcuaaw i.

³Briee me len yadoo ga grë me zho, laa zho zie nëz Gui Oliv. Bdziñ zho cho gui co, ga bzob me grë me zho. Dzigo wbig gax bla zho lo me, bnabdiidz zho rëb zho:

—Bzhiguiel bnë lo no dien, ¿pa hor dzigo gac mine bzeet luu ga? ¿Zha glu zeene laa luu ziaadyoble guiaad? Zeene nitlogaa guidzliu, ¿zha gacndion no laa dze co ziaadyoble?

⁴Pquiab me rëb me lo zho:

—Nsin golso, zeena choot yquidiede to. ⁵Sac nzian zha ne griequia guiab zho zha nac Men ne zëëble diidz cxeel Dios; ni nzian miech ne yquidie zho.

⁶Zeene gon to nëzrii nëzrec noxtseeb csilo diñ, guiabde to togo lëële dze ne guial naa ga bdziñ; sac niicle noyacle diñ, noxtseebragaa pa csilo gaca, led lëdle ne nitlo guidzliu ga. ⁷Garaa csilo grë diñ dox, grë guiedz nroob laaw tiñie saguiedz nrooba; grë zha ne rnabey grë guiedz nroob, laa zho tiñie sazha rnabey zho. Nëzrii nëzrec csilo gni grë zho dox, nzian zaatne gan miech gbin.

⁸Ni lega loxaque mine rsilosew ga, sac nroobraa guielnë ne gan miech lozh ga.

⁹Zeene laa grë ncuuan rii noyac, ¿nsin golso! Sac hor co laa miech tsielo to ladznia zha ne csacsi to, haxta zut zho palal to, grëse miech stsidil zho to loxaque ne nac to zha ne no xnëz naa. ¹⁰Nzian zha ne nole xnëz naa, len dze co laa zho gbiche, laa zho csilo lëëque zha glëënie zha ne nacgrë zho, haxta zielo zho zho ladznia zha ne gut zho. ¹¹Len dze co zrieequia nzian zha ne yquidie miech guiab zho xtiidz Dios noteed zho, ni nzian zha ne gliladza.

¹²Grë zha ne nole xnëz naa, zeene gan zho grëtaa guielntseeb, grëtaa dol ne quiayun miech len dze co, ndal zho gleyniedraa zho Dios dib zdoo zho. ¹³Per zha ne tiblque gac, gbiched zho lo Dios, niicle tel petaa gan zho noyac, zha co gac zha ne gdziñ lo me. ¹⁴Niicle scataa noyac grë ncuuan co, ib none ygaaz Xtiidz Ndzon Dios lo grëse miech, grëtaa zaatne ndxie miech laa zho gacnana; lozhraa ga dzigo laa guidzliu rii nitlo.

¹⁵Zeene gan to zaatne nac Lugar Nda len yadoo, zo tib ncuane rieguiald so ga, tib ncuane ziaad gnitlo, zigne bzeet Daniel men ne biadteed xtiidz Dios (zha ne glaba, none guien zho zha naca), hor co golguib dien zha xoon to. ¹⁶Zha ne no grëraa guiedz ne ngab Judé, none xoon zho tsie zho dan, ga tsietsolan zho. ¹⁷Zha ne lëëtaque hor co no glaa guic lidz, none lëëled xoon zho, ib guiabd zho sëëb zho len yu tsiebee zho ncuane rap zho. ¹⁸Zha ne quiagaa lo dziin dan, ib gund zho tsie zho lad guiedz tsiexi zho xab zho. ¹⁹¿Prob grë men wnaa ne lëëtse len dze co zoney xpëëd, men ne quianiegaa mëdyeen ne bii radz!

²⁰Golnab lo Dios gande to guielnë co len mëë ne rac nal, dze ne rdziiladzga lo lo dziin. ²¹Ne nligaa guielnë doxa. Wlal ne biaan guidzliu haxta lo nadze, gard gan miech tib guielnë dox sca, ni gandragaa zhow ted ga. ²²Telne csaan

Dios nroob dze gac guielnè co, ni stib miech rii guiaandraa; per na por grè zha ne bzooblo me sèèb xnèz me, gdeete me diidz gaca nroob dze.

²³Zigne rne naa ga, len dze ne scataa gan miech grè dil co, zha ne gnè lo to: “Goltè nu ganle, lèè Men ne nole cxeel Dios ga blanso nu”, gnègaa zho: “Goltie nec ganle, laa me bdziñ ga”, gliladzde tow. ²⁴Sac zrieequia zha ne yquidie guiab zho zha nac men co, zrieequia zha ne guiab xtiidz Dios ziadteed zho lo miech, zun zho grè milagr nroob, parne yquidie zho miech, haxta zha ne nole xnèz Dios, zguib zho dien zha gdeeda diidz yquidie zho zho. ²⁵ἸNsin sca golso! Benque laa naa nilew lo to. ²⁶Nligaa zha ne gnè lo to laa men ne pxeel Dios ga blansole, gliladzde tow. Nenda cxeel zho to tib dan zit, gnè zho: “Goltie ganle laa me no ga”, gnègaa zho pa tib len yu ne no me, ni tib xtiidz zho gliladzde to. ²⁷Sac zeen gal dze ne guiaad me stib, gacda ncuuan ngeets zhliaan, grèse miech gan me. Zig tel guiab tib belye nroob ne glu zhan gbaa, desde nèz ne rlan ngbidz haxta nèz ne rzèèb ngbidz, ἵnfacxe gand grèse miecha? ²⁸Zlupaa zeene laa me guiaad; nanle to ganle zaatne nix ma gut, ga rcaalsa pech.

Ziaad Jesús stib

(Mr. 13:24-37; Lc. 12:41-48; 17:26-30, 34-36; 21:25-33)

²⁹Zeene lozhse gan miech grè guielnè dox co, laa lo ngbidz ycow, gziinidraa mèè. Grè mel ne ndziib gbaa, laa ma gliaal; grèraa ncuaaane no gbaa, masaque nèzrii nèzrec gaca. ³⁰Hor co zlu ganle zeene laa Mgui ne pxeel Dios ga ziadzèèb lo xcow, con grè guielndzon, con grè poder ne rap me, grèse miech mban gac zho, zoon zho gan zho me. ³¹Grè xanjl Dios, hor co laa Dios cxeel zho tsiecuedz zho zhitrompet zho parne ycaalsa grèse zha ne ngab xnèz me, tel pa lotaa lo guidzliu no zho.

³²Golzooob cuidad zha nac yag guigw. Led nanle to ganle, zeene laa grè zhicwa racnieen, ni rsilo rdzib zhiblaga, gase rlu ne laa mèè nèèg ziaadgaxle. ³³Scaque nagon zeene gan to laa grè mine rne naa lo to nu rsilo noyac, dzigo nanle to laa dze ne guiaad men co ziaadgaxle. ³⁴Gneli naa lo to ganle, nzian miech ne mban niina bii zan zho zeene laa grè ncuuan co csilo gac; sac ible ncuaaane gaca. ³⁵Zdziñ dze ne nitlo gbaa, nitlo guidzliu, sangue mine rne naa lo to nu, nitloda; ible laaw none gac.

³⁶Lèèraasi choot nand dien pa dzew, dien pa horgaaw, per ni grè anjl ne no gbaa, per ni naa nanda, loxaque Pxoosze naa nana.

³⁷⁻³⁹Nanle to ganle zha bzhaac miech len dze ne wban Noé, ib bliladz zho xtiidz me. Guxt no zho lo zhilni zho, zha ne notsieelnia, zha ne nobediingaa xpèèd, laa dze bdziñ laa Noé bzèèb len barcw; tibaque zeene baa zho biini laa guie dox co nonitole zho. Scadaa nagon sac grè miech nad rii, tibaque zeene tsaa zho biini laa Mgui ne pxeel Dios ga ziaadle. ⁴⁰Hor co zaatne quia chop mgui lo dziin dan, tib zho tsienal zhits me, stib zho guiaan. ⁴¹Zaatne quiyot chop wnaa, tib zho tsienal zhits me, stib zho guiaan.

⁴²’iNsin sca golso, sac gon nande to dien pa horpaa guiaad me, benque laa vis racle lo to! ⁴³Golgan ganle, tel niaca mine gacnan miech laa ngbaan tsieban lidz zho guieel, per nand zho dien pa horpaaw; ĩniacxe zaaguies zho? Led sobna zho lëë, nsin nsin so zho. ⁴⁴Scaque to nagon, none nsin so to, sac gon lega naclew zeen gan to laa me ziaadle.

⁴⁵’Golgan ganle, masaque laa to gac nagon zig tib ngundziin ne riaannie ro lidz men ne rquia zho xtsiin.

’Ngundziin ne ndzinli, zeene laa men ne quia zho xtsiin ga griee, ine niowse guiaan zho guiaannie zho grëraa zha ne no lidz me. ⁴⁶Zha ne sca gun, ĩwen tsie zho, sac zeene gbire me gan me scataa noxco zho dziin ne pso me zho, zianzuiu zho lo me ⁴⁷haxta so me zho, zha yquiaanap grëse ncuaane rap me!

⁴⁸’Tel ngundziin yozhgaaw, mine tsienie guic zho guiab zho gbireniobd men ne quia zho xtsiin ga, ⁴⁹csilo zho csacsi zho grëraa zha ne nac ngundziin, csilo zho ctsieelsa zho grë ngonziu tso zho loxaque gzudz zho, loxaque gowcho zho, ⁵⁰tibaque zeene gan zho laa me bdziñle. ⁵¹Zha ne sca gun, per peraa dien gun me, ib tedsod nroob caxtigw ne cteed me zho, sonëz me zho guey zho zaatne no grëraa zha ne rond diidz, ga tso zho grë zho zha co goonnë zho, haxta gow lay zho lo guieñë dox ne ted zho.

Zha bzhaac tsii wnaa nguieg

25 Blozh ga rëbchaá Jesús lo zho:

—Par sëëb miech zaatne rnabey Dios, masaque naca zig rzëëb miech tib lo lni zaatne noyac tib guiełtsieel.

’Tsii wnaa nguieg name, brieë zho zixinëz zho mgui ne ctsieelnia, tib tib zho bise zho psin win ne rec nceit ne rziini. ²⁻⁴Gaay zho goc ligier pcodzëë zho zhipsin zho nceit, ni zhaaque bi zho zniipa; laa zgaay zho gocnroladz, zigne bzheñse zho psin co scase bi zhow, bid zho nceit ne niodzëraaw.

⁵’Goc pa hora rio zhimcaalo zho, ni rdziñdaque mgui ne zixinëz zho ga, tibaque zeen laa zho pquia mcaal. ⁶Goł groł guieela, zeen laa vis rac, laa mgui co ziaadle, zha ne zixinëz me ga, zac griee zho tsiedzieel zho me. ⁷Lëëłëd brieë mcaallo gza wnaa nguieg co, psilo zho nozhixcuaa zho zhipsin zho. ⁸Zeene gon gza zha nroladz co ygaadraa zhinceit zho, dzigo bnab zho lo zgaay zha co, gdeed zho niip nceit yquiin zho, sac laa zhipsin zho noyuule. ⁹Pquiab zho rëb zho: “Grieeloda, sac mine yquiinse zhipsin no ziaadnie no. Mazd gołtsie zaatne rto zhow, ga gołtsiexiw.”

¹⁰’Per lo lal ne zixi zho nceit, laa mgui co bdziñ. Zeene wbire zho, laa ro yu nioogle, loxaque gza zha ne nsinle zo ga, zha cose bzëëb len yu. ¹¹Dzigo psilo zho, rcaan nia zho ro yu, rbedz zho mgui co cxal me ro yu sëëb zho. ¹²Per bdeete me diidz nzëëb zho, rëb me: “Runbeyd naa to gon, nand naa dien cho nac to.”

¹³’iNsin sca golso! —rëb Jesús—. Sac gon nande to pa dzepaa, pa horpagaa gbire guiaad Mgui ne pxeel Dios.

Zha ne biaannie dimi

¹⁴ Mgui ne pxeel Dios ga, ziaad gac me zig tib men ne no greee tsie tib viaj zit.

“Tib men name no greee me tsie me tib guiedz zit, dzigo bredz me zha ne run dziin lo me, bdeed me palalga xtimi me lo zho gundziin zhow len dze ne guien me ga. ¹⁵ Tib zho pcaania gaay mil pes plat, tib zho chop mila, stib zho pcaania tib mila. Tib tib zho, bdeedse me mine rgobey me grieelo zho gundziin zho, dzigo laa me brieer laa me zie.

¹⁶ Zha ne biaannie gaay mil pes plat co, güey zho bloonon zhow, beena gan zgaay mila. ¹⁷ Zha ne biaannie chop mila, ye zho güey zho bloonon zho dimi co, scaque beena gan schop mila. ¹⁸ Laa zha ne pcaania tib mila ga, le güey zho güeyteen zho tib guieer güeyloliu zhow.

¹⁹ Goc bla iza laa men co bdzin, dzigo bredz me zho tib tib zho, tsie zho gzodiidz zho dien yo dimi ne biaannie zho ga.

²⁰ Bdzin zha ne pcaania gaay mil pes plat co, bdzinne zho xtimi me, reb zho: “Laa xtimi luu nu gon, lee gaay mil pes ne psan luu lo naa nu, laa zgaay mil min rii nac mine bdziniaaw.” ²¹ Rley me reb me lo zho: “;Zha squi nagon racladz naa! Rley naa ran naa squitaa ndzinli luu, squitaa nguzobdiidz luu; sac gon lo palalse dimi ne psan naa lo luu ga, bioxco luu zaacse bendziin luuw. Nana gon, nroobraa mine gnedz naa gundziin luu. ;Na bded, zeena yгаа luu gre guielbley ne quiayac nu!”

²² Blozh ga, bdzinaque zha ne biaannie chop mila ga, ye zho laa zho bdzinne xtimi me, reb zho: “Laa xtimi luu nu gon, lee chop mil pes ne psan luu lo naa nu, laa schop mil min rii nac mine bdziniaaw.” ²³ Pquiab me reb me: “;Squi nagon! Rley naa ran naa squitaa ndzinli luu, squitaa nguzobdiidz luu lo naa; sac gon lo palalse dimi ne psan naa lo luu ga, bioxco luu zaacse bendziin luuw. Nana gon, nroobraa mine gnedz naa gundziin luu. ;Na bded, zeena yгаа luu gre guielbley ne quiayac nu!”

²⁴ Zeene bdziintaa zha ne biaannie tib mila ga, reb zho lo me: “Nli bendziin naa xtimi luu, sac nanle naa zha nac luu, niicle paraa niundziin naaw, grese mine niuna gan lo luu niaana; ²⁵ gane mazd bialoliu naaw. Tib mil naca bneedz luuw, ledaaw nu.” ²⁶ Bleë guic me, reb me lo zho: “;Biche nu, paat rquiind naa miech yozh, miech nroladz ne squi nac! Conque nanle luu sca nac naa, ²⁷ ;pex nac dzigo waa bioxcod luu maase mbediin luu dimi qui, ndziniaaw palal ncaania naaw niina?”

²⁸ Dzigo rebchaa me lo zha ne ndxie ga: “Niinagazh golcob tib mil pes qui lo zha qui, goldeeda lo zha ne ziaadnie tsiw i. ²⁹ Sac zha ne rioxco rundziin ncuane rcaania zho, zacnroobraa ncuane yquianie zho. Laa zha ne squi nac, haxta mine pcaaniale zho, zdiooba lo zho. ³⁰ Golxen zha yozh qui, goltsiesan zho lo ncow nez ley. Ga gan zho guielne dox ne tsieguial zho, ga goon zho haxta gow lay zho.”

Zha gun Jesús guielwxtis

³¹ Blozhse bzodiidz Jesús cuent co lo zho, rebchaa me:

—Naa ne nac naa Mgui ne pxeel Dios, zeen gal dze ne laa naa guial stib, zialnie naa gre xanjla naa, zlu gretaa guielndzon ne rap naa, laa naa sob lo

xcan ne raguial naa soob naa. ³²Grëse miech ne ndxie dibdoose lo guidzliu, hor co laa zho gacredz lo naa, laa naa cueextso zho zig rbeextso baxtor chiv lad xpëcwxiil zho. ³³Zha ne no xnëz naa, zha co gdziñ naa cue naa nëz derech, laa zha ne nod xnëz naa, cue nëz revés.

³⁴Lozhse ga, naa ne nac naa men ne rnabey, hor co laa naa cuedz zha ne no xnëz naa, guiep naa lo zho: “Goltë grëse to, to ne nac to zha ne nziuu lo PxoZ naa. Goltëd zeena ycaania to zaatne cuëz to, ible par to bzaa mew desde zeene bzaa me guidzliu. ³⁵Sac zeene pcaabedz naa, bneedz to ncuaane dow naa; zeene bnaB zhis naa, bneedz to ncuaane go naa; zeene bial naa ladz to, bneedz to lidz to blëz naa; ³⁶zeene gon to guiend xab naa, bgacwxab to naa; zeene bzhacnë naa, zeene bio naa ladzguiib, biaad to biaadgan to naa.” ³⁷⁻³⁹See zdoo zho gnë zho: “;Per pa hor bneedz no ncuaane doow luu, ncuaane go luu, pa hor bneedz no zaatne blëz luu, pa horgaa bneedz no lar ne gotxab luu, ib bdziond no nzhaacnë luu, bdziond no niogaa luu ladzguiib?”

⁴⁰Dzigo guiep naa lo zho: “Gzobtaa hor ne gon been to xyudar zha ne nacgrë to, güeygan to zho, pcaaniagaa to zho, niicle zha ne bzoob miech peet nonda, rriequia xyudar naa ga been to, rriequia naa ga biaadgan to.”

⁴¹Laa zha ne ndxie nëz revés, hor co laa naa gzonëz zho, guiep naa lo zho: “;Golbiche lo naa nu, miech ndziibdee! ;Golsë lo gui dox ne rieguial to, zaatne no guey mendox grë xanj! ma! ⁴²Sac gon, bio dze pcaabedz naa ni bneedzde to ncuaane niow naa; bnaB zhis naa, ni bneedzde to pe nie naa. ⁴³Bial naa ladz to, ni bneedzde to zaatne mbëz naa; gon to guiend xab naa, ni ni tib lë lar bneedzde to niacw naa. Bio naa ladzguiib, bzhacnë naa, ni pe liaadz to niaadgan to naa.”

⁴⁴Squiab zho gnë zho lo naa: “Per pa hor bdzion no luu rcaabedz luu, rnabgaa zhis luu; pa hor bdzion no guiend pa cuëz luu, guiend lar ne gacw luu; pa horgaa bdzion no no luu ladzguiib, nixgaa luu rzacnë luu.”

⁴⁵Dzigo guiep naa lo zho: “Grëse vuelte ne bzoliaadz to niun to xyudar zha ne no xnëz naa, bzoliaadz to niegan to zho niicle zha ne mazdraa wina, rriequia naa ga sca been to.”

⁴⁶Hor co grëse zha co laa zho guey lo gui dox ne gdzindraa dze grieë zho; laa zha ne bioxco wban zigne rnabey naa, grëse zho laa zho ygaa tib guielmban ndzon ne gdzindraa dze lozh.

Bnediidz zho dieñ zha gnaaz zho Jesús

(Mr. 14:1-2; Lc. 22:1-2; Jn. 11:45-53)

26 Zeene blozh sca bnee Jesús lo grë miech co, dzigo rëbcha me lo xpëedscuel me:

²—Nanle to ganle schopaque ngbidz, laa lni Pascw csilo. Naa ne nac naa Mgui ne pxeel Dios, lo lni co gon gnaaz miech rii naa, tsielo zho naa ladznia zha ne yquiaa naa lo cruz.

³Grë zha ne nac pxoz ne rnabey, grë maistr ley ni grë zha ne nac men non lo men guedz Israel, lëëtaque hor co laa zho ndxie lidz Caifás, men ne nac pxoz

nroob. ⁴Laa zho ndxie ga, nonediidz zho dien zha grieelo gnaaz zho Jesús, gut zho me, per tib mod ne grieelod glisqui men guiedza. ⁵Rnee zho: “Lëëraasi choot gnabeyd ygaa me merpaa dze lni, zeëna gacntseebd menquiedz.”

Pchoob tib wnaa nceit nex guic Jesús

(Mr. 14:3-9; Jn. 12:1-8)

⁶Betain ga no tib men ne biac lo guiedz lepr, lë Simón. Lëëtaque no Jesús lidz men co, ⁷zeëne bdzin tib wnaa bdzinnie tiblo nceit nex, nosew tib len ncuane win niaa niapse quie rbebni, tiblo nceit niazha. Squi zob Jesús lo mezh, güey wnaa co güeychoob me nceit co guic Jesús. ⁸Zeëne gon xpëëdscuel Jesús sca been wnaa co, blëë zho, rnee zho:

—¡Pa rieguiála squi pxin zhlë wnaa qui nceit qui! ⁹Tej niaca mine ndow, pe zhidaa dimi ne nguizh zhow, nquiinpa dimi co ngaaza lo grë zha ne guiend pe yquiin.

¹⁰Gon Jesús sca rac zho, dzigo rëbcha me lo zho:

—¿Pe nacne riëë to lo wnaa qui? Golsaan me. Par naa nroob non mine been me i. ¹¹Tej nli lëë racladz to gun to xyudar zha ne guiend pe yquiin, zac ygad to lo zho stib dze, sac tibaque ran to zho; sangue naa zhile laa naa gbiche lo to. ¹²Led pxin zhlëd wnaa rii zhinceit me, sac gon rriequia laa me bzhixcuale xcuerp naa nu gal dze ne ygueetsa. ¹³Gneli naa lo to ganle, dipse lo guidzliu zaatne cseedtaa miech Xtiidz Dios, ible soladz zho wnaa rii, seet zho mine been me nu.

Güeyto Judas Jesús

(Mr. 14:10-11; Lc. 22:3-6)

¹⁴Lo gza tsiipchop zha ne nac xpëëdscuel Jesús ga, brieë zha ne lë Judas Iscariot güeyzodiidznie Judas grë zha ne nac pxoz ne rnabey, ¹⁵rëb Judas lo zho:

—¿Palal quizh to naa telne gun naa Jesús ntregar lo to?

Dzigo biaan zho diidz quizh zho Judas galptsii pes plat. ¹⁶Nacne psilo Judas noguib Judas dien zha gdeeda diidz csan Judas me ladznia zho.

Dowxtseenie Jesús xpëëdscuel me

(Mr. 14:12-25; Lc. 22:7-23; Jn. 13:21-30; 1Co. 11:23-26)

¹⁷Mer dze ne rsilo lni Pascwa, len dze ne sca row zho quietxtil ne riotsd ncobi ga, bnabdiidz xpëëdscuel Jesús lo me dien pa lo racladz me tsiegunlo zho ncuane gowxtseenie me zho wdze co. ¹⁸Dzigo rëbcha me lo zho:

—Nanle to ganle cho lidz zrieelo gdzin ne. Goltzie Jerusalén golguiab lo zho: “Znu në xmaistr no: Gneedz luu lidz luu me dioow no xtsee Pascw rii. Niinataa laa xtse me bdzin, gane racladz me lidz luu nu diowxtsee no nawdze grë no me.”

¹⁹Dzigo laa zho zie. Güey zho zaatne pxeel me zho ga, ga beenlo zho xtsee co.

²⁰⁻²¹Wdze co, laa me no xtsee grë me zho, zeëne bnee me lo zho rëb me:

—Gacnan to ganle, lëëque tib to gon tsielo naa ladznia zha ne gnaaz naa nawdze rii.

²²Zeene bin zho sca rëb me, mbanse rac zho, dzigo psilo zho tibga tibga zho rnabdiidz lo me, rnee zho:

—Bnë dien, ¿cho gon min co? ¿Pe naaw?

²³Pquiab me rëb me lo zho:

—Zha ne gan to csëëb xcuun len xquien naa, lëë zho ga. ²⁴Naa ne nac naa Mgui ne pxeel Dios, niina laa miech gut naa zigne raquietsew lo Xtiidz Dios; per, ¿probsaxe zha ne tsielo naa ladznia zho! ¿Mazd wen nie zho, ib niacd zho miech lo guidzliu!

²⁵Yeze Judas rnabdiidz lo me rnee Judas:

—Maestro, ¿pe goon naaw ye?

Rëbchaa me lo Judas:

—Luuw gon Judas, luu güeyto naa.

²⁶Laa zho noyow, zeene bzhen Jesús tib quietxtil, bdeed me xquizh lo Dios, blozh ga beengrol mew, dzigo bdiiz mew lo zho, ni rëb me:

—Golquiina, lëë xcuerp naa i gon.

²⁷Ni bzhen me tib cop nroob vin, bdeed me xquizh lo Dios, blozhse bdeed me xquizh, dzigo pteed me cop co lo zho grëse zho, rëb me:

—Golguie vin qui, ²⁸sac lëë xchen naa i, mine no gzhiee par guiaanmbe grë miech lo xtol zho sëëb zho xnëz Pxoza naa, sac lëë stib mod cub nu psan me parne sëëb miech xnëz me. ²⁹Lëë lultm vuelte nu guie naa vin rii, sac zhaale stib vin cub ne guie naa gal dze ne guenie naa tow zaatne rnabey Pxoza naa.

Dzigo psilo me biilnie me Dios gza me zho.

Bzeet Jesús zha gon Pedr

(Mr. 14:26-31; Lc. 22:31-34; Jn. 13:36-38)

³⁰Blozhse biilnie zho Dios, laa me briege ga gza me zho, laa me zienie zho nëz Gui Oliv.

³¹—Ible saan to naa nawdze rii —rëb me lo zho—, sac scale ziaad lo Xtiidz Dios zaatne rnee: “Zdeed Dios diidz csiwee zho baxtor, lozh ga nëzrii nëzrec gliala mëcwxiiil.” ³²Mincopaa nagon gon miech naa, per zeene laa naa griebeban glole naa ga Galilé, ga cuëz naa to.

³³Dzigo rëbchaa Pedr lo me:

—Niicle telne saan grë zha qui luu, sangue naa gon csaand naa luu.

³⁴Pquiab me rëb me lo Pedr:

—Gneli naa lo luu ganle, guieel riigazh, gardle ycuedz gall, laa luu csale tson vuelte guiab luu runbeyd luu naa.

³⁵Per tibaque nac xtiidz Pedr, rnee Pedr lo me:

—Niicle tel zaatne guet luu guet naa, per guncad naa. ¿Pe nacne guiep naa runbeyd naa luu?

Scaque rnee grëraa xpëëdsuel me.

Bzodiidznie Jesús Pxoꝛ me Getsemaní

(Mr. 14:32-42; Lc. 22:39-46)

³⁶Zeene bdzinnie Jesús zho zaatne lë Getsemaní, dzigo rëbchaa me lo zho: —Nuse nagon gołsob, laa naa ga gazodiidznie naa Pxoꝛ naa.

³⁷Hor co psilo mban rac zdoo me, riabguielnë me, dzigo bredz me Pedr, ni grop xingan Zebedé, bzënie me zho palal ³⁸dzigo rëbchaa me lo zho:

—Mban rac zdoo naa, zootle zig zet naa lo guielnë rii. Nuse nagon gołguiaan, per gołsobna.

³⁹Bzë me spalal, dzigo pquitsgzhib me haxta bdziñ lo me lo liu; psilo me bnaab me lo Dios, rëb me:

—Papá, laa naa rnab lo luu, telne zala zdoo luu, bzhiguiel psilaa naa lo grë guielnë rii. Miñ rii rnab naa lo luu, per telne grieeloda, mine gnëtaa luu, miñ co gac.

⁴⁰Zeene guso me, güey me zaatne biaan gza tson zha co, gon me laa zho nixguesle; dzigo rëbchaa me lo Pedr:

—¿Pe ni palal blëbde to nzobna to? ⁴¹Gołsobna, gołnab lo Dios zeena yquiid mendox to. Niicle ne squi lëbdraa xcuerp to sobna to, per gołnab lo Dios, sac gon miñ co nac mine racladz zhiespíritu to.

⁴²Dzigo güey me stib, güeyzodiidznie me Dios; scaque mine bnaab me glo mincoque bnaab me. ⁴³Zeene wbiire me bdziñ me lo zho, gon me laa zho nixgueslaque, sac lëbdraa zho mcaal. ⁴⁴Wbiire güey me güeynab me lo Dios, scaque mincoque bnaab me. ⁴⁵Zeene laa me wbiretaa bion vuelte co, rëbchaa me lo zho:

—Lëew nagon, zacle na gagueies to, zacle gdziiladz to. Naa ne nac naa Mgui ne pxeel Dios, laa hor nagon bdziñ zeene laa grë miech ntseeb rii guiadnaaz naa. ⁴⁶Gołtsieso, zeena zio ne; sac gon laa zha ne glu naa lo zho ziaadle nu.

Bnaaz zho Jesús

(Mr. 14:43-50; Lc. 22:47-53; Jn. 18:2-11)

⁴⁷Laa Jesús bii quianeeque, zeene laa Judas (tib zha ne nac xpëedscuel me) bdziñ, bdzinnie Judas tib dzoon zha ne pxeel grë pxoꝛ ne rnabey, ni grë zha ne nac zha non lo men guiedz Israel. No zho nzhen spad, nogaa zho nzhen yag. ⁴⁸Biaanniele Judas zho diidz zha glu Judas cho nac Jesús, rëb Judas lo zho zha ne gan zho gow Judas bzhid cuas, lëe me ga, ligier so zho gnaaz zho me. ⁴⁹Zigne bdziñ Judas pquiaabdiuzh Judas me, blozhse ga wbig Judas dow Judas bzhid cuas me. ⁵⁰Dzigo rëbchaa me lo Judas:

—Judas, ¿pe ziaadgun luu nu?

Lëëlëd wbig be grë zha co, bzhen zho me. ⁵¹Hor co biet tib zha ne rzënie me ga, bdoob zho zhispad zho psilaa zho tib niaw, bliengaa zho diag tib zha ne rquia xtsiin men ne nac pxoꝛ nroob. ⁵²Dzigo rëb Jesús lo zha ne pquiaaw ga:

—Blootsow zhispad luu, ib gundraa luu squi cob luuw. Sac gon zha ne rdil con spad, noxtseeb ne low guet zho. ⁵³¿Niacxe nan to na grieelod gnab naa

lo Pxoꝝ naa niina cxeel me tsiipchop partid xanj̄l me guiaadla ne nu? ⁵⁴Per tel̄ne sca guṅ naa, ¿zha dzigo gac miṅe zhubnee lo Xtiidz Dios, zaatne raquiet miṅe noyac nu?

⁵⁵Dzigo rēbchaa me lo grē zha ne bdziṅ ga:

—¿Pe nacne squitaa rac to? ¿Niacxe naa cho zha ntseeb, ne squitaa nzhen̄ to spad, nzhen̄ to yag ziadnaaz to naa? Blactaa name goṅ to noseed naa miech len̄ yadoo, ¿pe nacne bnaazde to naa ga? ⁵⁶Per ible laa grē ncuaan̄ rii goṅ noyac, zeena grieequia grē miṅe bzeet grē zha ne biadteed xtiidz Dios lo miech padzeela.

Hor co grēse zha ne nac xpēēdiscuel me laa zho bzhoon̄, tipse me psan̄ zho ga.

Güeynie zho Jesús lo zhiwxtis zha Israel

(Mr. 14:53-65; Lc. 22:54-55, 63-71; Jn. 18:12-14, 19-24)

⁵⁷Ga brieenie zho Jesús bdziṅnie zho me lidz Caifás, men̄ ne nac pxoꝝ nroob. Grē zha ne rnabey lo menguietz Israel, laa zho ndxiele ga. ⁵⁸Ye Pedr maase zit zit nal̄ Pedr laa Pedr bdziṅ xley men̄ co. Bdziṅ Pedr güeysobga Pedr lo grē zha ne ndxienap, quiambēz Pedr dien̄ zha guṅ zho Jesús.

⁵⁹Grē pxoꝝ ne rnabey, grē zha ne nac zha non lo menguietz, grēse zha ne nac wxtis, laa zho ndxie nēz len̄ yu co, quiaguib zho zha ne gzhixcuuaa maase diidzguizh ycaadz zho Jesús, parne gdeeda diidz gnab zho guet me. ⁶⁰Ndal zha ne sca been̄, per brieequiad xtiidz zho, sac zhaase zhaase rnee zho. Tibaque zeene guso chop zho, ⁶¹rēb zho:

—Bdzion̄ no goṅ rnee me laa me ctixche yadoo ne zob lad guiedz nu, zaatne riodzian̄ ne Dios, lozh ga tsonaque ngbidz gzaalo me stiba.

⁶²Dzigo hor co bzoli men̄ ne nac pxoꝝ nroob, rēb me lo Jesús:

—¿Pe nacne rquiabd luu? ¿Pe nli sca rnee luu, te nlida ye?

⁶³Goṅ pxoꝝ nroob co rquiabdaque Jesús, rēbchaa me:

—Zig zob Dios mban ne no gbaa, laa naa rnab lo luu bneeli lo no dien̄ cho nac luu. Bnē tel̄ nli Xpēēd Dios nac luu, Men̄ ne zēēble diidz ga cxeel me.

⁶⁴Dzigo pquiab Jesús rēb me:

—Scaw goṅ, naa nac men̄ co. Naa ne nac naa Mgui ne pxeel Dios, bii zan̄ to ganle zeene laa naa zob cue Dios nēz derech, ni zeene laa naa guieet gbaa zialzēeb naa lo xcow.

⁶⁵Hor co ptsiez pxoꝝ nroob co xab me, sac blēē me bin me sca rēb Jesús.

—¿Pe mazdraa textigw ne racladz ne? —rēb me—. Laa to binle ganle zha rzētaa xtiidz me noguitnie me Dios. ⁶⁶Nana waa, ¿pe gnē to zha dziuun̄ ne me?

Pquiab be zho rēb zho:

—¡Ib rieguial̄ guet me!

⁶⁷Dzigo hor co psilo zho nosacsi zho me. Zha ne rtsuc lo me, zha ne rdeed puñet me, nogaa zho rgap lo me, ⁶⁸rlozh ga rzhidznie zho me rnee zho:

—Luu ne nac luu men̄ ne pxeel Dios, ¿bnē dien̄ cho ga bdiṅ luu?

Rëb Pedr runbeyd Pedr Jesús

(Mr. 14:66-72; Lc. 22:56-62; Jn. 18:15-18, 25-27)

⁶⁹Hor co laa Pedr bii zob nëz ley. Ga zob Pedr, güey tib ndzooop ne quia dziin lidz men rnbey co; rëb ndzooop lo Pedr:

—¿Ye luu lëë rzënie Jesús, men Galilé ne bdzinnie zho i?

⁷⁰Per bneelid Pedr. Squi zob grë zha co, rëb Pedr:

—Rienđ naa dien cho men rnee luu.

⁷¹Laa Pedr ziele nëz ro puert ne quia ro nëz, zeene gon stib ndzooop ne quia dziin ga Pedr, rëb ndzooop lo zha ne ndxie ga:

—Ye mgui qui gon nacgrë men Nazaret ne bdzinnie zho i.

⁷²Scaque bneelid Pedr, haxta rzeet Pedr Dios rëb Pedr runbeyd Pedr me.

⁷³Wdzeepaaw, rëb zha ne ndxie ga lo Pedr:

—Ne nligaa ye luu rzënie men ne bdzin i. ¡Rlupaa name zig rnee zha nëz Galilé rnee luu!

⁷⁴Dzigo psilo Pedr rzeet Pedr Dios rnee Pedr runbeyd Pedr Jesús, haxta rnee Pedr:

—Dios zobwi ganle, telne led diidzlid nu rne naa, maase cuibdee naa.

Loxaque blozh sca brieë ro Pedr zeene laa tib gall pcuedz. ⁷⁵Hor co psoladz Pedr xtiidz Jesús zeene rëb me lo Pedr: “Gardle ycuedz gall, tsonle vuelte rëb luu runbeyd luu naa.” Dzigo mbanse rac Pedr. Brieë Pedr ga, psilo Pedr biin Pedr guielnë co.

27 Ziadyiinile liuw, wbiire pcaalsa grë pxoz rnbey, grë zha non lo mengüedz, bnediidz zho dien zha gnabey zho guet Jesús. ²Blozhse bzodiidz zho, dzigo laa zho bzobdoo me blee zho me ga ziesan zho me lo Pilat, men ne nac gobernador.

Gut Judas

(Mr. 15:1; Lc. 23:1-2; Jn. 18:28-32)

³Laa Judas Iscariot zha ne pto Jesús ga, zeene bin Judas laa zho rnbey guet me, lëëled güey Judas lo grë pxoz rnbey co, lo grë zha non lo mengüedz ga, zietsire Judas dimi ne bdiizh zho Judas ga. Mban rac Judas, ⁴bdzin Judas rëb Judas lo zho:

—Naraa rien naa lëda nu ben naa. ¡Tib dol nrooble nu, znu bialto naa tib men ne peet xtold!

Pquiab zho rëb zho:

—¡Mincotaa gon ndionđ no! ¡Xcuentzhe luu ga!

⁵Hor co pchel Judas dimi co len yadoo. Lo guielnë co brieë Judas ga güey Judas lëëque Judas pxiiyan Judas.

⁶Grë zha ne nac pxoz rnbey ga, güey zho ptop zho dimi co. Per blozh ga, rienđ zho dien zha gun zhow.

—¿Zha dziuun ne dimi rii? —rëb zho—. Telne guiaana yadoo, per rdzieelda, sac gon xchen tib miech bdzëew.

⁷Dzigo bzodiidz zho dien zha gaca, nacne mazd pquiin zhow bzhii zho tib lë liu, zaatne rdieen yu ne ríaa grë ncuaañ psin ne rquiin; parne lo liu co ygueets grë zha zit ne guet Jerusalén. ⁸Nacne brieelë liu co “Liu ren”, ni sca runbey zhow len dze rii. ⁹⁻¹⁰Ga brieequia miñe bzeet zha ne biadteed xtiidz Dios padzeela, zeene rëb zho: “Galptsii pes plat ne bzhii zha Israel men nziuu co, dimi co bzhii zho tib lë liu, zaatne rdieen yu ne ríaa grë ncuaañ psin ne rquiin. Sca në Dios lo naa.”

Bnab zho guet Jesús

(Mr. 15:2-20; Lc. 23:3-5, 13-25; Jn. 18:33-19:16)

¹¹Bdzinnie zho Jesús lo Pilat, ga bnabdiidz Pilat lo Jesús rëb Pilat:

—Bnë dien, ¿pe nli luu nac zhirey zha Israel?

Pquiab me rëb me:

—Nliw.

¹²Grë zha ne nac pxoz rnabey ga, ni grë zha ne nac zha non lo menguedz, rzadraa ncuaañe rquiaqui zho me; per ni tib diidz rtsired me lo zho. ¹³Dzigo rëbchaa Pilat lo me:

—¿Pe nacne rquiabd luu? ¿Pe ib rond luu grëtaa ncuaañe rquiaqui zho luu i?

¹⁴Bzee zdoo Pilat gon Pilat, ible rquiabd me.

¹⁵Gzobse iz, zeene ral lni Pascw rnabey Pilat ríaa tib zha ne no ladzguiib, zha ne gnabtaa menguedz laa. ¹⁶Len dze co no tib zha ntseeb ladzguiib lë Barrabás, zëeb xtiidz zho. ¹⁷Nacne rëb Pilat lo grë zha ne ndxie ga:

—¿Cho racladz to csilaa naa? ¿Pe silaa naa Barrabás, te silaa naa Jesús ye, men ne nac diidz pxeel Dios lo to?

¹⁸Sca rëb Pilat sac bien Pilat loxaque porne ndal miech nobig lo Jesús min co ne rlëenie zho me, bnabey zho bgaa me.

¹⁹Laa Pilat zob lo xcan ne run me guielwxtis, zeene bdzin tib mandad rëb lo me:

—Znu në tsiel luu: bzhiguiel me peet gund luu men qui, rlu peet xtold me; sac nieewdze me nroob ptseb mcaal tsiel luu.

²⁰Grë zha rnabey co, bio zho pquiiil zho menguedz gnab zho csilaa Pilat Barrabás, ni gnab zho guet Jesús. ²¹Zeene wbiire Pilat bnabdiidz Pilat stib, dien chopaa racladz zho laa, grëse zho nguiedz pquiab be zho, rëb zho:

—¡Barrabás psilaa!

²²Dzigo rëbchaa Pilat:

—Men ne waa nac diidz pxeel Dios lo to nu, ¿zha gun naa me?

Pquiab zho rëb zho:

—¡Bnabey yquia me lo cruz!

²³—¿Per pe nacne yquia men rii lo cruz? —rëb Pilat—. ¡Ni tib dol rapd me! Biireque zho nguiedz roptsie zho rnab zho yquia me lo cruz. ²⁴Gonse Pilat rquiaadiagd zho xtiidz me, lel mazdraa rac zho, dzigo bnab me nis, squi ndxie zho bdiib me nia me, rëb me lo zho:

—¡Nanle to nasca, led xtoldraa naa nu ne laa xchen men rii gzhiee, sac nanpaa naa peet falt rapd me!

²⁵Pquiab be zho rëb zho:

—¡Peet nacd ga! ¡Zhits no grë xpëed no cuib dol co, na no guiotizha!

²⁶Dzigo bnabey Pilat blaa Barrabás, laa Jesús racse me bnabey me zha ne bdiñ Jesús, blozhse ga laa me psan Jesús ladznia menguiib ne tsiequiaa me lo cruz.

²⁷Biire grë menguiib co bzëebnie zho me nëz len yulow, ga pcaalsa grëraa menguiib ne nacgrë zho, brin zho igose me. ²⁸Blee zho xab me, bgacw zho me tib lar nizhnie nlaan, zig rna lar ne racw grë rey, ²⁹bzieecw zho bla lë yag guiets, bzoob zhow guic me zig rzob coron guic zha ne nac rey, ni bloo zho tib lë goobgui nia me. Runnguzee zho me, rquitsgzhib zho lo me, rnee zho:

—¡Golwi ganle zha ractaa zhirey zha Israel!

³⁰No zho rtsuc zho lo me, rgob zho goobgui ne no nia me ga, rdeed zhow guic me.

Güeyquiaa zho Jesús lo cruz

(Mr. 15:21-32; Lc. 23:26-43; Jn. 19:17-27)

³¹Blozhse sca bdziitnie zho me, blee zho lar nizhnie co lad me, bgacw zho me xab me stib, dzigo laa zho brieenie me ga zienie zho me zaatne yquia me lo cruz. ³²Nëz zienie zho me bdzieel zho tib men Ciren lë Simón, bnabey zho men co bi me zhicruz me.

³³Zeene bdzin zho zaatne nac “Gui Beerguic Ngutoo” (Gólgota), ³⁴ga bdeed zho nziu lo me notsa tiblo guizh nlayag, per zeene pquiaaro mew bien me nziu cow, bnëd me nie mew.

³⁵⁻³⁶Blozhse pquiaa zho me lo cruz, bzhen zho tib xab me pchug zhow biaananie zho tib lëgaw, laa stiba bio zho rif; dzigo laa zho bzob ga, bzobnap zho. ³⁷Guic zhicruz me, ga pquiaa zho bla lan diidz zaatne rnee: “LËË JESUS NU, MEN NE NAC ZHIREY ZHA ISRAEL.” Sca pquiaa zho, sac minco pquiaqui sca pquiaa zho me lo cruz. ³⁸Ye chop ngbaan pquiaagza zho me lo cruz, tibga zhicruz zho bzo tib nëz cho zhicruz me. ³⁹Grëse miech ne rdedtaa ran zho laa me quia ga, rzhidznie zho me, haxta rdzi zho guic zho ⁴⁰rnee zho lo me:

—Led rëb luu lëe laa luu ntsil yadoo, ni tsonaque ngbidz nzaalo luu stiba, ¿pe nac dzigo rrieelod luu guieet luu i? Telne nli Xpëed Dios nac luu, biet lo qui.

⁴¹Scaque grë pxoz rnabey, grë maistr ley, grë zha farisé ni grë zha ne nac zha non lo menguietz, rzhidznie zho me, rnee zho:

⁴²—Stib miech scataa beenguiac me, stib miech scataa bla me, ¿pe nac dzigo rrieelod me gla me me? ¡Goon me name nac zhirey ne, quiet me i sca zho; zeena dziuunbey ne men rnabey nac me! ⁴³¡Conque tant rnalo me Dios, haxta rnee me Xpëed Dios nac me, guiaadsilaa Dios me i nazho!

⁴⁴Ye ngbaan ne quiaagza me lo cruz ga, mincoque rbidzgo zho lo me.

Gut Jesús

(Mr. 15:33-41; Lc. 23:44-49; Jn. 19:28-30)

⁴⁵Zig groḷ dzew, tibaque zeenḡ goc tib ncow dipse lo guidzliu, haxta las tres biaa biini stib. ⁴⁶Hor co nguiedz zëëb tsi Jesús, rnee me:

—Elí, Elí. ¿Lama sabactani?

Diidz co nac zig nac ne rnee ne: Luu nac xDios naa, luu nac xDios naa. ¿Pe nacne psaan luu naa?

⁴⁷Zha ne ndxie ga, zeene bin zho sca rbedz me, no zho rëb Lí, menḡ ne biadteed xtiidz Dios padzeela, menḡ co rbedz me. ⁴⁸Dzigo rias tib zho güeygadz tib lë zhiil lo nziu bla, bzoob zhow tib guic goobgui pquiaa zhow ro me. ⁴⁹Laa zla zho rnee:

—Psaan, nu dzianḡ ne dienḡ pe ziaad Lí guiaadlit Lí me i.

⁵⁰Tibaque zeene pquiaa me stib redz nroob, znuse blozh me.

⁵¹Horne nolozh me ga, hor co briez nzoli lar nroob ne quia lenḡ yadoo, groḷtaa goca; psilo bni tib zho dox, grë quie masaque wbiḷa, ⁵²nzian ro baanḡ grë zha ne bnalo Dios mazd padzeela bzhiäl. ⁵³Zeene goḷ dze ne brieegan me, ye zho laa zho brieegan, brieeg zho lenḡ baa, bzëëb zho lad guiedz; nzian miech ne gonḡ zho.

⁵⁴Grë menguiib ne quianap me ga, ni zha ne rnabey lo zho, zeene gonḡ zho bni zho co, ni gonḡ zho grë ncuane goc ga, per nli bdzieb zho.

—¡Ne nlipagaa —rnee zho—, Xpëed Dios nac menḡ qui!

⁵⁵Nzianlaa menḡ wnaa, zit zo zho rwi zho. Lëë grë menḡ wnaa co güeynalḡ zhits Jesús, beenḡ zho xyudar me dipse lenḡ dze ne pseed me miech, desde dze ne psilo me nëz Galilé. ⁵⁶Lad co no Marí Magdal, Marí tsieel Zebedé, ni Marí ne nac xniaa Jacob grop José.

Bgueets Jesús

(Mr. 15:42-47; Lc. 23:50-56; Jn. 19:38-42)

⁵⁷⁻⁵⁸Zhile sëëb ngbidza, zeene bdzinḡ tib mgui lë José lo Pilat, bnab me diidzbeey tsielit me xcuerp Jesús lo cruz; tib zha ricwa, menḡ guiedz Arimaté nac me, ye me zienalḡ zhiwseed Jesús. Nacne pxeelḡ Pilat diidz lo zha ne quianap Jesús ga, parne siguielḡ zho glit José me lo cruz.

⁵⁹Dzigo güey José. Blozhse blit José me lo cruz, laa José neyle tib lë lar cub, pchelḡ José me lar co, ⁶⁰güeyxob José me tib lenḡ baa ne nacchenḡ José ndieenḡ tib cho quie gax ga; tib baa cuba. Blozhse bdzig José tib quie nroob bioog ro baa co, laa José zey. ⁶¹Laa Marí Magdal bii biaanḡ ga, grop me stib Marí ne nacgrop me ga; zobse zho gax ro baa co.

⁶²Biini liu co, pcaalsa grë pxoz rnabey, grë zho zha farisé, güey zho lo Pilat, ⁶³rëb zho:

—Gunḡ luu dispensar, laa no ziaadaque lo luu stib. Naraa rsoladz no, lenḡ dze ne bii mban menḡ ntseeb ne sca biaadquidie miech ga, rëb me, zeene gac tsonḡ ngbidz guet me laa me grieegan. ⁶⁴Gane ziaad no lo luu, bzhiGUIelḡ pxeelḡ zha

ne yquiaanap ro baan me haxta gac tson ngbidz co; sac nend tsie zha ne nac xpëëdsuel me tsiebee zho me, lozh ga guiab zho laa me brieegan. Nanle luu ganle, tel gac min co, cho gnë peraa gzhixcuaa zho.

⁶⁵Dzigo rëbchaa Pilat lo zho:

—Telne sca racladz to, laa tib partid menguiib ndxie i. Goltsienie zho, golguiab lo zho yquiaanap zhow tel zha racladz to.

⁶⁶Dzigo laa zho zie zienie zho grë menguiib co. Bdzin zho bloo zho tib bey cho quie ne nioog ro baan Jesús ga, par glu tel cho zha ne tsiegaala, ni biaan grë menguiib co yquiaanapa.

BRIEEBAN JESUS

(Mr. 16:1-8; Lc. 24:1-12; Jn. 20:1-10)

28 Zna dze goc dze ne rdziiladz zho lo dziin ga, biini liu, dze ne rsilo zhmał, silgaw zie Marí Magdal grop me stib Marí co zieso zho ro baan Jesús.

²Lëëtaque hor co bni tib zho dox, lo zho co biet tib xanj Dios gbaa bdoob me quie nroob ne nioog ro baa co, bdiix mew tib lad, bzobga me lada. ³Masaque rlu me zigne rlu belye, xab mew, nquitsbie rnaw, zig rlu zaatne ndxie guieg. ⁴Grë menguiib ne quianap ro baa ga, zeene gon zho anjl co, per nli bdzieb zho, rzhidz zho. Lo dzeb co, pcowgazh zho, grëse zho biab liu. ⁵Zeene laa grop wnaa co bdzin, rëbchaa anjl co lo zho:

—Gdziebde to. Nanle naa Jesús men ne pquiaa zho lo cruz ga, men co ziaadguib to. ⁶Per guiendle me nu, jlaa me brieeganle zigne bneele me ga! Golwi ganle nu nac zaatne pxob zho me. ⁷Niinagazh goltsie goltsienie diidz lo xpëëdsuel me, golguiab lo zho laa me brieeganle. Galilé me cuëz me zho, ga gan zho me. Laa to nanlew nasca.

⁸Lëëled brieegrop wnaa co ga, rias zho laa zho zienie diidz lo xpëëdsuel me; lala rdzieb zho, ni lala rley zho. ⁹Laa zho zie, tibaque zeene gon zho laa Jesús zole lo zho, ine pquiaabdiuzh me zho. Hor co wbig zho pquitsgzhib zho lo me, bdeedz zho ni me. ¹⁰Dzigo rëbchaa me lo zho:

—Gdziebde to. Goltsie goltsienie diidz lo grë zha bets naa, golguiab lo zho tsie zho Galilé, ga gan zho naa.

¹¹Hor coraa laa bla zhaguiib ne pquianap ro baan Jesús ga bdzin lad guiedz. Güey zho lo grë pxoz rnabey, bzodiidz zho zha gon zho bzhiäl ro baa co. ¹²⁻¹³Dzigo pcaalsa grë pxoz co grë zho zha ne nac zha non lo menguiidz, dien zha gun zho. Nacne biaan zho diidz, mazd gdeed zho dimi lo grë menguiib co, parne gneelid zho, sinque guiab zho, segur xpëëdsuelaque me güeybee me len baa, per biend zhow sac nixguies zho. Nroob dimi bdeed zho lo grë menguiib co, ¹⁴rëb zho:

—Peet tsienied guic to, niicle telne gon gobernadora na no guionee lo me, zeena peet gund me to.

¹⁵Dimi co pcaania zho, dzigo laa zho psilo pxoon diidz co zigne rëbse grë zha co lo zho. Grë zha Israel ne bina len dze co, masaque bliladz zho nli sca goca, ni haxta lo nadze sca zienie guic zho.

¹⁶Zeeṇe bdziṇ dze ne gdzieelo Jesús xpëédscuel me nëz Galilé, brie e gza tsiiptib zha ne bzo gaxpaa lo me ga, güey zho nëz co; bdziṇ zho guic gui ne rëble me ga gdzieelo me zho. ¹⁷Zeeṇe gon zho me pquitsgzhìb zho liu.

Lo grë zha ne ndxie ga, no zho rienpaa lëë me ga, nogaa zha ne bii racchop guic. ¹⁸Dzigo wbig me lo zho, rëb me:

—Laa to gonle nasca naa rnabey. Grëse ncuaane no gbaaw, nogaa guidzliuw, ladznia naa psan Pxoꝝ naaw. ¹⁹Niina nagon, laa naa rсан diidz lo to: gołtsie dipse lo guidzliu, gołtsieseed miech gac zho zha ne sëëb xnëz naa, gołchoobnis zho, gołguiab lo zho lëë miṇ co rnabey Pxoꝝ naa, rnabey naa ne nac Xpëéd me, ni rnabeygaa Espíritu Sant. ²⁰Gołseed zho gban zho grëse miṇe bnabey naa to gun to. Miṇ co rсан naa diidz lo to gun to; ni gacnan to ganle, ib csaand naa to, gzataa dzew niicle haxta dze ne nitlo guidzliuw, naa gacnie to.